

續集


燕石齋

稚暉題





尋茫茫之墜緒
願世世今相承



敬祝

緒承先生古稀之慶

西風吹雁送書到。壽進景亭稀古觴。文學聲宏傳滬海。詩歌譽著競龍驤。同鄉主幹五年粹。郵政宣勞卅載揚。我自欣然殷捧爵。忝陳拙句附標緇。錄上吟政

弟侯鴻鑑鞠躬手草一九五〇年十月七日

始平家學溯宗風。七秩古稀作壽翁。黌舍廿年施教育。郵傳卅載掌交通。梓桑恭敬羈淞滬。桃李栽培入泮宮。著述詩文芳百世。新知舊雨競呼嵩。

緒承先生

七旬嘉誕

庚寅新秋王雲樓率子暨孫拜祝

緒承學長七十壽茲呈拙詩四章用當華封三祝即乞

大吟壇正之

憶從文字訂相知。猶在童年角逐時。朝夕往還婁巷日。同窗共硯侍陶師。錫金旅學想從前。轉瞬韶華四十年。我已鬚髯如雪白。羨君矍鑠是神仙。久客中江舉壽觴。兒孫繞膝蔚成行。更欣繡閣珠簾裏。鴻案朱顏有孟光。飽看時局日紛爭。壽世詩文留後名。我亦來年登七秩。與君相比愧平生。

同學弟秦金鑑未是草


緒承先生七十整壽以友好釀金將其歷年所作詩文付諸剞劂分餉同人率成兩絕即請

鄂政

佐盧文字夙精研。四國週知冠世賢。管領郵傳經卅載。虛榮不慕未思遷。更喜公餘耽翰墨。遍傳滬濱與梁溪。錦囊佳什如山積。願借青錢壽棗梨。

鴛湖孫壽成初稿

秦古柳先生贈畫



賀天健先生贈畫



錢瘦竹先生贈章

敘

馮緒承。余表姪也。一日以其近二十二年來哀集所爲詩古文詞。題名燕石觚翰續集者。付諸剞劂。丐余序。原夫文也者。言取乎經。行致乎道。其能師經探道。汎濫於諸子百家。則其文精矣大矣。非若世之珍敗鼓之皮。樂蚊蝱之響。專事彫績者。詡詡然遂自名其爲文也。且夫詩也者。言志導情。有興觀羣怨之旨。無緣情綺靡之作。托物比興。能詩者。大抵幽邃要窈。莫測其意之所在。蓋去古尤遠。則其詩途泯沒而無傳焉。甚矣。詩文之不易取悅於世。而爲一日之遇者如是夫。緒承自幼讀書。五歲而孤。十六失恃。今年七十。將出其所學。以布於世。余都不之觀。以是不敢道其文之何者爲佳。詩之何者爲工。自審有素。非矯激也。余第知其戊戌政變。力勸其捨棄帖括。吸取歐化。迄於今習英文者五十年。攻法文者二年。學日文者三年。此外則其奔走衣食且不暇。又何有乎詩文。縱或有之。必其爲詩也。不明乎詩。其爲文也。不足於文。不待言而可知矣。抑知不然。迨觀夫同鄉裘葆良先生批閱其文。『大著極佳。我的生活一篇。尤有奇氣。六十年中一飲一食。一舉一動。有一定之規則。有恆心。又能抽暇讀書。一日無間。頗有曾湘鄉之風。詩數十首。無限感慨。觸物而流。有水到渠成之妙。』及錢名山先生評別其詩『大作有力量。有心思。與今之詩家。應酬搪塞了事者絕異。古人有句云。骨裏有詩莫浪吟。足下眞骨裏有詩者也』不覺勃然興感者久之。然後知緒承之詩古文詞。久有定論。余謹以此發爲序言。無待乎贅詞。

庚寅秋九月無錫丁福保仲祐氏敘於上海疇隱廬時年七十有八

自序

余不識文而喜作文。又不知詩而喜詠詩。非所謂南轅北轍。背道而馳乎。然不識文而欲使其識。不知詩而欲使其知。除作與詠二者以外。別無捷徑。是則此集之命名與用意。塵塵求其文之識與不識。詩之知與不知而已。作云乎哉。詠更無論矣。民元十八。遂有燕石觚翰初集印行於世。距今又二十二年矣。計自入生塵世而還。十歲學賦詩。十六學作文。戊戌政變後。隻身走海上。假維新二字爲名。日惟奔走衣食是謀。忽忽垂五十一年。年年作嫁。鮮有暇日。暇卽作文。所謂文者。乃拈弄之乎。絕不涉及政治。間或有類似政治者。如我之所謂不抵抗主義。我之所謂和平統一。慎重外交。及以黨治國等。恐語有違礙。悉行刪去。慎選輯也。作文有暇。厠上吟詩。所吟都不假彫琢。純乎天籟。比諸春日之鳥鳴。秋候之虫語。彷彿似之。故幼童類能道。老嫗亦能解。然何敢自比乎柴桑。而自居乎香山也。於是詩文誤人。積有年矣。日月不居。自愧已屆古希之年。偶檢故紙堆中。自己已至庚寅。有若應酬文字。聯合詩句者。不久將與草木同腐。幾駸駸有散失毀滅之虞。一時見而惜之。亟欲付梓。編爲續集。輒爲經濟所不許。昔年雖有鄉大夫願爲釀資。以付梨棗。奈中日構釁。限於環境而不之允。今夏丁福保表伯聞同鄉會發起組織圖書館。特捐鉅著說文詁林全部。緒承代表同鄉會遞書呈謝。忽於遞中。出阮近作自壽詩十首。謬蒙獎許。且願爲我介壽。以壽儀助刊。而自居於發起人之例。緒承深感其厚意。遵將親友所貺之壽儀。悉付諸靛青。名曰燕石觚翰續集。非敢謂有功於詩文也。亦藉以厚自寶秘。不與草木同腐焉爾。

公元一九五〇年十月緒承自序於上海寓次

謹將介壽助刊

諸親友台銜列左共計二百另三人

劉瑞昌	俞健	馮雲初	朱士浩	王建華	秦雨溪	孫秋屏	侯椿泉	秦冰臣	趙宗邃	李康復	吳榮釗	孫晉文	王槐青	強錫麟	王之幹	丁熊照
許達三	曹夢漁	顧仁安	周齊賢	張德銘	楊翰西	侯保三	唐旭升	劉維明	錢鳳皋	孫伯亮	陸榮堂	孫子剛	徐公明	方根生	朱鳳鳴	匡仲謀
郁德馨	周志康	何振瀚	張哲生	徐紹仁	王守其	侯朝海	張浣芬	黨家振	錢保華	朱仁德	劉棋楨	馮堯良	王九如	盛文熊	秦古柳	沈瑞洲
方志良	趙智安	陳湛如	薛道卿	孫慕頤	周棟勳	沈庸方	許鍾琦	蔣貴卿	沈贊鎬	李思京	劉毓楨	宋肇周	宋鳴玉	秦毓釗	賀天健	陳貴生
孫德良	許蘭芬	鄒元杰	許雪琴	孫希程	薛宗漢	顧執中	張翊生	曹啓東	沈觀揚	陶悟莊	蕭耕山	宋文彬	馮軍聲	沈殿揚	張全富	張瘦竹
陳聞遠	徐橘香	朱樹卓	曹鑑庭	陳顯模	薛宗傑	秦子宏	周屏侯	劉煥寰	陸志明	榮瑞昌	過弼臣	宋文藻	陶然	蔣近溪	鄒元生	趙顯吉
孫九錄	徐芳	陶拱辰	曹楨庭	單宗模	薛宗熙	唐逸階	許志澄	沈贊楠	周舜清	王志馨	裘邵恆	榮鄂生	秦毓銓	周念茹	丁金坤	王璧如
錢同甫	丁信成	劉心權	趙仲溥	單宗相	薛宗祐	章斐雲	周鑑清	吳隆森	張渭生	周復培	薛靜仁	周子瑜	馮姝胤	楊叔藝	鄒子方	陳益琴
虞家達	陳伯嘉	劉季恩	丁福保	張驥才	薛宗豪	張士希	顧堯唐	顧堯唐	王堯臣	莫珊度	榮耀綱	陶植新	馮樹聲	張義成	何錫棠	程敬堂
王宏業	宣開韶	陳承基	丁兆康	錢保稚	侯曄華	孫國璋	周經熊	鄒頌丹	陳鴻海	胡永慶	徐季安	楊仲岳	馮立聲	錫金公所	何可一	單瀛輝

周學宏 楊家欄 錢夢涓 孫振鐘 朱文龍 過佩良 單行中 宣錫漢 祝朋三 華鴻元
魯書金 任農軒 張文湛 孫晉良 孫福培 彭鶴齡 沈西苑 顧彬生 諸健秋 孫籌成
孫子建 孫劍風 王韻樓 徐浩如 吳承憲 劉湧法 張世榮 馬更生 趙雅史 戴明
陸龍泉 巫福保 夏伯熊

燕石齋翰續集總目

卷之一 文共一百篇

論三 文十六 頌十一 祝十 賦一 序三 述二 贊二 言八 書四 啓九 箋二 調五
說十一 辭一 題二 引二 記八 誌一

卷之二 詩共五百七十四首

五絕廿一 五律九 七古四 七絕四三一 七律九四 詞十三 曲二

卷之三 聯共一百另二副

賀十三 壽五 春二 挽七十 校四 戲二 屏三 徵二


補遺

八股文七 來函十一

燕石觚翰續集卷一

文

無錫馮緒承著



上海郵務管理局公祭孫總理奉安文 中華民國十八年

維中華民國十有八年。六月一日。上海郵務管理局全體辦事人員。謹以香茗清茶。致祭于先總理孫中山先生之靈曰。嗚呼。百祿有光。上受溥將之命。九圍用式。羣瞻大精之承。大國開疆。功勳一代。新民創局。效用千秋。乃有名世應期。同是振聲靈于西亳。元良合德。不滅恢統緒于南巢。故義戈奮揚。美姬七旬苗格。仁旆煥發。功高九世紀仇。慶大漢河山。爭拜飛黃之蓋。登斯民衽席。孔懷保赤之心。才易專制爲共和。僉曰其克有濟。力求自由與平等。漫云尙未成功。關山經百戰之餘。歌哭起萬家之日。豈徒沾沾然冀生前之高位。卜死後之美譽已哉。爰爲詞以哀之曰。

緬神州之板蕩兮。天其有悔禍之心。爰誕降嘉種而救國救民兮。提倡革命軍之先聲。自粵東以發軔兮。翻下駕于東瀛。憤中法之戰。喪失國權兮。暗結會黨而勿露其鋒稜。嗟與中會之一蹶不振兮。翼翼小心。陳皓東爲國捐軀兮。卽革命失敗之第一原因。渡大西洋而歐美。險遭不測兮。幸得其舊師康德黎之救星。三民主義之一手創造兮。開第一次同盟會于北京。黃岡起義兮。七里湖事敗垂成。相率安南同志。襲取鎮南關兮。法政府突下逐客之令。決志再赴歐美兮。回歸招黃花崗七十二烈士之魂。嗚呼總理。轉謀武漢而大定可期兮。復以遭洪

137934

憲之不幸。開非常國會于廣州政府兮。更譏問之交乘。東港督戰。起而掃除一切障礙兮。乃被召于京津。南北宣告統一兮。天下爲家。中國一人。嗚呼總理。儻首功之追溯兮。享中國四十年來未有之光榮。何昊天不弔兮。倏焉而萎厥靈芬。今日同聲哀悼兮。淚下沾襟。革命再造兮。賴有典型。空首稽首兮。惟禮則真。同志努力兮。人固無有弗殞。同室操戈兮。其將何以慰總理于在天之靈。嗚呼哀哉。成功不滅。積久常新。丹誠可鑒。黍稷非馨。禱詞告祭。同表哀忱。神其來格。奠饋斯陳。尙饗。

今後郵務職工有不能相安之我說中華民國十九年

天下事不明強弱之勢。而欲妄肇釁端。銳進者。斯倒退矣。倒退則自取滅亡也。若夫既明強弱之勢。希冀旦夕無事。畏難者。斯落險矣。落險則亦非久長之計也。處舉國多事之秋。羣雄角逐之會。強者不鬪自強。必與弱者等。強者則無以自存。弱者不甘於弱。而與強者埒。弱者亦可以相安。是蓋物競天擇。勢使之然。固不特對於國外虎視鯨吞之所稱列強。國內爭權奪利之自號偉人。互相反撥。發生不可思議之莫大影響爲然。吾視夫今日各公務機關之多數辦公人員。大都只求目前。不計身後。昧於利害得失。置己身地位問題於不顧。拋棄學業。玩忽公務。賂也。嫖也。熱心跳舞也。廁身電影也。如夢方酣。如醉未醒。則將終其生於六根六塵之中。趨趨瑟縮。而不知之覺。跣足以待之。赧顏以承之。若曰。得退且過。能忍斯能自安。爲維護生活計。能如是。是亦足矣。馴至因循坐誤。爲世界潮流。天行大圈所淘汰。無以自立。而不樂於相安。究其原因。明明人爲之。實則其自亡之也。要知時至今日。不自強無及。卽速自強亦幾無及。其退步之速。險象之劇。殆莫吾中華民國今日郵政局職工

若。吾爲之懼。

夫天然之障。非人力所能爲也。有時人定可以勝天。在反吾說者曰。是區區者何足慮。吾力足以禁壓之。夷滅之。抑知誤矣。今後之競爭。不在腕力在腦力。不在他人在一身。以己克己。謂之自勝。自勝之謂強。強者何。不外節省金錢。攻苦學業。鼓勵精神。努力工作四者是。不此之講。則日復一日。不倒退則落險。有一日不能相安之勢。所謂優等人斥退劣等人而奪其利。不爲明日黃花。萎然落。澌然滅者幾希。三十年前。可稱無人歡迎郵政局。爲終身服務郵政之人員。蓋其昧於事勢。而不知郵局性質奚若。與其人生活上有發生若何之關係。其不願也。實有可造之機會。而使之願也。三十年後。適從反對之比例。成爲累進之比例。其向之不願入郵局服務之子若弟。多數反在郵局。努力服務。博得數十元或數百元以上之給賃銀。與郵局樂爲相安。以圖一勞永逸。豈知世界潮流。鼓盪不已。又從累進之比例。成爲反對之比例。蓋強權可以戰勝夫公理。而公理又將屈服於私弊。於是我有公理。而人有強權。我有強權。而人有私弊。其勢日夜相迫。而自外面觀之。渾然不知不覺。如水之伏流地中。迅疾湍急。一旦潰決。則人之進退存亡。自主之權。將悉付諸潮流。無存在之餘地。坐是以觀。則吾五百餘名職工。素號忠實。無聲無臭。惟恐得罪郵局者。至此欲求終身服務。而不可得。星火燎原。燕雀處堂。危哉岌岌乎不可以終日。吾雅不欲以挑撥之語。發爲過激之論。令芸芸一羣之人。頓起恐慌。驟趨於咎由自取之途。亦不過居安思危。先鞭可着。作當頭棒。警衆鐸耳。重爲言曰。物競天擇。適者生存。彼夫衣必選品。食必選味者。飲酒看花。鬥鷄走狗。馳馬角戲。六博蹋鞠。優哉游哉。聊以卒歲。不知一身由我而外。虎視眈眈。有深察我之不適焉者。從而易之。顛倒位置。攪亂文思。以他人之不適焉者。使底於適。而我遂以陷於困窮。而不免於退避三舍。今日淘汰一部份焉。明日又淘汰一部份焉。

淘汰純淨。獅睡始醒。亦相驚惕然曰。是不利於我也。然急起直追。一化今日之地位。而求可以與他人之適於天演者。並立不悖。是之謂磨磚作鏡。炊沙爲飯。可乎哉。噬臍無及矣。不徵諸遠。請言其近者。去歲上海一埠郵局辦公人員。因有不適於外境界之趨勢。被外來風潮所旋擊。日夜與之相奮鬪。而未管息。於是乎百數十安定泰山之忠實同志。竟誤涉人事淘汰勢力圈中。而莫可挽回。令其退休。試問此數十人之生活問題。何不幸而入於人事淘汰四字之旋渦。吾敢申言之曰。淘汰者。淘汰其人之對於學術上及工作上各有不得不淘汰之勢。是亦明明人爲之。實則自亡之也。於我不利。於人何尤。今日以前。百數十人心目中。何嘗計及己身之利害得失。今日與郵局有不能相安之不良結果。易地以觀。今日之已被裁人員。是猶今日未被裁人員。今日未被裁人員。亦即與今日之已被裁人員。將來竊恐同一命運。譬諸草木。其奈連番之狂風暴雨何。夫安得不懼。雖然。懼則懼也。何足以僥吾插足於天演界中。而無以生存之代價也。

欲勉圖存。厥有二端。學術工作。若能因知之而勉行之。雖千百人與我競。亦何患不勝。否則雖無人與我競。亦何恃而不敗。生命半入酣夢之中。前途已入泥犂之境矣。何也。百數十人進退問題。即百數十人以外任何人物。皆得胚胎於百數十人以內。而吞吐之也。不寧唯是。有自由新進者。亦即有自由裁退者。於數理上爲相等比例差。於事實上絕然不能規避者也。某不幸言而中。凡我郵務職工。亟宜整於前途。力求自強之道。幸毋儉安今日。取消進取之念。天下事不爲則已。爲則必要其成。志學圖工。雖不過適於實際上應盡之義務。然而不由此道以圖存。以自立。當此存亡絕續之交。天然淘汰。或人事淘汰。吾何必居一於此焉。夫安得不商榷一自強之道。進取之方。以相勸勉也。如云不以我言爲非也。則願共勉旃。其不然耶。則請更據鴻論而有以教我來。

上海郵政分局局員叙餐會宣言中華民國念二年

訪武夷之芳躅。因幔亭以並傳。慕文潞之高風。以香山而入選。故人風至。醉倒壺觴。名士惠臨。樂數晨夕。今雨舊雨。張說餅之筵。齊雲魯雲。款盡簪之席。甚或呼燈張宴。入宋家不曉之天。抑且飛騎傳賓。住段相鍊珍之館。足見公餘作樂。不殊南澗之歡。客裏消閒。有感東堂之會。况乎管鮑知己。應修公膳之儀。蘇賈同寅。且補賓廚之缺。雖非及時而行樂。何妨繼好以聯情。此上海郵政分局局員叙餐會之所由設也。自有此會。勿論職居郵員。雲龍角逐。身為局長。風馬睽違。一席縱談。彌篤金蘭之雅。四座生色。如見石渠之英。事關理亂之機。自見迎刃而解。論到交通之點。務各式讎以遊。分無高卑。情貫上下。故其合餐之相敬也。無偏無黨。相見以誠。然亦其酬之普遍焉。同德同心。外禦其侮。雖非盡風流韻事。本不同官樣文章。就郵論郵。不參外務。分局總局。具表同情。將見玫玉他山。不患知音之少。一年六月。正逢良會之多。從此交訂久要。大加利如期而至。倘勿心懷反對。各同志盍興乎來。

上海郵務職工會歡迎全國郵務職工代表蒞滬開會辭

中華民國二十一年

世運變遷。潮流鼓盪。攬萬人之工作。樹百世之本支。是以駕效前驅。創野界昌明之運。鞭爭先着。謀工人福利之庥。然而規模狃於一隅。拘墟者徒恃豹班之見。運用貴乎萬變。語小者難逃蠶測之譏。况乎時止時行。懼等刻舟之戒。一波一拂。時形破產之虞。此正劍隱於

城。牛斗之光正逼。玉投於水。虹霓之彩未飛。雖備歷多辛。終未臻上乘。理宜如鐘之待扣。錯之待攻。則送袍推衿。當屈身於附驥。集思廣益。將展步以登龍。訪我南村。千里速稽康之駕。作君東道。三年卜范式之期。所謂同心之歡。逾於骨肉。患難之益。等於弟昆。敢云近水樓臺。謬參宰執。緊維寥天雲樹。念切觀光也哉。此卽敝會同人極誠歡迎全國郵務職工會。代表諸君之總因也。

不負夙因。相逢盛會。莫問自南自北。親炙豐裁。庶幾同術同方。夤聆教益。好問則裕。專壹之奏毋庸。主善爲師。廣大之模獨勝。從此整頓會務。勗我以經濟文章。挽回郵權。教我以吁謨碩畫。一致對外。鋤非種而推倒強雄。衆軌並驅。矢赤心而揭開黑幕。畢竟苦岑契洽。宏敷教令之施。豈猶風雨飄搖。備歷崎嶇之險。管鮑稱爲合作。建今日事業之非常。針芥諉以相投。垂異時聲名於不朽。辨其正所以杜奇衰之路。敬其威所以戒佻僥之風。如此英多。問誰矜小忿而忘袍澤。是何年少。務各蠲私隙而勉枕戈。術妙同舟。祥呈合璧。俾夫庸絲恆帛。叨紉補袞之鉞。倘教並駕齊驅。藉展扶輪之力。將見羣材鼓鑄。御精心隨舊物以改觀。難得同志蒞臨。謹拜手合新春而獻頌。

中華民國二十年元旦新無錫報祝辭

古者容成造曆。承天祿而闡揚甲子之原。太簇建寅。頒國朔而修正歲時之始。是以其球奉贄。連青鎖以歡聯。燔燎升香。耀紫微而彩綉。識永肩一心之理。紀并珠囊。協敬用五事之宜。瑞昭玉燭。會見河鳩起化。魁頭貊耳之鄉。緊維巢鵠懷仁。沙度繩行之地。如演箕範。豈聖風哲煥而無垠。似鼓漢琴。信解慍阜財之有自。萬畝青葱之地。銀海花生。三宵朱火之

時。黃棉襖賜。僉云音調玉琯。無煩鑄鳳之工。機察璇衡。不假盤龍之費。舉千歲之日至。直欲以求其故步者。進而創興事之新聲。溯百世之春王。縱見夫勒爲成書者。起而革累朝之舊制。自非涵濡厚德。紀其元而世風以移。詎易備極休明。造乎天而歲功告成也。我中華民國。祀夏配天。順天立極。斗杓以中央作柄。運動如神。陰陽之專精爲時。拱奉有華。履端正始。不隨夏商周循建寅建子建丑以稽年。乘勢待時。不分上中下法民族民權民生而定國。亟宜刷新政治。頒作訛成易之經。順應潮流。革仲叔義和之習。則見夫陽和布令。正同志功成革命之時。陽朔調元。恰新歲行慶弱冠之候。自不勞於銀箭。儼天甲以歆神。亦無假於靈台。偶地丁而稟韻。始知易以曆原爲革新之運。倡貽則於來今。定於一尤爲齊政之方。傲遺風於往古。其括乎乾象也。三六六以紀星躔。德配昊天。貫中西兮合律。其攝乎地軸也。四萬萬無間方里。春回大地。融黃白而交縈。豈止北纏冰天。東熯日浴。西輝元圃。南揚丹崖。胥納布和於象魏。抑且賢能在位。商旅載途。百工來歸。三農告慰。共沐雨化於春臺。相率害馬之羣。非其種卽鋤而去。獨占羣龍之首。簡厥良俾率以行。從此匪勢寢衰。盜風日熄。下士鮮囂塵之宅。不聞呼盧喝雉之羣。至人有安樂之窩。不染吸英餐霞之癖。千秋韋布。提倡節儉高風。三月烟花。打破繁華惡夢。現莊嚴於世界。今爲其時。略爛熳之春光。云胡不祝。

祝曰。中華民國。盛德在民。歲在辛亥。國步更新。維新原則。民族革命。興漢排滿。順時立政。廿年以前。皇王嬪雉。武昌起義。共和首功。廿年以內。蕭牆啓釁。軍閥逞強。使驕且吝。惟利是圖。擾亂東南。民窮財盡。國何以堪。今屆廿年。南北統一。歲律一易。光天化日。念年以後。陰合陽開。芸芸者衆。共登春臺。天演公例。適者競存。民國萬歲。以子以孫。

中華民國二十二年正朔上海報祝詞

溯自辛亥歲闌。壬子春曉。玉衡齊政。銅管推辰。改舊制於景初。啓新韶於歲首。筦陰闔陽開之關鍵。陋宗周行夏之準繩。卽渾天以合蓋天。何中西之異趣。舍平朔而用定朔。旣眺矚之無虞。是以化日舒長。履端正始。順天求合。歲序無差。豈僅家家。順陽德而成蒙煦。思。抑亦歲歲。布陽和而俯仰雍熙之洽也。不意景運乖常。愈變愈厲。庶徵易吉。愈厲愈奇。回憶辛未占春。中外共慶安瀾之澄碧。詎知壬申獻歲。東南頓失朗鏡之澄清也。爰紀舊聞。播爲新詠。常斯時也。天陰雨濕。臘盡春回。爆竹失聲。桃符減色。問誰探江南梅柳。幕爾起海上烟雲。緬彼東鄰。擾我華胄。羽書日迫。旌旆雲屯。半夜踰溝。一鼓作氣。先聲雷動。閃天王壓陣之旗。迅羽星馳。行島寇衝鋒之令。一時吹銅起旅。浴鏡驅羣。長鞭指而兵士驕。決一戰而歌凱旋之樂。飛艇走而神鬼泣。擅六奇以張撻伐之威。揮龍雀刀。布鶴鵝陣。任其跳梁肆逆。仗茲必勝之師。是誰策馬遄征。共仰其蘇之后。迺有蔡軍長廷楷者。龍豹韜嫻。麒麟望重。忽傳將令。三軍皆捲甲而趨。促整戎裝。萬馬悉銜枚而出。搗其要隘。攻厥渠酋。連營爭火樹之光。但聽鷹揚選勝。大敵登冰輪而逸。縱教獍惡聲誅。蓋敵軍之勢如鷄。而上將之強如鶴也。然而功高一戰。竟成尙武之雄。可惜節屆上元。都是不祥之兆。迄今旌麾如故。劍氣尙存。快滅虜不待崇朝。仇戴天有如此日。一年容易。又屆猖夏戰期。萬衆歡呼。纔算平蠻慶節。壬申之耗音旣去。癸酉之喜氣猶來。故爆竹迎新。更兼梅花而寫韻。桃符換舊。還同柏酒以迎年。但願卜歲豐而鏡砥觀成。紓國難而搗槍掃迹。景神州之日月。宜重曜而永慶新陽。靖溷濁之風雲。破宿陰而宏開首祚。是爲祝。

爲陶拱辰贈諸竹生醫師題畫

歲在壬申。時維炎暑。赤帝司權之候。嚴君抱病之初。攝生有愆。獨苛無術。兼旬轉劇。按其脈而寒熱雜陳。終日垂危。盡於背而血膿胥併。雖未告苟瘍之險象。幾深入范疽之難關。誰則觸手生春。折肱奏技。乃幸遇同鄉隱士。一國名醫。道訪涪翁。親授懷中之祕。學宗岐伯。妙傳肘後之珍。金刀剖而痕圓。治殲徽素。銀鉢盛而氣馥。效奏鉛黃。於是憂解探薪。喜占勿藥。徵其治案。得懸壺三世之會通。考其經方。操蓄艾十全之青箴。始知恩承碧海。良藥尤貴良師。還望德種青山。壽人並聞壽世。愧無圖報。謬撰金門玉笈之藻詞。藉以獻酬。敬謝藥石刀圭之仁術。

匡村學校二十五週紀念中華民國二十年

考諸嶰谷遺風。弇州盛事。銅符按部。參旗井絡之鄉。石室談經。雅雨黎煙之畔。岷蛾遠服。知廣武之難馴。揚馬先聲。實化民之利導。是故漢隆觀聽。隋集試書。魏文之幸學偶傳。梁武之臨雍僅見。靖花門之鯨浪。銷葱嶺之狼弧。繼自今翠柱絳虹。都是文采風流之助。桃花零雨。莫非暮春和煦之時。二千年虎落蛇鄉。不逢瘴雨。十萬戶巴歌渝舞。共沐春風。甚至三物與能。刀布奉先生之贊。三農不害。黨庠修弟子之文。時而負笈從遊。揖讓乎鄉賢鄉老。或則擔簦向學。趨承乎鄉約鄉規。以視夫疎窗下董子之帷。蕉天掩綠。煥館開馬融之帳。榴火蒸紅。尤有甚焉。蔑以加矣。始知禮讓修而閭閻觀德化。遊鄉校者如親玉帛於塗山。

禮社設而里巷息囂風。登州序者恍接冠裳乎景毫。此一鄉文教之所以推行。而一代風化之所由考覈也。吾鄉匡仲謀先生。學具淵源。志希賢聖。發言循循有序。舉趾抑抑其儀。備催科撫字之能。論說禮敦詩之雅。洞鑒夫有窮奸命。夏祚凌夷。而武羅伯英。奇傑猶挺生乎草野。鳩方終古。賢豪更開出乎鄉閭。一旦創宏規。總師猶率陳常之舊。千秋樹成憲。造士實爲正德之規。常於民國五年前。稟承 太夫人。慨捐私貲。知學校之須闢重地。蔚成大器。識鄉黨之不乏名篋。於是校設於村。迂龍門之膏雨。學兼乎校。懸麟閣之春燈。其始也東帶而前。幾見同行二三子。因材而教。何來廣廈千萬間。然而連袂風馳。士子盡東南之選。登壇雨化。師儒萃吳越之英。匡先生功勳後生。睹秀髦之鼓篋。望重先輩。延耆舊於搢紳。其繼也廣闢高齋。三齋吹頌。皆入小學。兩等齊名。自知作人之景旣公，理自推之彌廣。興學之典旣重。道固無所不包。勤功蛾術。克嫻禮樂於春秋。學等鳥飛。兼習語言於冬夏。正不獨事徵風雅。賦傳壬戌之秋。道近虛無。寂守庚申之夜。初不料匡氏私校。竟大被天下名士也。然而匡先生心猶以爲未足。興更甚於從前。其終也三最頻移。六條旣定。人稱師項。人共推袁。羅碩彥於蘇湖。中學首倡初級。播令名於惠麓。故鄉豔說元功。宜其有范純仁之直溫。條理不紊。乃可得錢公輔之簡諒。步趨是從。故擢秀簡奇。光擁門前之雪。紆青拖紫。氣凌台上之雲。今日走馬人來。好詠滿城桃李。他年登龍價重。都成入室芝蘭。是以校有頌聲。村無異議。恰近行年半甲。羣起頌德歌功。寄語畢業青年。還望顧名思義。

黃朔泉六十壽言中華民國念一年

中華民國肇造二十一禩。歲十月。嶺梅獻瑞。酈菊餐英。氣馥春融。祥占晨正。連重九之令

節。過雙十之良辰。適於是月。爲朔泉先生六壽初度。先期令嗣公復昆仲褒詠所撰徵文啓。本孝子事親。欣老人得歲。將以稱觴滬寓。舞綵朱門。合日下之名流。奏天邊之吉語。禮也。緒承文瀾雖涸。山斗久欽。隕祉懽禎。愧乏晉卿之善禱。頤頤駢典。願貢周史之頌言。翳維先生。氣秉聰夷。幼挺穎異。髫齡起鶴。鱗歲騰芳。允推麟鳳英姿。早具珪璋重器。龍山鳴玉。百年文獻之家。雀館開祥。累葉典型之彥。名蜚越水。掄才不讓於張華。望重申江。立品毋慚乎劉勰。宜其英雄入彀。穆如共坐春風。桃李盈門。可愛適逢冬日。此先生之品學。然而學古入官之日。正新政厲行之年。考古所以證今。誠中貴乎形外。遂棄舉業。應順潮流。立志東遊。首習致知格物。潛心西學。旁參法律專科。雅懷十丈之纓。竊慕萬人之敵。於是心懷革命。會入同盟。與諸先烈焯掌習勤。闡興亡有責之旨。大丈夫超距課力。非恬謨自逸之時。爲望廉泉讓水之鄉。所願惟思歸去。不作奪利爭名之想。此心可質神明。此先生之制行。然而斯文將喪。我武維揚。慕班超投筆之風。學終軍棄繻之志。况乎國步改造。邦基更新。將倚頗收爲長城。遂使甘陳爲都護。辦理鄉政。慎重圍防。塵雨雪乎集霰之初。惕燎原於委灰之日。粉榆無恙。鷄犬不驚。此先生之武功。然而一鄉爲善士。一邑爲聞人。小展經綸。雖云割雞之始步。大抒抱負。終屬薦鶡之先聲。以三冬積學之資。作一鳴驚人。其始也龍被國務總理孫寶琦。引禰超爲入幕賓。授以知事頭銜。其繼也荷承山東省長屈映光。擁王綯爲座上客。委以警廳職責。銓揮所指。憚道濟之雄威。籌畫是從。仰陳湯之勝算。縱江浙爲毗連之境。而滬杭尤衝要之區。一時狐鼠銷聲。萑苻絕跡矣。此先生之文治。然而澄心似水。得寵不驕。與物爲春。無思不服。光展騏驎之步。終非鸞鳳之棲。借箸代謀。執若操觚自試。爲人作嫁。何如顧己尋涯。從此舍彼宦途。安其儒素。訪愚公之谷。勝地匪遙。橫寧子之經。遺書足法。橫瞰遼陽毒霧。海嘯鯨波。驚聽歇浦寒潮。江鳴鼙鼓。而况九族侍以舉

火。三朋賴以解衣。賑澤鴻而露酒春。清溜蠶則霜行秋。魯連浩氣。子產遺風。老安少懷。途歌里詠。蓋亦有焉。此先生之恩威並用。然而秉碩德者必獲修齡。積善行者每享厚報。况夫才晤明辨。進資黨部之譽。樹種善隄。造爲鄉里之望。是宜天開壽宇。地啓宏圖。錄賜長生。鳳吐泥金之帖。篋探祕算。螭盤玉策之文。日月展重光。鏡芙蓉滿。風霜勵節操。籬菊晚香。豈惟花甲才輪。堂上之金星有耀。抑且林壬稱慶。階前之玉樹增輝。此先生之福壽無疆。緒承積壘情殷。願言酌醴。躋堂力阻。喜效呼嵩。不辭蠶測管窺。爰舉嘉懿大略。播爲新咏。禱茲壽言。謹序。

序珠算易通

人第知周髀爲算書之祖。九數爲道藝之一。而不知珠算一科。原始筆算。取法籌算。謂爲九教用模實驗之捷徑可。周髀津逮初學之與梁亦可。精而用之。可利天下。淺而用之。可便民間。秦漢以還。其術盛行於宋。有若珠盤集。走盤集。所刊皆在元禮紹興間。意者村僻之法。變而珠盤。其昉斯時歟。非也。考古甄鸞周髀注。則北齊已有行之者矣。其用法先後略同。如同量衡。通貨食。便營作。靡不賴之。以爲統紀。後世不察。目爲小技。學士文人竟無有視爲重要有益者。有之。亦不過對於成見。傳其法而罔申其解習。安得推陳出新。而與世人廣求善法之良會也。吾友鄧子欣廉有鑒及此。爰舉囊時所輯珠算易通一書。重加校刊。補其缺遺。正其謬訛。增其註解。更添作比例新法。存支利息算法。及開方說明圖等。從俗所便。概用珠盤。如學者致取而習之。雖無閱歷之講師。自能不求甚解。詢毋愧爲一完善之珠算教科書也。書成。見眎。余函賞之。丐余序。然余亦研求此中三昧者。遂書此報之。

民國二十有一年馮煥緒承序於上海界路郵局

元日祝新無錫報中華民國十九年

將欲恃武力統一而奠家國於磐石兮。何以導世界於和平。今欲偃武修文。納四萬萬民衆。疾趨於軌物之中兮。不可不闡揚文化。增進二十世紀之文明。自歐而墨而亞。滾滾新思潮。打破一般冬烘頭腦兮。咄咄自由言論。愈競愈劇。愈接愈厲。有志事竟成。鼓吹文明之導線。擴張言論之利器兮。曰惟有救國救民。民鐸宣傳。傳出言論界破天荒之第一聲。始則一省一縣。發言爲論。闢蕪說之支離兮。終且一鄉一邑。人皆被化。焉有羣起泯泯莽莽之詛盟。移風易俗兮。莫之與京。箴昧矜愚兮。民無能名。試從何處得其鴻祕。爲我腦球意界。爭倡大革命兮。距滬派三百里。梁鴻一水。爲故鄉報界之大本營。大本營兮。精益求精。亞州大陸有一士兮。自名楚孫。揚其姓兮。筆妙生花。名震桑梓。善假而作不平之鳴。讀其文如聆晨鐘。歌其詞如傳宵柝。考其論如播鞀鼓而交錯。誦其詩如蘊冰玉之雙清。頌逼茅簷兮。千鈞一髮。力肩斯民擔荷之匪輕。一紙喧傳奏大同兮。文人學子。蔚爲後起之羣英。商欲藏於市。旅欲出於塗兮。如金就冶。如草向風。而各當其情。工人讀之而生面別開。農民閱之而過目不忘兮。靡不鼓之舞之以盡神。紙貴洛陽兮。四海風行。風行一時兮。舟車所至。無人不道歡迎。果何修而得此兮。迺前鋒首冠以楊義。後勁重期夫逸少。各顯身手。一幕幕逸趣橫生。博得鼓掌叫好不絕於耳兮。明年今日。長此不更。

中華民國二十一年元旦上海報祝辭

嘗思一年之計在於春。辛未獻歲。天災人禍。相逼而來。於是時也。愆陽有咎。洪潦爲災。俯瞰奔流。天外之三峯削翠。危攀巨紐。雲邊之一線流黃。徒知拯救之勞。不念隄防之預。春波桃葉。紅渾雪練千層。秋沚蘋花。黑暗風潮一片。豈等紅羊歷劫。壁雖亦以何妨。居然朱鳥招魂。燐常青而不滅。泣空懸釜。輿懷禾黍之思。難徒渡船。舉目關河之感。其水患有如此者。不第此也。東省選兵。北方多事。清帝復辟。小醜示威。一矢無前。氣餒將軍之幕。三軍不發。魂銷主帥之營。國步孔艱。寇氛甚惡。長驅直搗。匪徒執牛耳以登壇。不法橫行。勢且逞狼心而問鼎。如此得寸進尺。滅中原誓不崇朝。爾其引退圖功。看老將壽長百歲。始於陸幾終於戰。爲二國反長其讐。功之首亦罪之魁。此一人實受之竝。其兵災又何如耶。然而今匪昔比。境與時遷。彌天之毒霧全消。大地之陽光普照。一心一德。誰操同室之戈。毋詐毋虞。咸登春臺之樂。增進民福。除橫暴之征求。闡揚國威。寓和平於懲治。用知必去其詐。彰厥有常。舉人不以其言。錯惟諸枉。外交不守祕密。財政務求公開。翹首見青天。揭開千重黑幕。存心保赤子。超度四億黃魂。救國首在救民。何食稅衣租之足道。善政貴乎善教。曾包舉囊括之未能。浩浩乎一氣瀾綸。蓬蓬乎三陽開泰。竟有東皇讓步。犬大臣甘拜下風。北陸回春。馬上將首屈一指。奚煩干涉內政。誤信西歐會議之辭。豈猶傾仰外交。侈談中國救亡之策。又何見揚之彭鮑。竟之灑沮。徐之淮沂。奇災不減夫去年。英之西藏。法之安南。日之瀋陽。烈禍復見於今日哉。是爲祝。

浙江流通圖書館開幕頌詞

翳教育兮普及。仗肆書之雜陳。倡文化之宣傳。惟名儒之該綜。不見夫撥亂反正。實坐籌於

翰墨之場。化莠爲良。非利用夫桁楊之地。仲淹能文而矯陋俗。永叔慕古以挽頹風。擷六籍之膏腴。抽百家之扇祕。顯而爲飛潛動植。融而爲風雨雷霆。衍而爲聲色臭味。錯而爲寒暑往來。斯誠足以彰治化之休明。作太平之鼓吹。凡此之類。皆藉乎書。書之爲用大矣哉。適有陳君獨醒者。武林秀士。文苑通人。撮序目於羣書。乘風雲之際會。含辛茹苦。直窮二酉之儲。領異標新。不讓六丁之取。將欲攬萬人之英傑。啓百越之文明。揭來網底珊瑚。譬航海而有得。探到籠中參朮。儼跬山以同參。雖非丹楨之居。部分爲四。的是紅梁之屋。篋實盈千。彙作成編。多少魚龍入化。命爲雜俎。百千子弟聞風。姑勿論剛日觀史。柔日讀經。不啻純儒之勵志。子夜吟詩。丙夜作賦。直擬學士之談心。既吸引而流通。問何人未親染指。更正名而改組。願大衆相率觀光。生面別開。成績卓著。是可與北平圖書館。南都圖書館。各自流芬。並垂不朽也。（代郵務總工會撰）

中華民國十九年一月一日祝錫報

粵自懸鞮設鐸。周咨相率以靡遺。仗馬寒蟬。靖獻毋虞於弗勝。順從遜義。綜五品而釐工。廣徵羣言。奉三無而敷布。故抗論時事。名儒時作苦口之箴。挽回世風。正士不憚竭情之語。任合聽與分聽。求治端賴乎糾繩。使先知覺後知。進言或戒乎假滿。途分邪正。納芸生於軌物之中。化啓文明。闢蕪說於荒誕以外。從知化民成俗。觀風貴協乎時宜。振墮發聵。施教必衷乎至理。今古其揆一也。小大無不由之。吾鄉錫報主幹吳觀蠡先生。才固無雙。傑推第一。迺操觚之士。爲慕古之英。羅胸次之星雲。幻毫端之風雨。鑒夫沈民舊染。不尙陳書痛哭之文。救國新猷。而在坐論從容之際。用是書時書事。柔其性而不遜不親。正己正人。

導其性而以南以雅。一心之褒貶。恍見白日青天。十斛之駢聯。可使驚神泣鬼。惟哲能悟。匪靈弗瑩。翹首而見惠麓青峯。下筆皆更新氣象。矢口而稱報界泰斗。取材尙革命精神。豈僅考辭務工。謂魚桐之未中。抑亦立論好異。類牛鐸之徒鳴。此其明試雄文。公開隸筆。時而發言爲論。大聲與切響相宣。偶或寓莊於諧。妙著與清裁並暢。揜撫利病。劉季緒容有當焉。咳唾珠璣。徐偉長非其選矣。(下略)

民國二十三年元旦新無錫報箴言

溯自辛亥秋高。壬子春曉。履端獻瑞。凡百更新。玉燭調時。正朔適符乎陽歷。璇衡秉政。中樞改建夫南都。一時民氣發揚。國基鞏固。無間東西南北。尊國歷而廢夏正之建寅。勿論士農工商。沐陽和而上春臺之雅頌。曾紀節占雙十。忽傳年屆二三。顧何以國計民生。絕無樂以忘憂之狀態。內訌外侮。大有朝不保暮之情形。事在人爲。今非昔比。究其癥結。爰有箴言。其或天時有所不信。而陽奉陰違。一至於斯乎。不然。治歷明時。革命首推湯武。順天應運。疇咨乃命義和。况乎律轉金樞。膺圖者紹星輝雲爛以招揭。量裁鐵尺。握符者準大餘七建之衡平。所以四教立。四術崇。統教術而仍分條析。義炳修。禮柄握。合禮義而時切格思。明知禍福無常。而彰往察來。驗天經之弗爽。妖祥並察。而占星測鏡。示天紀之無遠。此順天者之可憑。而相時者之无咎也。試由天時。進觀地利。豈其地利有所不講。而墮都夷縣。以至於斯乎。不然。四岳三塗。撫煥區而矜遠略。方城漢水。扼要塞以逞雄圖。故天慝可憑。山有太行居庸之固。上游可據。水有九河滄溟之雄。雖敵焰孔張。劍閣道中。必難深入。匪氛寢熾。洞庭湖裏。除是飛來。况乎左滄海而右函關。外黃淮而內遼海。向之蕩

我邊陲者。今則我保疆土也。彼之坐失其地者。此則安享其利也。然而形勢可強又可弱。性情可合亦可睽。夫乃人事有所不脩。而衆叛親離。竟至於斯乎。不然。朱干玉戚。屢司笠戟於元戎。青犢赤眉。淨掃檣槍於邊徼。故管仲匡主。懷遠是先。子產養民。濟人爲急。或減賦稅。以蘇重征。或勸農桑。以謀樂利。或宏施織績。俾負墮曝日之同溫。或拯救災區。慰水耕火熟之失所。既順民意。又洽輿情。鶴不好而何怨乘軒。鳩不歌而自能敵愾。惟此張四維而協五紀。藉以收南征北伐之功。孚心腹而固爪牙。自足奠長治久安之策。要知一隅坐擁。固貴管籥司儼。而衆意來歸。要在金鍾惠愷也。所願秉國者。勿以祝詞爲恭賀年禧之資料。常以箴言爲維護國事之規諫也可。

求新百貨商場一週紀念中華民國十八年

古者餘粟餘布。國民訂貿易之方針。曰賈曰商。國產鍾行銷之機會。太初之始。沖漠無朕。成象以來。分巡作則。過五都而權百貨。入其肆者競賞多多。操平準而辨訛認。充斯職者。考書上上。誰則錙銖悉較。廁身三徙之鄉。子母相權。混迹十賚之地。乃世風凌替。交易難徵王道之全。人事變遷。品流別具主名之屬。一自夤緣巧捷。疾效驟升。囊括取盈。貪同狼顧。於是巨商擁資山積。縱示人以樸實而莫可窺尋。大賈龍斷居奇。卽見其一發表而易於消散矣。可知人心之美惡。商業之盈衰繫焉。若張子靜盦。殫見洽聞。多文廣識。論其品性。自不同巧於依附者。徑竇其行。谿壑其心。本持籌於城市。復不若善於攀濟者。辱則泥塗。尊則城社。工巧宦於風塵。蓋其智擬居陶。人同端木。務求利者使阜。害者使亡。靖一閩之衆。正其列肆。出其制度。裕百產之源。整南國衣冠。知經營之足恃。掌北門鎖鑰。徵成見

之獨操。斟酌至精。選品胥求國貨。珍奇畢集。取材不尚歐風。象詎從同。制原示別。非第羽毛齒革。齊淮海之名。漆絲織文。擅兗州之美。則見其取之不竭也。蓋南有竹箭。北有文皮。西有琅玕。東有珣琪。樂瞻則行人交集。又見其用之無虧也。若雍之球琳。豫之絺綌。梁之膠鐵。徐之織縞。爭購而雇客資臨。甚且畫印彫薪。挫針播筴。統御乎裁成輔相而不揜其珍。貢云三品。取飭六材。隱權夫有無化居而莫名其實。萃兩間之所有。供萬衆之急需。毋論杖倚華顛。衣牽穉齒。不憚煩於載道。相糾合以參觀。備極歡迎。毋煩厲禁。由是秦陽業振。響應梓桑。范蠡功成。名震寰宇。寒暑兩閱。如聞向若之歡聲。紀念一週。詎耀趨時之藻飾。慶觀光於冬日。冠裳瞻四國之尊。潮易事於通儒。德業臻千秋之盛。

三樂學校五週紀念

溯自洪荒市閭以還。運會默啓文明之漸。絳洞既平而後。逸居常開淫縱之端。故庠設於黨。序設於州。學設於國。校設於鄉。藉以導民。兼以聽政焉。嘗見夫槐布生徒。五教正五方之治。檀橋士子。一人成一道之風。舉世升降污隆。觀風與械。樸菁莪爲維繫。斯人秀良推魯。化澤本比閭百族所裁成。養於初則闕黨互鄉。叶笙鏞於講席。端其本則田夫野老。普觀聽於圍橋。無何世風日下。文教失修。學爲我者有人。學兼愛者有人。學術偶遭墜地。鄉人之毀鄉校。子矜之慨鄉校。校風或歎遺墟。遂令上舍下舍。秀者昭質易虧。目斷車旂顏色。大成小成。頽者澆風益熾。神傷鐘鼓聲靈。雖有鄉學而門戶之教不開。禮樂之教不講。子弟苦負笈之跋涉。師儒勞秉鐸之周遊。是以灑東灑西。誰是薰陶之所。道南道北。何來講習之區。乃有同鄉王立齋先生。博學流聲。觀鄉而知王道。著書垂範。求我以重童蒙。不愧名察區

周。珥筆簪毫之士。力窮登頓。懷鉛握槩之流。故其義重衡嵩。恩周里黨。財輕籩粟。惠遍閭閻。少者可懷。共沐作人之化。後生可畏。同沾造士之規。緬彼春風。一路陰成桃李。愛此冬日。千秋譽著粉榆。是以知興學所以培植人才。設校亦以維持國脈。上則昭三代人倫之治。下以肇一統民國之庥。宜其廣播令聞。校名三樂。昭垂成績。紀念五週。緒承文字久疏。謬效古人贈言之例。香心私淑。聊伸不佞晉祝之詞。

代擬安定胡雪颿先生建支祠古花樓行逝世十週紀念頌詞

夫承先繼志。一門衍堂構之傳。紹緒妥靈。百世操箕裘之券。故塗山有啟。敬承文命之勳。毫邑惟湯。送紹司徒之績。既任貽謀於燕翼。易曰令子克家。並綿世澤於象賢。詩云曾孫有道。此皆節羹則粥。昭格可觀萃煥之通。孝笏慈烏。獻酬不隔形聲之近。四方則型仁觀禮。遞暢宗風。九旅而對席調絃。更新世祚。固不僅築謝眺之宅。人說青山。過裴度之莊。自名綠野而已哉。若安定胡雪颿先生者。攸足取焉。誠其選矣。厥德聿修。敬承先志。成式惟又。光啓後人。既建支祠以顯親。復築花樓而見志。况乎范文施與。高誼而創義田。劉侯育才。熱心而興公學。經營有法。廉潔可風。造士情殷。鄉里絃歌不絕。濟人念切。農田河水皆通。非無白草青燐。誰辦蔣侯之骨。更見栽花種竹。共欽陶令之風。先生之心仁矣。先生之興高矣。哲嗣師王昆季。矢續承於一代。原不侈丹楹刻楮之觀。隆將享於四時。最難忘霜降露濡之候。黃花晚節。樓不同乎蔬香。白雪陽春。園或擬於甘露。某荷蒙連襟。愧無俚鼎之銘。縱筆搗詞。聊作勒碑之頌。看今日禮成三獻。登臨歎締造之壯觀。卜他年壽乞千秋。植表旌孝思之悱惻。

爲無錫世界書局撰同豐參藥行七十週紀念頌詞民國十八年

維中華民國十八年。六月五日。爲吾邑同豐參藥實行。舉行七十週紀念。敝局同人躬逢盛典。謹致詞以伸其祝曰。竊維權輿百艸。赭鞭啓淋漓之方。鍥刺九名。丹竈傳華映之訣。遂見杏林董奉。潛心吹咀經營。橘井蘇耽。着手刀圭效用。一時剗犀剝麝。要皆洞府靈笈。瓜幕樸荒。悉是名山大藥。豈知年荒視同陳迹。不師帝軒臣意之經。日久純盜虛聲。誰識精製度修之術。故七元詭歷。富蓄程羅。一現優曇。經虛甲乙。然而道以元世者。功回造化。何庸絳雪丹霜。業以壽人者。品貴君臣。別有銀丸金液。精能自詡。勝麝臍一點之香。菴變成知。遜犀角三分之苦。初馳譽於鍊石。受各界歡迎。繼奏技於灌瓶。備四方採用。真是神香辟惡。五岳齊看。謂非靈液流春。三年奪目。銀鉢盛而氣馥。甘和配以蟾蘇。金刀剖而痕圓。柔滑調乎獮髓。有誰鵠山可仰。朋儕每讓夷吾。魚腹先將。婦孺咸知康伯。愧煞細商短販。立心不欺。壓倒猥業瓌工。市價不貳。不羨王陽之術。克循軒后之威。故盛業千秋。達古稀年華而上。雄心一世。擅同行創著之先。看今日嘉禮叨延。備極談歡之洽。愧敝局蕪詞謹獻。聊伸慶祝之忱。

雙十節之雙十祝辭中華民國二十三年十月十日

蓋聞六齣雙牙。慶甘棠而臥轍。五關十口。歌喬木以稱觥。妙同點石之靈。雙流演漾。饒有拈花之意。十索名題。所欣迅掃槐槍。彫玉詠雙聯之句。好是清談風月。揮毫吟十步之詩。

不歌瓠子於秋風。雙方讓步。爲寫芙蓉之春色。十里言情。撈架底之雙榭。別詫於閨之玉。撒樓前之十斛。相映衛尉之珠。鏡亦夾雙。列瑤窗而送煥。錢可當十。孕蘭碗而生姿。漫誇泛水之舟。如見雙星初渡。直踏遊山之屐。敢云十載重來。想從衡嶽迴文。寫月而雙鉤特異。欲喚滄溟作硯。偃波而十字被分。是故以勅爲良。雙飛陋倡隨之舊習。惟柔斯美。十室聞忠信之箴言。甚或合莖雙歧。地寶名曰嘉穀。抑且五風十雨。天瑞實維醴泉。取絃歌以作鏡歌。聽雙聲之讀曲。本家政以籌戎政。定十駕之能追。况乎目可成雙。來寫伯陽之卷。日當倍十。去排興嗣之文。既斗酒。又雙柑。花間月映。曰小春。逢十月。嶺上梅開。鄴下雙丁。先推敬禮。滬濱十里。各表賀忱。想見士也者。運筆成輪。快視雙輪之勢。農也者。登穀日稔。爰與十稔之歌。暨夫工也者。改錯而備成規。矜絕無雙之技。商也者。居奇不圖厚利。忍拋獲十之思。他如隱逸者。垂釣千年。雙髻印來鑿鑿。顯宦者。退避三舍。十笏打倒紛紛。由是國步飛騰。健比雙丸之日月。人材傑出。貴如十斛之珠璣。遂乃立五則而重鑄雙模。促新生命以矯正薄俗。張四維而退修十禩。崇舊禮教以挽回澆風。豈徒如駿不雙馳。車不雙行。儼然華闕之雙立。於以見堯之十瑞。周之十亂。純異瑣基之十成。所謂疊疊雙雙。蓬蓬乎春生處處。但願五五十十。欣欣者國慶年年。是爲祝。

賦得十月十日中華民國二十一年以革命尙未成功爲韻

序屆孟冬。時維良月。北陸初行。東皇未謁。知令節之可欽。覺良辰之非昔。看芙蓉江上。轉瞬凋零。聽絃管聲中。驚心消歇。人有偏黨之傷。國無籌安之策。是真壬申獻歲。隨在無臭無聲。不類辛亥迎秋。凡事應興應革。迴憶專制推翻。共和戰勝。滿天則毒霧全消。大地

則妖氛早淨。域開仁壽。士多賜箸之賢。戶祝昇平。吏有飲冰之行。化宇同游。安瀾永慶。崇拜三民主義。我同胞誰不傾心。恭讀總理訓言。余小子敢不聽命。乃若意志乖違。氣焰高漲。地稱雄暫。各捲土以誇威。公報私仇。漫閱牆而對仗。聲樹黨援。開倖進之風。怒起政潮。著分崩之象。甚或挾金潛逃。相率出洋爲尙。征取貨捐。統作軍費。嬰粟復燃死灰。香烟飽膏滋味。賭博成風。歌舞遍地。遐邇應以同聲。上下咸以一氣。顛倒內政。意見太深。淺就外交。根本何濟。遂致朔漠啓釁。恰逢九日登高。從此東省送終。端在去年辛未。烽烟蔽野。風雨滿城。一軍不發。四海皆驚。問誰抵抗。師望風而欲遁。甘自退讓。將無令而不行。寇已深矣。奈若何。人稱萬夫莫敵。計安出乎勢將下。我謂一事無成。國難未已。國慶何從。阻斷金融。貽害直接乎商學。減少生活。遭殃旁及夫農工。正各要人嘗胆臥薪之日。亦老百姓執言仗義之中。看如此荆棘縱橫。中原恐其多事。問者番河山變化。畢竟是誰之功。

序風塵游俠傳

緬維演義造端。蘇鷄抗衝千禩。傳奇發軔。裴鋼鼓吹一時。石大夫紀事存真。價重九百。淮南子助經別贖。紙貴八千。昌黎炫奇。歐陽稱快。雖云副墨。皆古人覺世之車。縱說稗乘。亦儒者厲民之鐸。然而稽生艸木。未窺半豹之斑。范師虞衡。難識金牛之體。祇供淺人噓噓。不審大雅樊籬。甚或曲學披猖。謬附虞初小說。行文詭激。侈談漢紀部居。是真顛倒曬黃。卑無高論。清混駢白。降而益下者矣。風塵游俠傳者。吾鄉周子靜嘯名山寫定之作。說苑傳誦之祕也。想其秉筆茗邊。玉屑自成光焰。染毫燈下。卮言悉是奇聞。聚終歲之精神。寫盡風塵現狀。分片時之暇晷。著成游俠真傳。別創先天。抗金嶽以流爽。悉更後定。俯玉淵而

究奇。倡爲鴟張狼顧之談。濟其雉鷲腐鼠之嚇。綠林艸澤。文章燦虞筆之花。青管風流。咳唾炫莊襟之寶。論其譎怪。則康回傾地。夷羿彈日。盡入彀中。示以諷規。則紂譏昌彼。澆傷隕顛。尤其意外。有如笛中楊柳。無關綺思。奚啻江上芙蓉。不假俗豔。洵乎言貴有物。語必驚人。可與古時太史公游俠傳。文信國正氣歌。比肩媲美。今世琴南翁髯刺客。不肖生俠義傳。同日而語矣。

做壽集論孟成語作八股文起講

必得其壽。吾未之聞也。夫仁者壽。不仁者。未足與議也。他人有心。於我何加焉。嘗聞歿壽不貳。修身以俟之。存其性。養其心。所以立命也。今也不然。好貨財。私妻子。縱耳目之欲。口體之俸。其設心以爲不若是。則不能安其身。此之謂不知務。所謂修身。在正其心。養心莫善於寡欲。故苟得其養。生乎今之世。歷年多。其有不存焉者寡矣。南人有言曰。不揣其本。而齊其末。如之何則可。

民國二十四年一月一日祝辭

河山奠定之秋。干支遞嬗之候。星移物換。目擊新年。臘盡春回。躬逢元旦。筦陰闔陽開之關鍵。揚青天白日之旗麾。率土臙歡。普天稱慶。是宜乘時宣化。息民俗之紛爭。盡物推誠。挽世風之披靡。所以化功術妙。活尚新生。望治情殷。端本舊制。取消南征北伐。一統抱樂觀之可能。談到福國利民。四維誠圖治之必要也。吾乃先言夫禮。禮也者。順天之道。因地

之宜。治國之經。齊家之本。所謂非禮勿行者。亦無禮則僞也。太古風高渾噩。略文字而相見天真。後世習尚澆漓。弛義理而侈談聲氣。遂致禮文墮落。禮典凌夷。往記春朝夏宗。東巡北會。學士聲華自詡。行儀反後乎人。商民邊幅不修。數典竟忘其祖。工也衣冠見褻。農亦舉止亂真。設或就養無方。自必貽誤大局。其何以挽回風俗。矯正世情。乃爲人上者。夙夜焦勞。訓喬野以詩書之氣。歲時勤動。牖桀黠以孝弟之忱。姑勿論禮在省方。歌謠共聽。禮在鄉射。和協可風。卽推之喪祭冠昏。結社集會。無一不由於一人之矩矱。以束萬衆之官骸。然而同軌物於車書。要亦協方圓於盂水也。所謂義也。原夫義也者。昭乎日用。宰乎神明。著乎倫常。程乎材力。今也阡衡世變。政教必以義方。抵禦潮流。仗勢何如取義。不見乎義之方以知也。如珪有邸。義之圓而神也。如珠轉丸。蓋義爲綱維。自一日百年之所無止。義爲質幹。雖造次顛沛而未嘗違。論師儒朋友之聯。俱由身教。補梓匠輪輿之缺。別著心傳。惟見絮度之能精。自然措施之至常。豈僅從容赴難。永欽仰義烈之光昭。慷慨解囊。每忻懷義聲之赫濯。一時擊義鐘而苞苴必戒。聽義鼓而財粟告罄。是則依乎義以澤民生。可收其成於億兆。準乎義以奠國是。可收其效於子孫。蓋義者廉之所挾持。而廉者義之所會歸也。故受之以廉。廉也者。道從乎直。義取乎平。志浴乎清。行砥於峻。不圖蠅頭之策。不競蝸角之餘。傲氣漸除。始羨儀達之陽鳥。貪心久絕。迴殊就餌之淵魚。考績必以三。廉簡早詳乎虞史。廷官惟有六。廉隅下協夫同寅。君子聽琴瑟以成聲。廉以立志。聖人取盤盂以爲鑑。廉本名泉。從知志士彌嚴失足之防。庸夫胥泯薰心之欲。故振興仕路。非三千禮之主敬不爲功。澄叙官方。以十六字之執中而爲的。庶幾廉斯頑化。萬不至背義而有貪利之私。廉以儉成。斷不至弛義而存市恩之見。非特封家貪懲。文犀謗怯。咸知廉潔而懷清。卽至乍躍龍津。初翔鳳沼。敢說廉明而守素也。此無他。恥之謂也。若夫恥也者。繼禮義廉而並行不

悖。較禮義廉而妙合有加。德之基。禮之本。身之極。性之功。胥準此以相衡。每因之而可悟。縱云人生同具。天賦並權。然而梗化原非野草之性情。若感悟未生。遂莫懷乎神明之愧。嚮化亦屬閭閻之學問。苟轉移有術。又何藉乎刑法之威。故肥牝與歌。上有睢麟之意。吠廕靜聽。下無鼠雀之爭。盡人有鼓舞向化之誠。各省無不軌圖謀之舉。匪不必剿。盜亦爲良。行見德宣乎三。誰恥其悖。禮制以五。誰恥其違。液性必先陶情。移體乃可養氣。向也乞憐於勅敵。時作肉袒之常。今也借一於背城。甘作困獸之鬥。遂使鬼蜮襲迹。蠱巫斂形。血案釀五三。可以昭雪。密約條廿一。遂可廢除。何至聆訓誨以驚神。恥在失德。所謂對宣化而起興。恥莫如仁也。

亡妻彼姝略述

聞之昔矣。述哀之文。褒而不貶。讀黃門文通諸撰著。一時焯爲專家。後人毀之者衆矣。標序盛德慕其銘。昭紀鴻懿坊其表。爲文一出。大或千言。自謂盡古今之格調。而兼昔人之所獨專者矣。迨尋而釋之。文致大惡。則無一言之近於事實者。有之亦惟終譽之有假矣。孟子曰。言無實不祥。不祥之實。君子恥之。緒承亦恥之。蓋人生於世。爲世所用。在世之日。諸惡莫作。逝世而後。欲爲論定。卽一字莫名。亦可死而無憾。不然者。無惡不作。生晦其明。既沒而名。名不符實。雖極諸千言萬語。而不可以一字傳。有死之惟恐其不速也。嗚呼。至哀無文。至敬不飾。緒承何人。旣不能抗衡先輩。復不能屈拜後生。此之爲文。不過爲亡妻彼姝。略述身世。姑盡人事而已。至杼哀述德。謹莫贊一辭。亡妻姓朱名彼姝。無錫人。父諱彥士。母周氏。年二十有八來歸緒承。時緒承年二十有四。

枯特早喪。靡瞻靡依。家遇連遭。意境拂鬱。開塾講授。課徒爲生。一日兩餐。有時或兩日一餐。此三十年前書生常態。緒承固不得而辭也。彼妹拮据勤生。若素處窮約然者。初未嘗見其忿懣之色。兆於容貌。固絕不類常女子也。結褵逾半載。金盡阮囊。生計日蹙。甌生塵而日晏。風吹籜以歲寒。所謂貧乏不能自存者。可笑當年之緒承。不減昔日之馮媛也。恨何如之。一日。彼妹謂緒承曰。今天下新學昌明。日甚一日。吾子淬勵進取。有志於學。盡舍棄八股。而研求歐化。以備異日不時之需何如。緒承心是其言。丙午夏。離錫赴滬。投考震旦。家居瑣事。一以委諸彼妹。緒承得有志自力於學者二年。已而求學有心。點金乏術。適上海錫金公所董事倡辦錫金旅學。延聘中西文教員。事爲彼妹所聞。乃以識時務者爲俊傑。來相勸勉。緒承以久受經濟壓迫。遂毅然膺錫金旅學之聘。而出掌教鞭。歲月如馳。濫竽垂十二年。此十二年中。家庭多故。彼妹備受艱辛。先父母之告窆也。岳父母之物故也。兩兒女之產生也。養生送死。措置有方。能不悖乎禮。無愧乎心者。彼妹之助也。洎乎辛亥。國體變更。與學縱云有心。掌教恐亦非久計。夙聞上海郵政管理局有招考甲等郵務員之舉。心焉久之。於是乎就商彼妹。彼妹笑曰。十載以前。投考郵政。每爲一般優秀士子所不屑。今則求之不得。難若登天。然而成與不成。姑盡人事可乎。緒承深聽其言。壬子春。緒承應試滬郵。錄取甲等郵員。彼妹以亟亟爲我解決膳宿問題。從此遠去其鄉。卜居滬北。忽忽相聚二十有四年。家道剝復。稍稍展焉。是滬上多摩登女子。若彼妹者。可稱善體業姑。殊令人景慕無已也。嗚呼。緒觸感予。悼曷云已。彼妹居恆甚健。無多疾病。今夏偶感臃膈。初如甚微。嗣而濕滯阻胃。飲食不納。雖延中西醫。逐日診治。藥石無間。奈診治無所問。藥石無所靈。遂於民國二十六年七月九日戌時。終於滬寓。享年六十有一。生一子一女。子名軍聲。年三十二歲。在上海郵政管理局供職。娶媳陶然。無錫縣女師畢業生。女名妹胤。年二十六歲。在上海儲

匯局服務。適已故錫紳秦禹卿先生之長子毓銓。在上海有恆路郵政東局任職。均已年有孫二。長名淇風。年四歲。次名濂一。年一歲。尚在襁褓中。吾岳無後。濂一甥而彌舅。繼朱氏後。遵遺囑也。寄語彼姝。緒承無恙。閨家亦無恙。九泉之下。長夜漫漫。可以瞑目矣。嗚呼。

無錫旅滬同鄉會發行特刊祝辭

慨自齊俗時變。秦風日偷。鄉三物之條。等於陳迹。鄉八刑之典。視若虛文。故百姓思不親。不親者。其象爲渙。四民感不睦。不睦者。其道爲睽。有如一出入而無與儔。通問絕往來之好。一守望而莫肯顧。窺伺生攘奪之憂。一疾病而罔聞知。窘乏鮮繼周之誼。所謂相闕相保。秦半離德離心。而鄉制亡矣。若夫典重九門。歡聯三爵。比閭以燕饗。隨行者尙齒無愆。觀禮於蜡賓。臨事者章身有慶。敦龐可樂。天下羣知休老之禮。而胡考能安。醉飽有歌。晚近甚倡合羣之儀。而案居無自。且也安與同福。危與同憂。比隣不殊乎同室。常則相親。變則相勸。一日必計以百年。是以成禮必本乎名。斯知法莫善於助也。而鄉誼尙矣。我同鄉會來自無錫。設於申江。名曰同鄉。十萬人各有聚族而居之感。誼本一姓。七百里難忘其鄉遠去之思。唐郭鄧先生先發制人。無非敬恭之盛意。蔣哲卿先生後來居上。煞費營造之苦心。爲論解囊捐資。榮宗敬先生之鉅款可敬。若云熱心任事。匡仲謀先生之成績可嘉。今則活尙新生。慣從舊習。誰則應興應革。鄉元生明定舉足之經。是宜亦步亦趨。予小子謬上綏眉之頌。縱云鄉制已廢。古風莫追。然而鄉誼猶存。人心未泯。所望連襪曳袂。豆觴時聯里黨之歡。將伯助予。同袍備作干城之選。采薪問饋。醫藥還需疫癘之供。在昔虛設而不

行。從今實行之未已。勿論處常處變。各本休戚與共之思。可久可暫。想見朝夕與俱之侶。一致團結。分之爲一鄉之禮俗者。合之卽一國之治平。百折不同。小之盡一會之義務者。大之彰百年之功績。故一鄉爲衆鄉之表率。斷勿以嬉嬉杳杳圖其功。衆鄉乃全國之楷模。要當以業業兢兢者理其事。是爲祝。

歡迎楊令菲女士藝術展覽會祝辭

嘗考司諫掌書。道德之後繼以行藝。學記言教。藏修之餘貴在息游。是故誇慧劉姝。審青涓子。挹遺芬於唐史。獨擅書名。摹佳構於晉書。永留畫本。想見八棧代紙。桃花寫少女之妝。五嶽峻煙。粉黛吐中婦之豔。甚且匠心獨運。胎本往績壯其觀。生面別開。巧製奇型神乎技。非特形似。直是神通。可謂悟澈三生。才兼衆美者矣。吾邑楊女士令菲先生。系出名門。時推哲匠。志馳乎伊吾之北。名重乎斗極以南。早歲捐華。中年養志。故粹美備中和之蘊。精醇協位育之真。通五國語言。畢吏部之外交。終難想像。擅百家書法。淳化閣之內蘊。各有臨摹。晉觀藝術。祇貴一時。今也報到江南。來從漢北。有雨皆舊。無花不春。果眞滿碧滄州。相見恨晚。迥異小家粉本。不肯趨時。然而顏柳之寶笈雄開。鍾胡之楷臺高築。指不可得而數也。上下古今丹青之妙手。唐宋元明帝皇之傳神。目不可得而觀也。此外如靈波之殿。望石之觀。無從辨其區宇也。上則紫房別道之參差。下則宣室銅池之蜿蜒。靡由窺其廊廡也。若夫經口講指畫之分明。謬或失諸分寸。倘得應目暢神之觀感。象不爽乎毫厘。於是鐵網珊瑚。雖屬文房觀玩。曷若朝夕展覽。俾得中外流傳。故會開青年。明如指掌。士都紅客。目爲快心。爰再直上蓬萊。優柔糜飲使自華。乃不愧讀書之目。指導羣衆。

士農工商遂其欲。靡不歎游藝之精。誰與抗衡。咸說滬江獨步。誰爲傳鉢。畢竟巾幗先聲。

打倒元旦

我中華民國自辛亥肇造。以迄甲戌。共歷元旦。計二十有四。然最足令人銜恨而不堪回首者。孰有如甲子與辛未之元旦。可稱不祥。人非健忘。得毋切齒痛心耶。爰摘數語。使後世人知之。一致起來。打倒何如。

試言甲子。甲子元旦。齊盧構兵。滬甯受敵。戈操同室。與內訌而有餘。禍起蕭牆。禦外侮則不足。販運鴉片。羌無義之戰爭。剝削蠅頭。逞瀆武之私憤。四城烽火。五里烟塵。天氣釀寒。人行絕跡。不分少長。一律奔避夫申江。遑論死生。萬難偷安於錫麓。可憐倚闥白髮。滴血淚於殘衣。縱教在室紅顏。爲香魂之化石。亦云慘矣。又何賀焉。曾記作打油詩七絕二首。以紀實云。詩曰。

離家骨肉避征塵。跣足蓬頭剩子身。萬戶千門聲寂靜。迎年一個竟無人。
守陴鈴櫓靜無聲。捐盡私囊款敵兵。借個泥金春帖子。承平不寫寫歡迎。
晉言辛未。辛未元旦。中日啓釁。滬北一隅。橫遭兵劫。忽爾而威逞虎豹。無端而鬧起蛟螭。肆一人之猖獗。殞萬命之流離。砲火喧天。不止機聲札札。炸彈落地。但聞鬼哭啾啾。路曰寶山。皆昔時之市肆。館名商務。爲今日之荒邱。骨肉流離。誰無家室。觸體暴露。何處邱墳。嘆彼跳梁。釀此慘劫。此騷人見之而酸鼻。亦仁者聞之而動容也。更作七古二首以弔之。詩云。

莽蕩神州禍未已。扶桑烽火伊何底。佳兵不祥老所戒。河山斷送斜陽裏。

不聞爆竹聞山鬼。不語恭禧獻新歲。山鬼橫行到幾時。爆竹自有神祕在。

國難及國選聲中之雙十節中華民國二十五年

溯自我中華民國辛亥以還。丙子之際。爭名奪利者十八省。陽奉陰違者廿五年。政局雖系粗安。國基何曾大定。以老賣老。釀成垂暮之乾坤。得過且過。斷送等閒之歲月。國之不德。民不聊生。長此風雨飄搖。中國猶有陸沉之患。風雲緊急。強鄰保無囊括之思。是宜迅掃烟塵。永奠磐石。上昭國法。下洽輿情。徵特粉飾太平。槍砲齋迎年之品。慶祝雙十。城市張不夜之燈。縱云救國有心。聚訟莫衷一是。誰謂濟時無策。簡稱不外兩端。第一國難之不可解除也。窮兵贖武。挽翠飛芻。人盡呼庚。瑣尾極流離之痛。士皆環甲。蒿目悲蹂躪之觀。雖統馭有方。主座備嘗艱苦。而宰輔不事。官方難逃愆尤。軍士攬重權。擁兵自衛。學生干內政。罷課相爭。所以天道失常。人物易位。蕭牆禍起。每傷心於燃箕煮豆之非。敵國患生。徒目擊夫割地求和之舉。自南而北。不靖寇氛。接二連三。無限匪患。加以走私猖獗。生意蕭條。似此破碎山河。誰則竭誠受戴。縱橫荆棘。試從何處根株。故欲削平患難。亟宜聯指臂之使。而圖謀福利。斷不尙雄雌之角也。第二國選之不可不慎重也。自書升論秀之制廢。競選者互相排斥。互相抗衡。樹私植黨之風行。薦舉者其爲品題。其爲推轂。往往選不入選。舉非所舉。席珍甘抱璞。羞與簪黻相周旋。選苟徇情。舉又投機。公事等具文。大看城鄉之熱鬧。鷄也亂鶩。牛也亂宗。何莫非庸碌者貽笑於大雅。劑而占裳。貨而竊玉。亦猶是躡跑者失足於仕途。數充濫竽。莫慶圭璋之遠。賞乏衡鑑。孰收杞梓之良。奈何草莽齊民。妄談國事。風塵俗客。豫卜階升。此其名號雖榮。而實德則病矣。要知遴選出以私

意。而所舉疑偏。候選不尙真知。而所舉亦僞。論老成則迂腐者忒多隆重。談新進則靡登派尤好鋪張。是必才而且賢。忠而且實。出而挽回國運。匡濟時艱。庶幾才德並崇。官則克做。中樞慶得人焉。將見中外攜手。南北一心。宗功誌懋德矣。謹逢令節。聊綴蕪言。

全國郵務總工會追悼趙樹聲祭文 中華民國二十六年代作

維中華民國二十六年三月十四日。全國郵務總工會代表朱學範等謹以東芻清酌之奠。祭亡友趙同志樹聲先生之靈。嗚呼。越中望族。本雲臺綴組之家。浙右名流。多天閣繚纓之客。英才傑出。辰精嶽秀之祥。上智挺生。皎日大河之志。翳維先生。幼而醇粹。第作其冠。長多咫聞。溺苦於學。文端士範。行表師尊。始而遯跡郵傳。嗣乃蜚聲法學。風雲銳勵。郵運高唱鴻鐘。案牘倥傯。國難獨翔逸翮。甚至隻手堅持校務。片言善解工潮。故各界有知。三接爭迎上客。同寅不棄。十里且枉高軒。不惜鞿佩之年。宜享琬車之壽。豈謂而立晉二。已蓋定論之棺。交好盈千。爲灑同情之淚。學範等情逾骨肉。誼切苔岑。感莫能言。愧無以報。用涓吉日。肅集同人。效庾子山思舊之情。潛焉欲絕。讀陸平原歎逝之作。魂兮來歎。尙饗。

祭丁雲軒文代作

維中華民國二十有六年一月十日 鄉愚弟吳敬恆 裘可桴 秦敦世 榮宗敬 王爾忠 匡啓 塘 劉春圃 鄧馮緒承等謹以清酌庶饗之儀。致祭於 芸軒先生之靈曰。嗚呼。德以道樹。禮以

仁清。上達天工。金石無不敵之質。下憑地脈。薪火有俱盡之時。塵世黃梁。回頭一夢。雲天碧落。轉瞬千秋。春不相而巷不歌。山其頽而木其壞。追懷先哲。束芻銜孺子之悲。篤念老成。掛劍動良朋之感。死生契闊。今古愴懷。緬維先生。梓鄉望重。馭浦名高。幼讀儒書。潛心朱墨。少嫻藝術。從事丹青。長則手爲次傳。灌文明於世界。老而力求節儉。守儒素之家風。席奪黃香。躬侍高堂之養。囊傾白傅。恩沾後起之英。秀擢棣華。書云友於兄弟。調和琴瑟。詩詠宜爾室家。矧夫箕裘紹弓冶之謀。堂構盡兔輪之美。尤其枌鄉結社。命籌公益之鴻規。政界紀名。榮膺編纂之大業。問故廬兮無恙。對舊好以如新。允宜延晚景於桑榆。詎意彫歲寒之松柏。一朝風燭。萬古塵埃。敬恆等仰止清輝。時親警效。用涓吉日。爲集同鄉。肅進蕪章。臨朔風而灑淚。愧非藻飾。對良月而生悲。嗚呼。望天上之神鯨。我懷曷念。駕雲間之仙鶴。神其來歆。尙饗。

節約運動芻言

在昔軌度彰物。奢儉得中。黼黻繫纓。容納乎節文之度數。蘋蘩蘊藻。統攝乎簡約之範圍。乃自禮教中微。世風丕變。人心不古。趨向多岐。往見富豪之輩。侈談時尚。服御必求其美。居處必務其華。縱欲之習成。不徒盡中人數家之產。以快其意。此富者之不能長恃其富也。復見貧困者流。緊守故封。婚嫁不愛其財。喪祭不計其費。好勝之意切。不惜罄八口終歲之貲。以效其尤。此貧者不克久安於貧也。於是富者謀生活。撙節之風。絕口不談矣。貧者競生存。儉約之舉。充耳不聞矣。蕩而繩墨。廣而綱維。一爲倡而百爲和。上有好而下有甚。相沿成習。積習成風。勿論爲士爲農爲工爲商。各抱極欲窮奢之想。縱云勿嫖勿賭勿吃

勿着。難逃矯枉過正之譏。雖家室幸存。恐徒手難支。終成破產。妻孥誰愛。奈齊眉未老。早請離婚。足不離乎借貸之門。身已入乎逋逃之藪。此其禍將伊於胡底。而其弊亦有不可勝言者矣。我同鄉丁福保先生洞悉其情。痛詆其弊。於是就無錫旅滬同鄉會。發起節約運動。以上追古時之儉德。下挽今日之頹波。俾芸芸衆生。立業成家。勿以奢華供剝喪。濟濟多士。進德修業。要以敦樸養生成。誰道器別薰蕕。我云情殷桑梓。豈甘後盾。願着先鞭。不惟節之。而故約之。藉以矯蕩而不肆。勝而無恥之風。有約必節。無節非約。或可存破軀爲圓。斲彫爲璞之意。故猶是服御也。何必藻飾以求其美。猶是居處也。何必雕峻以益其華。猶是婚嫁也。何必酒食以傷其財。猶是喪祭也。何必儀仗以耗其費。他如鄉隣酬酢。親友交遊。又何必以有限之貲財。供無窮之慾壑。節之以禮。施焉而不開泛濫之端。亦約之以禮。受焉而不蹈僭踰之咎也。我雖不敏。人亦有言。一日之奢。償以數年之儉而不足。累世之儉。壞於一代之奢而有餘。斯言也。吾深願同鄉諸公。一日三復。信受奉行也可。

中華民國二十六年元旦例言

一年容易。如水逝波。不覺爆竹一聲。春回大地。又是我中華民國二十六年獻歲之始矣。回顧二十五年已過之一年中。國家對於行政方面。靡不努力措施。亟圖上進。如建築公路。改革幣制。提倡軍事訓練。籌備識字運動。以風行草偃之勢。乘生成固有之會。上下半年。成績粲然。屬在國民。要皆視爲賞心愜意事也。適若國民對於生計方面。以視歷年來之以退爲進。亦覺差勝一籌。如商業略呈起色。農村稍事復活。加以實業旺銷。工潮平靖。萬般事業。均現有欣欣向榮之象。說者謂今而後。和平

之聲浪。一時可施及於家庭。糜爛之戰爭。一朝當絕迹於天地矣。此誠自一二八以還。在吾人心目中。軒然第一幕之太平景象也。幸何如之。

所美中不足者。自秋徂冬。內訌突起。外患相侵。察其來勢。頗惹人意。幸而內訌歷時未幾。即告蕩平。特恨外患迄今未泯。尙待交涉。而外交上之折衝。正獲觀不少風雲之變幻。是尤二十五年將告終了時。幸中之大不幸也。

但自田雞上騰。雖成飛鴛。不值一擊。狼子野心。輕舉妄動。不過僅識端倪。以驚天動地之一劇戰。而樹莫大之威。雪莫大之恥。挫莫大之狂妄焰。打破外交。收復失地。大捷旣博。戰局一收。則西晉北平。慶平寇之節。紅燈綠酒。班奏凱之師。謂非不幸中之大幸乎。

不此之圖。恐將來之大患。必有十倍於今日。凡我國民。共上戰線。勿論土匪蒙匪。以及非土匪與非蒙匪。一朝掃地以盡。削平患難。奠定河山。即所以求無窮之安於他日者。一年之計。今爲其時。

風木圖引

蓋聞兩儀炳乎日月。婺乘中天。六子鑿於乾坤。兌符少女。風化純篤。端本則在家庭。倫紀肇修。大體莫先婦道。凡屬慈謨之敦篤。概憑陰教以敷施。此濯纓所以誦孝水之文。拜像遂以廣甘泉之賦。自有所不能已也。如我夢華先生德配嚴夫人系出名門。才長綺歲。父書可讀。仰承曝腹之家風。母教能諳。謹守潔身之畫範。年二十孀於同里朱氏之門。賓禮有加。婦儀無缺。上以博高堂之愛。下以成夫子之賢。其如夢華先生闡揚文化。慣作旅居。獨獻殷勤。代冢君而行孝。兼施教養。盡主婦之微勞。鳧鳧屋獸之烟。晨炊起早。聲聲銅龍之漏。夜織

眠遲。終日園蔬。家學久傳乎儒素。通宵鍼黹。閨範嫻習夫女紅。課稚子以詩書。燈火不滅。詣先塋而祭掃。俎豆常新。是尤足增藁砧不及。聯花萼以生光者矣。正宜稍息仔肩。教家珍而勉作國器。不遺餘力。以慈母而兼作良師。詎知暴日肆侵。神州俶擾。乃挈諸郎以他適。擇樂郊而獨居。憂患備嘗。風霜歷盡。泊乎桑梓失陷。拳拳生恐懼之心。荆棘叢生。口口述羈棲之累。迨至荏苒靜謐。閨里適歸。回憶漢皋泛舟。蕪湖稅駕。雖常流離傾復之際。猶懷生死與共之心。有機聲更有銓聲。肝腸迸裂。談家事兼談國事。骨肉團圓。惟夢華先生兵後歸來。嘆米鹽之罄匱。哲嗣福康兄公餘返省。感霜露之宵征。可憐體氣中傷。癰疽外裂。腎炎未已。腹脹隨之。聞諸岐黃。苦無和緩。然猶卜天緣之鸞鳳。爲長子先結朱陳。慨國事之嫺嫺。勗諸兒當師伊且。疾由斯劇。痛也何如。於是險象環生。總緯從此月冷。豈料秋風乍起。綺閣竟爾鐙昏。距中秋尙少兩週。魂銷丹桂。適大衍才多四載。化作青燐。誰則鬱此斂衲。寂寞與山邱之感。悲深珠玉。悽愴動蕙蒿之思。所幸潘岳多情。竟鼓悲涼之曲。陸游無恙。空吟偕老之詩。最難珠玉聯輝。仰承遺訓。蘭桂挺秀。善全孝思。雖在海上名流。聞之悲歎不止。毋怪邑中耆舊。傷哉稱道勿衰。我本過來人。爲酒同情之淚。世有悼亡者。能毋太息斯圖。

太湖俱樂部小引

古樂云亡。曼聲遂作。紅樓烟散。何來玉笛之音。翠館霞明。誰譜銅簫之曲。斯晨斯夕。嚶鳴不顧於笙簧。勞力勞心。觴詠遑論乎宮徵。然而契窮神之妙用。不廢新聲。冒廣樂之元音。無妨合雅。懸知子野。一手能壓倒梨園。不信成連。兩足敢推翻菊部。爾乃功成不日。

景取長春。雖非廣厦千間。英雄嘔盡夫心血。如此瓊樓一角。皮簧間譜其聲情。世縱禍亂相循。吾儕何事。話到滄桑迭變。身世都非。回首梓鄉。猶是文采風流之地。寄身粉社。無非悲歌慷慨之場。嗟乎。簫鼓喧天。顧曲之周郎老矣。旗亭畫壁。賞音之蘇子依然。所願千萬人稱。齊來討論法曲。毋慮三百道遠。此去欣賞良宵。

太湖俱樂部第一次彩排頌詞

樂府云亡。教坊間作。霓裳法曲。天上寂聞。梵字仙音。樓頭零落。何處覓關西大漢。所遭皆下里巴人。有宋以還。曲推獨步。金元以後。劇尙新聲。梨園青眼之垂。爲翻花樣。鞞部紅牙之拍。齊漱楊枝。幾輩登臺。風流瀟灑。羣芳入譜。玉貌娉婷。於是東朋西朋。已非管弦之奏。坐部立部。都爲工尺之音。別有風懷。留意於佳人才子。是何意態。傳神於緩帶輕裘。表以清明。早諧音於宮徵。極其廣大。合流韻於皮簧。休嗤兒女情長。歌殘玉樹。莫謂英雄氣短。醉倒旗亭。况乎曲法京師。觀之者興可泣可歌之感。腔宗京調。演之者盡不徐不疾之工。此其挽回人心。設教端本通俗。完成衆志。行樂尤貴及時。迺有名士侯陳。粉墨登場。不外敬恭桑梓。兼諸技師蘇柳。宮商協律。此間羅列榛苓。原非買盡黃金。漫爭聲價。倘得橫遭青眼。於有光榮。用慶四海之昇平。聊謀一鄉之福利。庶幾雲間同譜。留一曲於人間。他時月下重來。認數峯於江上。

杜月笙先生六旬壽言代作

蓋聞佛氏以靜觀自得。謂足以養生。老子以澹泊無爲。稱之曰知命。不知康強篤厚。載福之基。眉梨峯船。獲壽者相。豈鑿壤負釜。棲遯淵田之謂奇。惟坎止流行。涵濡睢渙而適分。祥徵百紀。煥成龍馬精神。瑞應萬年。現出莊嚴色相。存心利物。君子有焉。作善降祥。吉人尙已。若我杜公月笙先生。武庫家聲。工部世守。幼嫻詩禮。夙著經綸。奮班超投筆之心。勵郭丹棄儒之志。當學古入官之日。正新聲厲行之年。執鞭而領導後生。桃李盈門。吳頭插東南之秀。掃榻而網羅先進。芙蓉入幕。京口綰上下之游。偶獲談心。洞悉人情物理。不輕啓口。動關國計民生。所以門下青衿。頻見宣明之面。席間白袷。咸知庾杲之才。不爲過激之談。隱居求志。不作詭隨之論。閉戶養心。此其好學近乎知也。時事多艱。外交孔亟。折衝樽俎。交涉不讓蘭生。收功詞令。規畫有甚子產。由是才氣見重於大府。姓名屢列於荐章。我國辛亥成功。地當華洋糅雜之區。泯蠻事於蝸角。中日啓釁。時值朝野震驚之際。折盛氣之梟閔。卒使三島寒心。息鯨浪掀天之禍。四聯攜手。消牛耳掠地之謀。坐鎮滄關。不遺餘力。奠定歇浦。實乃大功。至於鄉里周旋。則同義之莊。萬間待築。親朋酬酢。則未償之債。千券可燔。望廉泉讓水之鄉。市義在孟嘗交游以上。抱博施濟羣之術。和事居魯連排解之中。此其力行近乎仁也。且也功成身退。試尋其貞貞後福之因。實至名歸。更陳其壘壘大端之蹟。內戰禍烈。中原黨爭。而志越恆流。道高不仕。以爲功名富貴。不如獨寐寤歌。咕嚕餉釘。不如讀書養氣。揚以滄桑之世變。勉爲松柏之歲寒。以視彼貪污走私。恨之切齒。居奇囤積。言之痛心。况乎兄弟鬩牆。生靈塗炭。忍見神州華胄。銅駝歎炎祚之將衰。上海僑民。車騎避楚氛之甚惡。遂乃一時笠屐。來爲滬上之寓公。終歲桑麻。一似田間之野老。此其知恥近乎勇也。綜此三德。大慶六旬。想見算等松喬。瞻雲龍之貌古。泉分菊井。企海鶴之姿高。稱觴昔日下名流。如逢洛社。下筆奏天邊吉語。載詠崇邱。

沈映泉先生暨德配楊夫人行略

同邑沈映泉先生。以自幼習商執牛耳於油麻業。雄於海上。年七十有七而沒。葬有年矣。其哲嗣瑞洲君。秉性至孝。適紹先業。出示其尊人之盛德大業。流風沾被。足以世其祀者。丐余一言。以文其塋道之石。而爲銘幽之光。按狀。先生姓沈氏。諱錫福。字映泉。考諱起昌。妣陳氏。起昌公生子三人。長卽先生。幼有異稟。善讀書。年甫八歲。經書過目。背誦無遺。及長有大志。爲境所困。廢讀至上海。習油麻業。公餘研習商學。旁通計然之術。年二十有四。以勵行節約。家有餘資。商學亦探得其奧旨。故創設沈元來油麻號於滬南大碼頭。其持業也。克明克勤。去飾去華。事無鉅細。靡不躬親。其待友也。旣尙道義。復重然諾。一介不苟。井井有條。先生主持期年。而與不十年。旋於通州海門。採購棉花。以爲副業。更於十六舖南碼頭。倡辦沈元吉治坊。業日以隆。事日以繁。聲譽益聞。岐嶷於立業之後。頭角半露。崢嶸於授室之年。娶楊氏。例贈孺人。孺人小心敬順。居寵益畏。始終無驕矜之色。戚黨難之。蓋其相夫有則。教子無忝。以此自愛。得歿後可狀。謂沈氏有賢幹婦也。生丈夫子二。瑞洲君其次。女三。子女婚嫁。同尊而合乎理。婉爲而得其正。孺人兼其勞。盡心力而爲之。正足以歎孺人之所能。而爲世人之所難者矣。先生於是畢向平之願。願爲入定之僧。有田十畝。有業三處。皆所謂內其身者。足以亡身。於己於世。兩無裨益。君家故豐。家所藏葬。一以付諸其哲嗣瑞洲君。身體而力行之。置己身爲玄度最後之身。豈非知進知退。善護佛法者哉。且夫禪固不必退也。春之禪爲秋。晝之禪爲夜。旣爲之禪。則遷流無已。先生留意禪宗。其殆深識人之處世。無一不是囚籠鵝鴨。子孫牛馬。以退爲進。進不礙

退。是諸世界。倘可不知進退。處居人間繁苦地耶。聞海上有諦閑法師者。博覽大藏。曲解法華。迺托鉢擎錫。而往師焉。蓋先生之皈依佛教。自諦閑法師始。然而佛家之學。至爲源遠。非可一蹴而成也。乃往見興慈法師於淨土庵。守不殺戒。終日手釋氏書。始聽講大般若經。次有新華嚴經。終於護命放生法。一心受持。凡十年。儼然一退院老僧矣。飯心蓮邦。具有根柢。遂與慈興法師集議。勸建法藏寺於茄勒路。規制宏大。爲造佛廬僧廊數十間。棟其彫牆。像設嚴整。侵循有上國風。遊衲過之。與夫善男子善女人見之。莫不狂歡歎賞。謂先生願力所來。一心成佛。由其研究之第一步。而直入其堂奧矣。然又不止。此佛法無邊。必信不及。常以其耄。恐不及待。乃親入寶華山。不遠千里。願從印光法師遊。時年六十有四矣。受戒者五。法名有三。德澄其最後者也。易曰。積善之家。必餘慶。傳曰。明德之後。必有達人。先生兼而有之。故其哲嗣瑞洲君。長袖善舞。獨持門戶。以一人權羸縮。均出入。其家日隆隆起。猶是不懈於孝。乃得克昌厥後。非所謂衛家一兒。蘇瓊有子乎。配錢氏。有婦德。生子七。女二。一門三代。子孝孫賢。先生之生。以遙清同治六年丁卯六月初三日。歿以民國三十三年三月十七日。孺人楊氏。自先生歿後。越一年而歿於滬。時中日戰事孔殷。哲嗣瑞洲君合葬先生與楊孺人於無錫之孫家灣。今年四月。君亦賦悼亡。行狀如此。俾饒諸石。

課徒草共二百篇節錄三十五篇

元日勉學

考諸古者。歲之一月。不言一而曰正。以示高居人上者。身先下民而正一心。正一心以正朝

廷。正朝廷以正百官。正百官以正萬民。正萬民以正四方。則大事告成矣。然猶曰。吾力不足。持之以堅。吾才不廣。勵之以敏。吾識未拓。牖之以博。吾器未大。恢之以經。務求其計之得。而防其計之細。孰不謹履端之始。而仰當陽之治也哉。

春也者。歲之始也。一年之計在於春。四民之首貴乎士。國家造士。無不一出於學。其德則仁義禮智。其行則孝弟忠信。其術則詩書禮樂。而知類通達。乃可以爲天下國家之用。蓋學所以覺才也。學之爲用大矣哉。是烏可以不學。

夫學問功業。什伯於人。則堅忍耐久。亦什伯於人。不爲外物所誘。不爲畏途所阻。一日如是。一月亦如是。日月無窮期。吾一身之學業亦無止境。遲之又久。一旦豁然。人慕其器識之宏深。歎爲羣生之表率。曾不知其器識之所以宏深若是者。而要非生有自來。實攸賴乎學力。初非因乎質地也。

學如不及。猶恐失之。所以君子貴乎自勉。其始也有堅定不移之志。有謙讓不遑之心。天賦之靈敏。吾知不逮人也。必也屏棄其昏庸而靈敏自闢焉。人生之精力。吾知不後人也。必也百倍其功能。而精力始出焉。子獨不觀諸匠石乎。運方寸之木。斤斤削之。不轉瞬而成爲榱桷矣。裁徑尺之材。經之營之。不閱日而成爲臺榭矣。當其締造伊始。落落而不知其材之有以用也。此所謂恆其德貞也。豈有他哉。勉而已矣。

一年之歲月幾何。年一過往。何可攀援。善學者。學術與歲時俱進。勿以玩好懈其心志。勿以俗好炫其耳目。勿自作聰明。勿甘於暴棄。後生可畏。來者難誣。言此以警人斯及時勉學也。勉乎哉。未學者防其不及。既學者恐其或失。二者交相爲用。則學乃有底於成矣。

上元觀燈記

火樹花發。星橋鎖開。非正月望夜。人間所謂元宵節乎。邀友而作觀燈之舉。友曰。十里瀝濱。夙號黃金之地。每當新年在望。月滿良宵。遍地笙歌。萬家燈火。觀燈之人。舉市若狂。有沉醉於酒肆者。有漫飲於茶樓者。有溺志於檣蒲者。有移情乎戲劇者。一般遊人。莫不羣然嘩然。以極一時之盛況。

然而好景不常。時局丕變。舉目有河山之感。迎年無爆竹之舉。雖梅鶴無聞。風月爲之賓主。琴書不事。花鳥爲之友朋。乃虹橋橫駕。有繫馬於綠楊陰下者。燧烽火矣。金缸競酌。有聽鷓於紅杏枝頭者。幻雲烟矣。昔日之歌管樓臺。若花於春。何其盛也。今日則一落千丈。若泡於影。何其衰也。撫今追昔。感慨繫之。

是豈造物不仁。以造世界者禍世界乎。不然。金吾不禁。值良宵吾玩弄之。當美景吾玩弄之。猜謎蹴鞠。對勝友高人。則相與玩弄之。奈何風景蕭條。物情凋敝。神號鬼哭。雨泣風愁。海上五百萬僑民。飢不能食。寒不能衣。對此元夕。神傷何以。天其或者與人以置諸死地而後生乎。余曰唯唯。國破山河。城春草木。日不忍視。耳不忍聞。此天意也。非人力所能爲。盡少留。天心悔禍。後會常有期也。言罷。燈炮月落。鄰鷄曉唱矣。

春日旅行

乙酉春。余蟄居瀝濱市郊。終日閉戶讀書。孤陋寡聞。不啻修行古刹。目盲不明。耳聾不聰。非能言之鸚鵡。卽能言之猩猩。雖飽食無禍。其可因循坐誤。而視爲恆事乎。學制訂更。各校例有春假一週。蓋以日暖風和。悅人心目。爲遊覽考察之時。余雖無春日之暇。則星期日終日休息。與其埋頭伏案。何如遠足郊遊。俾身心可以活潑。心志可以舒暢。

見聞可以增廣。異鄉風景。賞而玩之。可作活的書本觀。豈非有益於國文者乎。於是約二三同學。攜手而作春日旅行之舉。

旅行不徒爲游覽與娛樂而已也。其目的乃爲研究與觀察。人於書中讀得種種奇妙之事物。非有閱歷以助之。則不能得真確之意象。不過視爲一種理想上之教育。旅行則一種實地試驗之最良教育也。語曰。閉門造車。出門蓋轍。又曰一年旅行。勝於五年讀書。而旅行顧可緩乎哉。旅行有兩種。一曰局部旅行。在上海一隅。公園林立。風景宜人。位於租界上者。有兆豐及法國公園。偏於華界上者。有沈氏與葉氏花園。園中鮮花奪目。飛鳥爭春。以遊覽中之景物。徵諸學術上之研究。蓋有心得焉。一曰長途旅行。由滬寧路綫而去者。可作金陵遊記。由滬杭路綫而去者。可作武林遊記。金陵爲歷代帝王建都之所。武林亦爲近代忠臣義士憑弔之區。一經旅行。則其接於目而觸於心者。超出於滬上旅行多矣。

春寒衛生之淺說

人第知夫夏日之炎熱。冬日之寒冷。不可不節其飲食。慎其起居。適其衣服。以應天時而盡人事。使疾病無隙可乘耳。不知春日之溫暖。雖有異於冬夏之氣候。而春行冬令。寒氣萃至。人匪木石。稍一不慎。則寒氣逼人。在在足以致病。於是乎衛生尙矣。

一在乎飲食。人身之肌肉。時有消耗。消耗之後。賴有飲食以補助之。則肌肉乃由此而堅強。然而飲料不潔。食品不鮮。際此天時朝暮不同。腸胃消化。易足傷生。雖有豐富之滋養料。以滋養身體。仍恐於事無濟。此養生家所以有濁水不飲。市脯不食者矣。

一在乎起居。一日之中。應事接物。決無全體休息之時。非睡眠不足以償其勞。惟睡眠貴有

定時。日出而作。日入而息。古人之善於養生也。若春到人間。嬉春不事。恣情淫樂。顛例晨昏。睡眠既失其常度。體熱亦失其功用。不幸而爲外氣所奪。則疾病隨之矣。故善養生者。旁晚卽息。嚮晨卽起。息則休止。起則作事。未嘗忽視之也。

一在乎衣服。衣服爲章身之具。尤爲禦寒之資。若在冬季。以棉衣皮衣爲最適乎人體之用。而在春日。不第棉皮二者爲不可少。乃單袷之衣。亦須準備。有時溫風始至。則單衣可而袷衣亦可。一旦寒氣暴侵。則棉衣皮衣適用與否。全恃乎應付咸宜。否則。冬知避寒。而春之沍寒如冬者。反漠然忘之。則豈有不致疾病者哉。故吾人之攝生。乃由飲食起居。復論及衣服。而作進一步之關心也。

說風箏

有物焉。非動物亦非植物。有形體而無知覺。以竹爲骨。用紙糊之。有魚鳥蝴蝶諸狀。爲兒童玩具之一。而學童尤愛之。每當冬末春初。天晴無雨。約友人郊外閒遊。則見來自地上。飛於空中。小於飛機。高若汽球者。飄飄乎遺世獨立。有列子御風之慨焉。噫。此何物也。往者台城之圍。簡文告急。利用飛空。暫作軍事之工具者。非所謂紙鳶也耶。紙鳶者。其形似鳶。作於李鄴。爲宮中之戲。引線乘風而上。不致下墮。間有以竹爲笛。而繫於其上者。使風入竹。泠泠作聲。聲如箏鳴。故又名風箏。

風箏與鳶紙之外。又有嚮弓鶴子之名。其使用之法。於箏上繫以線。線之粗細。以箏之大小而定。羣兒攜箏至曠野處。一人登高聳之。一人則曳之而奔。奔之愈速。則箏之上升愈高。然必逐步關心。雖箏之爲物。隨風飄蕩。然若任意牽引。則非特不能高揚。且有墮落之虞。

矣。彼放之者。好自爲之。

或云年幼者。不可作劇烈之遊戲。如風箏之爲物。依風而行。作爲遊戲。較踢球拍球及打鐵環等爲最適宜。蓋其輕而輕舉。既可活潑身體。奮發精神。且可借以運用目力。對於衛生。獲益匪淺。安可輕視之耶。近世軍事學家。運其心思。構造飛機。想其得力於風箏之助。爲不少矣。

清明植樹

大好春光。已無形地浪擲了三分之二。轉瞬間又屆清明佳節矣。是日也。天氣晴和。氣候溫暖。校中學生。相約旅行。田間農夫。相率犁田。路上行人。相聚掃墓。熙熙皞皞。各有所事。而不能忘情於春節焉。

考諸古者。以木比才。有十年樹木。百年樹人之語。民國以前。其事廢而不舉者久矣。民國成立。政府諸公。忽然憬悟。以爲樹木與樹人無異。木之大者。可作棟樑之用。才之大者。可作邦家之基。故下令於舊曆之清明節爲植樹節。自總統以下。集合公共場所。舉行植樹典禮。以植樹者樹人。亦民國以來清明節韻事也。

雖然。植樹亦不僅爲樹人計也。森林之業。關於民生國計。其利甚大。蓋建造房屋。製造器具。暨夫鍛鍊薪炭。無一非林木是賴。如我國福建省之南屏。及東三省之吉林。皆夙稱產木之區。若設法而振興之。則取之不盡。用之不竭。獲利正未可量也。

邵子曰。一年之計在於春。春到人間。第一佳節。是曰清明。清明前後。不寒不暖。得天趣。潤空氣。適寒暑。三者皆有裨於植物。故植樹之實行日期。不在清明節之前。與清明節

之後。而適應時機。廣興林業。規定於一年之清明。乃自民國十九年三月十二日始。國民政府明定每年是日爲植樹節。至今已屆十八年。何以造林運動。全國未見有若何實效。植樹者不問其樹之活與不活。但講其樹之植與不植。是則植樹云云。祇舉行一次儀式而已。

一九四四年之立夏節

春去夏來。今年之立夏節。因去年有閏月之關係。故較去年爲早。就表面上觀之。民間之習慣。與夫時下之趨勢。夫固猶是抱及時行樂之觀念。以營口腹之欲。而佐立夏之興。非不美也。然國勢之風雲日亟。民生之痛苦日深。則憂世之士。有終日不食。終夜不寢。而生無限之今昔觀感者矣。

卽以民食而論。一寒暑間。食米之售價。在最高時期。爲每石十五萬。有增至廿五倍以上。他物無論矣。生活如此之高。環境如此之惡。有心人已澌之無聲。哭之無淚。乃一般仗着迷信。狃於舊習之人。耗費金錢。購辦食品。相與宴飲爲樂。藉以暢彼幽情。俗所謂嘗新也。其甚者且從而橫波逐流。不顧國難。祇憑私見。窮奢極欲。點綴夏景。而不知殺身之禍。有不旋踵而至者矣。可不鑒哉。

立夏在江浙兩省。有相常熱鬧。尤其是食品公司。陳設美麗。巧立名目。有三燒五臘九時鮮之名。三燒五臘者肴饌也。九時鮮者蔬果也。在杭州方面。立夏之日。此風盛行。視爲重要禮節焉。此外有吃立夏粥之風氣。食立夏餅之風俗。據云可免蛙夏。抑亦迷信之甚者矣。吾鄉則稍異於是。豪華之家。假立夏之名。縱口腹之欲。不食則已。食必萬錢。下等者亦必略

備鹹蛋。佐以莧菜。作爲家餐。至好開兒童。則購取櫻桃梅子。分而食之。迨是日下午。不論男女。都要上楨行秤。聞江浙接壤。其趣一也。

所慮者。今年立夏之日。轉瞬已過。而明年又有此立夏之日也。然時隔多年。則世界上一動一靜。瞬息萬變。正不知將放幾許光明。將添幾許清興。豈僅隨俗從俗。以一飲食之投。一手足之勞。如今日之苦中作樂。而遂足以盡點綴立夏之能事已哉。

一九四四年之端陽

端陽俗稱蒲節。亦曰天中。古名重五節。蓋取其五月五日之義也。考荆楚歲時記。有於是日競龍舟啖角黍之俗。皆所以弔祭屈原者也。屈原懷才不遇。而自投汨羅江以死。後世人景仰其賢。愛憐其忠。乃競龍舟以賦招魂。投角黍而作祭物。相沿至今。遂以成風。似非其他令節之可比也。

乃好事者踵事增華。引用鍾進士能啖鬼之一語。於是懸其像爲人家驅鬼。菖蒲其劍。雄黃其酒。而鍾進士穩坐中央。一若真有鬼而鍾進士真能啖之者。鍾進士不知也。甚矣。世人之惑也。世間何嘗有鬼。而鍾進士何嘗能驅鬼。况鍾進士不知其爲何人耶。是則崇拜鍾進士者亦鬼而已矣。

今日何日。米價狂漲。粒米如珠。升斗小民。危在旦夕。是餓鬼也。四壁蕭條。家無担石。開門七件。件件皆空。是窮鬼也。况乎長者。好煩其令。悉索米糧。鳴鼓而聚。擊木而召。是官而鬼也。烽火瀾天。殺人盈野。往往鬼哭。天陰則聞。是兵而鬼也。路鬼當道。鬼域害人。茫茫神州。不啻已成鬼世界矣。較之清明掃墓。中元打醮。同爲鬼節。且有過之而

無不及焉。

所喜者。歐戰已告和平。世界戰爭。將告結束。地方秩序。庶幾漸次恢復。則將來端午。大地光明。重見天日。人皆鍾馗。鬼皆斂跡。於是乎艾可作虎。蒲可代劍。奉角黍以祀神。看龍舟而競渡。其景象之佳。什百從前。可計日而待也。

暑假期內學生與圖書館之關係

時屆夏令。暑氣逼人。各學校大都循例放假。避暑氣也。當此之時。若輩青年學生。都是過無聊的生活。和無意識之消遣。將暑假期內可以利用的大好時間。非耽於酒。卽溺於賭。不作研究相當的學術思想。未免可惜。

然則在此暑假期內。果於學生可有獲得知識的機會。以免去許多浪費的時間者。運動固非所宜。遊戲亦隨所不許。除在家將舊有知識。在家溫習藉以記憶外。孰若利用暑假時機。選擇到相當的現代圖書館。去參考他的學說和言論。

因爲圖書館有充分的材料。且任何時間。都可入內瀏覽。故可以獲得新的知識。藉補教室內所得的不足。教師所授的不足。和課本所讀的不足。所用之腦力。最爲經濟。所收之效果。最爲偉大。所以圖書館之對於青年學生。不啻暑假期內的補習學校。而亦學生利用圖書館之唯一好機會也。

長日如年。暑假將半。青年學生。爲消磨暇日計。吾以爲莫妙於圖書館。遠則徐家匯天主堂。近則八仙橋青年會。前者藏書豐富。觀者不易。後者藏書無多。觀者稱便。凡我學生。選擇而取之可也。

夏令衛生說

四時之最可愛者莫如春。而最可畏者莫如夏。蓋夏則天氣炎熱。疫病最易流行。而春則天氣溫和。疾病無隙可入也。不可不思患而預防之。

預防之法有多種。約言之。則曰衛生。衛生首重清潔。其簡而易行者。若在夏令。就一般普通人家言。常有三種小生物。非一致起來。驅除不可。

小生物者。蚊蠅鼠是也。蓋此三者。若不早為驅除。一旦時疫發生。害必及於人身。可不慎歟。試以蚊言之。

蚊生於濕地。為傳染瘧疾之媒介。吮人之血。不論何人。往往吮病人之血。而刺入無病者之體中。則人亦患病。而驅防之法。惟須將庭除間及陰溝間積水除去。或將園林中野草剷除。則蚊是不生。

蠅生於穢地。為傳染虎列拉之媒介。蠅之覓食。隨處皆往。往往食含有病菌之物。而遺於無毒之食物上。則人食之亦病矣。而驅除之法。可將屋內腥臭腐化之物。整治清潔。自無蠅類之產生。

若論夫鼠。則居於僻地。晝伏夜出。為傳染斑疹傷寒之媒介。常竊食倉穀。損毀器具。一旦倒斃。發為鼠疫。偶被傳染。則相繼死亡。而驅除之法。可將屋內洞穴堵塞。並將雜物收拾清楚。使其無可以之為巢穴而寄跡。則鼠類絕種矣。

取締孟蘭盆勝會

孟蘭盆勝會。梵語謂之烏蘭。相傳每年七月十五日。僧尼道俗。營盆供佛。紙衣錠箔。鐃鈸喧擾。名曰孟蘭齋。後世廣爲華飾。謂行孝道者。亦應供佛設齋。此孟蘭盆勝會所由至今勿替也。

街頭巷尾。孟蘭盆勝會舉行之地點也。總其事者。非多數流氓。卽一般無賴。名爲募捐。形同勒索。居民爲息事寧人計。大都如數敷衍。而未與之深辯者。蓋一則涉於迷信。二則畏其藉勢也。然彼等既無意識。而又含有毒素性之行爲。藉端斂財。到處蠱民。如此行動。不但助長其囂張跋扈之風氣。且足以擾亂社會治安之秩序。若不嚴加制止。則惡風所熾。貽害何可勝言。况處此時局變端百出之候。民衆生活高漲之際。更有澈底制止之必要也。

現在廢歷七月已屆。而所謂流氓與無賴。對於籌備孟蘭盆勝會。恐猶在醞釀之中。蓋一年一度。成爲慣例。在過去年頭。當局大都置而不問。卽問亦不過官樣文章。加以忽視。故彼輩明目張胆。愆不畏法。始而集衆遊行。繼則飲酒作樂。此種勞民傷財。迷信佞神之舉。吾以爲當一律禁止。不能復見於今日也。

除一方面以宣傳曉諭方式。使一般民衆瞭解此一舉動爲屬迷信而絕無意義外。更以強化的威脅手段。加諸夙具有潛勢力之流氓無賴之徒。以阻遏其毒焰。則地方行政革新之步驟。庶有望焉。

七夕

七夕爲新秋之第一佳節。俗名乞巧。是日。天上雙星。有渡河之舉。人間兒女。作乞巧之會。風光旖旎。一年一度。習慣相傳。有五步曲。爰舉崖略。筆之於左。樂事亦韻事也。

七夕風俗。大江南北。家家陳列瓜果。循例乞巧。佐以巧果。其製法取麵粉加水揉之。而和以糖。味香質脆。頗堪適口。糖果店中。於前一日。大量配製。入釜油煮之。所謂油灸巧果者是也。

有藉以驗人之智愚者。俗以河水井水。混合一起。名爲鴛鴦水。盛之以杯。露於中庭。向日曝晒一過。俟水膜上生。兒女各拈鍼一枚。投之使浮。鍼影射於水中。如水中之影。有細如綫而粗若樞者。其細者則多智。而粗者多愚也。

七夕介乎上弦。月光猶未皎皎。小兒女膜拜於一鈎新月之下。恆作穿鍼之戲。蓋七夕。匪特誇鍼藉之巧。抑亦可試驗人之目力也。

點綴七夕者。有鳳仙花一種。是花七夕盛開。兒女復於月光之下。採之搗爲液汁。以塗於指甲之上。而十指鮮紅。不下於市上所售之指甲油也。

七夕以後。天河之顯晦。可以卜米價之高下。據稱天色顯明而光亮者。米價賤。天色晦暗而陰霾者。米價貴。但時至今日。石米數千萬。貴之如珠。特不知該日是否有人向天河而一覘色相。以預測其貴賤也。

記甲申中秋節

秋者一年四季之一也。中秋者秋季之一半也。未到中秋。則謂之初秋。已過中秋。則謂之暮秋。同是秋也。定其名曰中。則秋之價值。較諸初秋暨暮秋。有不可同日而語者矣。

秋爲涼節。古稱涼秋。李陵之答蘇武也。秋又爲巧候。俗稱巧秋。牽牛之會織女也。然涼秋描寫塞外之哀音。巧秋點綴人間之佳話。哀樂並傳。是亦秋也。而非所例於中秋。

夫秋之謂中也。秋色平分。月光圓滿。四時最好之賞月節也。古之人有翫月於宮中者。有翫月於林中者。婦孺偶興。瓜果雜陳。今之人有翫月於庭中者。果爾。則中秋之得名。其殆以月而並傳不朽歟。不然。何世之人翫月之多也。

雖然二月十五日。春月之可翫也。乃不曰中春。五月十五日。夏月之可翫也。乃不曰中夏。十一月十五日。冬月之可翫也。乃不曰中冬。由此觀之。則中秋之所以膾炙於人口者。似不僅以月之取悅於人而得名也。

按荆楚歲時記及風俗通所載都不詳。姑勿深考。要不妨隨俗從俗。撫時序之推移。極人生之樂事。一年一度。效王粲之倚樓。步庾亮之登樓而已。但求塞責。而遑論乎有生以前之中秋。其天時人事爲何若。有生以後之中秋。其國利民福又何若。則今日之中秋。有非有生以前及有生以後所得逆料者矣。故人之對於中秋。勃然見月興懷者。我則對於中秋。惟有望風興歎焉耳。

說桂

一年有四季。無季不有花。亦無花不及時盛開。以供人之欣賞。如桃李見稱夫春者也。荷則見重夫夏者也。梅則見知夫冬者也。獨桂則以秋著。蓋其戰勝夫秋。而不受制於秋也。桂真得秋獨厚者哉。

碧翠其葉。葱蘢可視。金粟其花。芬芳可愛。有產於山者。謂之山桂。又有植於庭者。謂之庭桂。富貴之家。庭中設施殊雅。間有以桂分植兩邊。爲點綴庭院之風景。每當中秋佳節。桂花競放。賞而玩之。自有無窮之趣焉。

從知物之盛於春者。必不能容乎秋。非秋之果足以制物也。特物之賦性。有不能制於秋耳。不然。桂亦植物之一。何以好花待發。不見於春光明媚之際。而一露顏色。獨於秋風蕭颯之候。而擁繁華。若桂者其殆貞烈也與。

荷風送香。其先乎桂而表異乎衆也。今則池荷早已卸矣。秋菊傲霜。其後乎桂而獨冠於時者也。今則籬菊猶未開矣。惟桂則介乎荷與菊之間。飄雲外之香。挺月中之秀。爲幽人君子。作吟詩之資料。添玩月之興奮。不徒折金銀桂一二枝。插於瓶中。以供案頭之欣賞而已。惜乎叢桂滿山。香風四溢。不見夫攀桂者之驅車而來。吟桂者之挾策而至。徒令行人吸收其香味。不克自守其常態。而堅貞其節操也。良可慨已。

深秋攝生談

秋風蕭颯。霜氣釀寒。此天地肅殺之氣在於秋也。當此之時。草木黃落。風雨淒其。烟霏雲斂。寒暖不時。人匪木石。稍不加以意。則百病叢生。小者患寒熱。大者患疫癘。是豈天時之不正。抑人事有不常耶。

夫天時有常變之咸宜。人事有經權之互用。應天者知常而不知變。則夏裘而冬葛矣。亦治事者。知經而不知權。則膠柱而鼓瑟矣。故正能尅邪。人定勝天。於是乎衛生尙焉。

蓋聞春宜疏達。春日之衛生也。夏宜宣通。夏日之衛生也。冬宜辟寒。冬日之衛生也。而秋則有異於三者之所爲。金風一動。萬草彫零。是風之足以制物。有令人不寒而慄者。故詩云。九月授衣。以禦寒也。人苟順其節序。適其衣服。則防閑既周。疾病自去。雖秋風多厲。又何能爲吾身之患哉。

然而起居不時。飲食不節。而害之所貽。有甚於衣服。惟善於衛生者。對於飲食。其分量之多寡。皆有定衡。對於起居。時刻之早晚。亦遂所顧慮。豈僅禦寒有具。章身有物。以一衣服之用。遂足以概攝生之要制也。雖然。猶不止此。

蟋蟀

蟋蟀爲一種小蟲。亦名促織。長不滿寸。全體褐色。有薄翅。雄者前翅左右上相重疊。振翅作聲。聲有強弱之分。其鳴唧唧。其韻啾啾。夜涼如水。月滿空庭。蟋蟀居於穴中。而鳴聲甚厲。動人聽焉。

蟋蟀有二種。其雄者末端有尾毛二。較雌者爲長。雌者毛尾之間有產卵管二。二者同居一處。愛情相篤。鳴聲和盛。有抑揚頓挫之妙焉。

性喜跳躍而善鬥。兒童捕以爲嬉。蓄於磁盆中。引之以草。使之奮鬥。兩雄相見。則奮鬥不能容。鬥無幾時。獲勝者振翅而鳴。以示得意。敗者不敢向前。有負傷而逃者矣。

嘗考六月方中。三秋未至。蟋蟀者籬根深伏。階下幽棲。蓋猶謂之居壁也。物類猶伏而未動也。迨夫涼風始至。漸近初秋。蠕蠕蟋蟀。上堂入戶。作四壁之吟。抱三秋之感。非卽所謂以虫鳴秋者乎。

然而壽命不常。三冬將屆。生命一息。轉瞬卽去。回憶向之同類相殘。彼此爭鬥。徒耗精力。取快一時。未免悔之莫及矣。吾甚有感也。

丁亥登高記

秋有二節。一曰中秋。一曰重陽。皆遊玩之佳日也。世之耽遊興者。於中秋賞月之後。乃復作九日登高。一以吸新鮮之空氣。一以暢厄塞之襟懷。及時行樂。良有以也。

有山焉。地臨西北。風景絕佳。仰觀則山峯矗立。俯視則湖水長流。非吾邑之惠山耶。當黃海之怒潮。作中流之砥柱。非吳郡之焦山耶。兩山無恙。去滬尤遠。不遂登臨。令人仰止而已。

登東山者而小魯。登泰山而小天下。然非所論夫九日也。蓋九日所登者。古有龍山。孟嘉登之。風吹帽落。桓溫嘲之以文。後世傳爲美談。豈登高之故事。卽爲孟嘉所發生者乎。孟嘉有知。當亦啞然失笑矣。

上海一隅。自經革命以還。昔日繁華。亦因以大減。况地皆平原。無山可尋。故無山可登。登高者別具會心。興言出遊。假城內邑廟之豫園以覽其勝。園有石假山一座。高可丈餘。登其巔。憑高遠望。吐納萬景。一覽而無遺。第時至今日。風景不殊。不禁樂極而憂矣。

今日何日乎。非猶是中華民國三十三年古曆九月九日乎。迴憶去年今日。終日枯坐吟誦。一無所事。日月不居。轉瞬經年。乃在此一年中。物價高漲。不知幾倍。生活高貴。不知幾度。人民所登者債臺耳。山云乎哉。吾曰債如山積。作今日登高觀可也。

菊話

秋之有花。遠不如春。生機暢達。凡與目所接觸者。園林深處。萬紫千紅。無一非花。而菊則韜光匿采。不屑與彼趨炎附勢者較。菊其真不識時務者哉。

豈其品列下乘。不克與桃李而爭一日之榮乎。抑物無特操。不足步蘭蕙以博羣衆之歡乎。皆

非也。江南地暖。百卉造作無時。凡花之盛於春而實於秋者。僅能爭妍夫春。不能戰勝於秋。以秋主肅殺。萬物凋槁。苟物之器小質弱。無節操之可言者。莫不與草木黃落之歎矣。何論乎桃李。而何有乎蘭蕙。

菊何如也。菊獨以秋花。悅茂於風霜搖落之時。視蒲柳之望誰先。比松柏之凋尤後。百年易過。九日重遭。葉則碧翠。爲盡人所欣賞。至陶靖節。尤甚愛之。而菊名益重。菊其介烈高傲。得秋獨厚者歟。

然菊品尤多。有黃白淺深之不同。菊之黃者。未必皆勝。菊之白者。未必皆劣。愛菊者。亦視菊之爲質何如耳。若單葉小花。嫵娜嬌姿。鮮鮮作堆。斑斑無數。是菊雖以花名。要不可同日而語也。

山林好事者。以菊比諸君子。是君子而有威儀者也。不第此也。有色矣而又有香。有香矣而復有態。是花之尤者也。惜乎秋將老矣。序次易代。好花滿目。主人何在。年復一年。旣無心於鑑賞。冀逸興於將來。

說蟹

蟹爲水族。亦爲足節動物害物之一種。以其味美。我國人幾皆嗜食之。每當蓼紅蘆白。水國秋深。相約二三知己。持蟹數十隻。或尖或團。煮於沸水中。殼變爲赤。盛之以盆。各取一只。去其殼而和之以薑與醋。爲下酒物。其視夏初之鱒魚。秋初之鱸魚。有過之而無不及焉。

蟹有二種。一曰湖蟹。一曰海蟹。湖蟹產於吳。海蟹產於浙。吳越之人取蟹。編竹以障之。

謂之蟹竹籩。日間不能得。多在夜間。張之以燈。蟹性喜向光明。漁人乘機而捕之。無一得脫。出售於市。是謂蟹市。

蟹市最盛於秋冬間。售蟹者終日不遑。夜以繼之。迨夫夕陽在山。萬家燈火。每見街頭巷尾。燎戶林立。相距約數十武爲設灘之所。每所有蟹數簍。互相爭售。以售罄而後止。相偕負資而歸。

購之者其用甚夥。若以沸水煮而食之者。謂之煮白蟹。有胥然而骨肉解之者。謂之蟹漿。此外則以蛋掉和之作爲餡饌。俗名蟹糊。味頗適口。然性甚寒。而不宜多食也。

所奇者。春夏有蟹。而食蟹者必以秋。亦捕蟹者多在秋。蓋蟹非秋而不飽。不飽則食之無味。此古人有九月團臍十月尖之句。作爲明證。况乎稻熟之期。紫蟹橫行。鉗蝕其穗。而不利於農。故農人乃捕而食之。以除害也。

雙十感言民國三十六年

雙十節者。我中華民國之紀念日也。辛亥武昌首義。全國響應。未及一月。革命成功。祛專制而建共和。徇民意以應天庥。匪特曠代所未聞。抑亦舉世所僅見也。言念前勞。不敢泯滅。於是乎以每年十月十日定其名曰國慶。稱其節曰雙十。屬在國民。不可不有以祝之。祝之者何。非徒懸旗提燈。即可謂點綴和平。盡慶祝之能事也。所望我國最高領袖暨當地長官。應以一切言行。本愛國愛民之真正誠意。把眼前合理的建設。復興起來。在政治上確立鞏固基礎。在經濟上展開公衆信仰。在文化上貢獻世界文明。這可說苦盡甘來。我人民應如何表示最誠摯最感奮的敬意。而實行慶祝。

第不知今日之所慶祝夫雙十節者。其河山之風景。猶是點綴夫亞洲大陸者乎。人民之興奮。猶是規復夫三十六年前之情緒者乎。國旗其無恙乎。絃歌其如昨乎。紀念者應亦紀念其今日之雙十節。而追念夫昔日之雙十節也。

不有昔日之雙十節。何有今日之雙十節。秉國者。追憶曠世之勳。用垂令辰之典。將見歌之誦之者。各界之慶祝夫雙十節也。鼓之舞之者。萬家之慶祝夫雙十節也。俾今日之慶祝夫雙十節者。與昔日之慶祝並傳不朽者矣。

不第此也。惟其有今日之雙十節。乃可有後日之雙十節。則後之視今。亦猶今之視昔。故國患雖亟。慶祝如故也。民生日蹙。慶祝不懈也。國基尚在。非待土地盡行喪失。則慶祝之聲。不聞有置若罔聞也。民心不死。非遲至家室淪亡。則慶祝之事。不見有視若無視也。節在則人在。人在則國在。吾敢恭而敬之曰。雙十節之進退。中華民國之存亡繫焉。

冬至感言 民國三十五年

月在仲冬。古名暢月。一陽之始也。陽氣動於下。斯暖氣即伏於地之中。於斯時也。候應蕪吹。圖堪梅數。霜葉染紅。雪花飛白。農事方畢。歲功告成。固非涼風至。白露降。而作三秋之感。大有水始冰。地始凍。以待來歲之宜矣。

此何時乎。謂非北半球夜最長日最短。太陽行至黃道上之最高點乎。即所謂冬至點也。距小寒三十日耳。世界各國。略有不同。或爲六日。十五日。及二十六日。惟以仲冬之候爲準。夫仲冬子月也。子者滋也。言萬物滋於下也。故詩云。冬至陽生春又來。

春者歲之始也。所謂春者。非一歲之始。乃四序之終。回視去年之冬至。烽火驚心。狐鬼逞

志。有不少點綴品。足供吾人之紀念者。轟炸莫如飛機。避彈莫如防空壕。宵禁莫如燈火管制。耳所聞者鳴嗚警報。目所接者疊疊尸身。亡國之痛。滅家之慘。未有甚於此時者也。曾幾何時。而烟消火滅。侏儒小子乞盟於城下矣。冬至不祥。言之痛心。

雖然。已往之冬至。不再來也。嗚呼。往而不返者其惟時。層出而不窮者其惟事。事固可隨時而發生。非若時之指日可待也。故今年之冬至不足喜。去年之冬至不可忘。而明年之冬至尤不可忽。

瑞雪兆豐年說

歲暮天寒。朔風四起。濃雲密布。無水不冰。非天將下雪之景象乎。雪花既降。隨風飛舞。朵朵若絮。散布天空。愈飛愈大。漸積漸厚。多則盈寸。隨處皆是。老樹枝頭。萬山嶺表。風景豁然一新。已成一片銀世界矣。

農人告余曰。此瑞雪也。何爲乎來哉。夫農民之耕田也。終歲勤動。不敢少休。所望者年豐耳。設不幸而虞荒旱。或不幸而患雨水。則秋稔無望。農民苦矣。然而蝗蝻成羣。螟蟲結隊。最足以殃及禾黍。害及田疇。農民亦未許樂觀也。自有此雪。則多數有害昆蟲。蟄居田間者。皆將凍斃。至來歲可望豐年。則雪之有關於農民。較晴雨而彌覺寶貴也。

但近數年來。冬季氣候較暖。富者無藉乎禦寒之具。貧者不開乎號寒之苦。則六出之花。豐年之望。久已此調不彈矣。今年則天寒倍至。大雪紛飛。先後已見兩次。且聞各地有同時下雪。同樣大雪者。豈迭經大兵之後。天道好還。人心未去。有晉占大有之年者乎。

未可知也。物極必反。天演使然。方今民食維艱。斗米成萬。貧民相繼餓斃者無算。而奄奄

垂斃者。亦不知凡幾。故天心悔禍。大雪下降。以慰農民者蘇吾民。餓殘年者待來年也。雪窗無事。讀古人瑞雪兆豐年之句。不禁拭目以望之。

謝年與迎年

同是年也。此則曰謝。而彼則曰迎。迎與謝各有用意。均人爲之。有以表天時之遞嬗。與夫人事之推遷。似人之於年。不可不謝。亦不可不迎。一謝一迎。而年已成。

謝者何。相離而不相合者也。迎者何。相卽而不相離者也。故言謝者。自爲一歲將終。方且謝絕之不暇。而往迎者。自爲一歲肇始。亦且歡迎之不遑。二者背道而馳。有消極與積極之分焉。豈真人爲之觀感。動關年事之進止也乎。

所可笑者，一方面循例謝年。一方面又接蹤迎年。不知同此人。同此年。何謝之有。何迎之有。曰。有不同。爲其人有貴賤耳。貴者可以謝年。又可以迎年。貧者不知有謝年。故亦不知有迎年。是則年關之過度。與年事之點綴。貴者有之。賤者則無。此其年之若者謝而若者迎。往見不同之點。乃以人之貴賤而定之也。

反是。則無貴無賤。而謝年與迎年又若合符節焉。貴者以己身之地位。與倖運有莫大之關係。關於一年之計。在將終時。不得不言謝。謝者感謝也。又在開始時。不得不言迎。迎者歡迎也。其在賤者亦有絕對之表示。以地位與倖運有大大不利於己之處。乃委咎於流年所致。於是年將終了。亟求辭謝。不敢挽留。以洩憤也。來歲方新。迎新去舊。一聲爆竹。五體投地。以求伸也。此又人之不以貴賤。而有年必謝。無年不迎也。

雖然。年者猶是年。不以謝之而減色。亦不以迎之而增光。蓋其迎之而來。先應謝之使去。

故年復一年。過去者已成彫謝。而年不一年。未來者靡不逢迎矣。

睡鄉遊記

小子不幸。生當亂世。作客凡四十九年。不知置身於何地。去吾國相約不知如千里。夙稱有黑甜鄉焉。別號睡鄉。是鄉也。別有天地。風景幽絕。雖無良田美地桑竹之屬。而屋舍儼然。故睡之人。每當夕陽在山。月落參橫之候。夜半神倦。摒當一切。而一至焉。至之者。無分富貴。不論窮賤。不計上下。不問公私。皆除去形神之擾。謝絕塵世之勞。安步以當車。恹恍乎如憑虛御風。而無乎不可至焉。至則略事休憩。欣然而作睡鄉之遊。

入其境則野無曠土。叩其民則民無游民。歷覽景物。則無景不佳。無物不有。儼然世外。如在仙源。况乎雞犬不驚。河山無恙。以故人咸慕是鄉。而樂爲之遊焉。此真太平之鄉也。塵世間安得有此哉。

鄉在邯鄲之南。阡陌縱橫。田疇交錯。奇花異樹。相映其間。有幸子及陳博者。相傳衣食於斯。數千年不變其俗。故其民情風化。相習誠樸。不慕利祿。無事爭競。安居樂業。宴如也。有勝地數處。一名息影別墅。去邯鄲太遠。道路曲折。雖無車而交通無不便。故無不可至焉。

其次則東山小榭。相與隣比。謝太傅之舊遊處也。地以人傳。視息影別墅。直過之無不及焉。乃自南而北。遙見雲間仕女。雙宿雙飛。嬉嬉焉。如登春台。樂其地而忘人之道。子孫萬世。終老是鄉。倘所謂溫柔鄉非耶。

偃子告予曰。溫柔鄉人心不古。開化最早。人非浪漫。不可以久居。其毋樂此不疲。請迴俗

士駕。予憬然以悟。含其道而弗由。一夢驚回。不知東方之已白。

無錫縣誌

無錫縣境。位處京滬路之中樞。東接常熟。南濱太湖。並交吳縣。西瀕宜興武進。北連江陰。港汊紛歧。人口稠密。全縣有三千六百五十方里。人口有一一九一四五人。水路有運河太湖。陸路有錫滬錫澄錫宜及蘇錫公路。橫貫隣縣。實一江蘇省中交通及工商業之重鎮也。全縣共分十區。八十一鎮。一百二十六鄉。二〇二八保。二二八四三甲。二四九〇七一戶。內壯丁佔十萬二千餘人。較事變前人口統計不無增加耳。

事變以前。工商之盛。爲本省各縣冠。市街以北門爲最繁華。次爲南門清明橋。再次西門吊橋。西門多工廠。堆棧則散立於運河兩岸。每逢米繭兩市。貿易甚盛。至於東門則雖有工廠。而無市塵之可言矣。

文化發達。當推小學。全境有縣立小學在城區者。計四十八校。學生共一七二六名。教員有四百六十七。其在鄉區者。計七校。分佈東亭。長安。張涇。安鎮。蕩口。前洲。及新濱諸鄉鎮。學生共二〇七九名。中學私立共九校。學生二六三三名。此外尚有民教館及圖書館等。文風之盛。在本省當首屈一指也。

無錫與南通夙稱模範自治縣。工業如絲廠。棉紗廠。棉織廠。針織廠。麵粉廠。榨油廠。碾米廠。男女工人幾近百萬。其他新工業。則有製鏡。電氣。印刷等。至商業以米爲大宗。此武進。宜興。溧陽。以及皖省之米。均集中於此。以運往蘇滬浙等地。其次爲絲。閩邑繭行不下百餘家。除供本城外。則運往上海。故市况甚盛。而歲入亦可觀也。

麥與稻兩種。爲農作物之主要產品。此外育蠶養魚。亦爲本縣農村之兩大副業。鄉民儉樸。每於脫售鮮繭之後。均從事於刈麥與插秧。工作頗爲緊張。清和四月。鄉間所謂農忙也。

弔關北戰地記

有地焉。不草不木。忽風忽雨。暗無天日。凜若霜晨。夜有鬼火。四無人聲。此何地耶。警長告余曰。此今戰場也。位居滬北。地廣人稠。天心不弔。禍亂相循。始而內戰。有齊燮元與盧永祥之兵爭。繼而強隣壓境。有一二八與八一三之一戰再戰之糾紛。小民何辜。屋舍夷墟。嗟此赤地。言者心痛。聞者氣結。能不悲哉。

距滬北尤遠者。遙觀川湘桂粵。同遭兵燹。今之邱壑。骸骨成林。今之關戍。流血成渠。朝餐風雪。夕與鬼隣。一路鬼哭。天陰則聞。嗚呼噫嘻。誰爲戎首。興師黷武。一朝屈伏。殺不可恕。何日洗兵。奠定中華。

與我國發生戰爭而國亡家破者。更有德義諸國。肆一人之猖獗。殞萬命於流離。當其豺狼趨勢。狐鼠乘時。兩軍對壘。殺氣奔騰。或全軍而瓦解。或盡室以身殉。赤血殷紅。青燐慘綠。登高一望。此地爲墟。東西馳驅。不知其幾千萬里。亡國之痛。非有百倍於我國戰地之蒼涼者乎。然而貽禍匪淺。啣恨何已。

尊孔說

孔子尊王者也。由孔子而來。在過去二千餘年中。君人者無不尊孔子爲萬世師。蓋其尊周

室。攘夷狄。明貴賤。辨尊卑。皆尊王之明徵也。故尊孔者尊王也。

王道著則聖道有因時制宜之妙用。聖道立則王道有歷久不渝之倖運。故王道一日常存。卽聖道一日不滅。聖帝明王不能棄之。賢人君子不能違之。雖下至蚩蚩者氓。亦不能漠視之。則禮之爲用宏矣。尊之不可已矣也如是夫。

考孔子誕生於周靈王之廿一年。至今中華民國八月二十七。爲孔子秋祭之日。屬在國民。拜跪荐祭。其祀典之盛。所謂自有生人以來。未有如孔子者。蓋不如是不足以知孔子。

論孔子之學者。以孔子祖述堯舜。祖述者。率性而已。故孔子祖述堯舜。而後知皇古無稽之事。不必侈爲美談。孔子憲章文武。憲章者。修教而已。故孔子憲章文武。而後知末世瀆亂之書。可擯而不讀。尊之者尊孔子之道之法也。

考孔子之行者。以孔子盡己爲忠。及人爲恕。夫天下稱一心者莫如忠。貫衆事者莫如恕。知忠而本原之地。有以自立。知恕而事物之間。各得其宜。孔子一以貫之。尊之者。尊孔子之忠之恕者也。

其有不尊孔子者。向魑之亂。叔孫武叔之毀也。之二人者。其真不知孔子者也。民國以來。政治革新。一度而廢祀孔。蓋趨勢使然。非不尊也。不久而饗祀如常。至今勿替。則爲孔子者。是真不幸之大幸矣。

論鄭伯克段

問讀左穀二傳。知鄭伯克段於鄆。以克段之罪。罪鄭伯。乃後世爲之辨誣。亦以鄭伯爲縱惡養奸。釀成兄弟之禍。而傷母子之恩。則鄭伯殺弟之罪案。雖歷數千年。難以逃論者之指摘。

矣。

然段縱爲鄭伯所克。而殺諸鄆。是真鄭伯殺之乎。抑段自殺之乎。曰。母殺之也。段何以爲母所殺。以婦人愛其少子。姑息容忍。無所不至。始而縱之。繼而誅之。終則悔之。自古母子之間。嘗有顛倒播弄。而莫問誰是誰非者。溺愛使之然也。

而何以知其溺愛也。欲立叔段。亟請武公。此武姜第一縱段之明證也。武公勿許。爲之請制。此武姜第二縱段之貪慾也。至若太叔叛京。武姜作爲內應。此武姜第三縱段之大罪也。有此三因。而段乃妄自尊大。以母爲可恃。以兄爲可欺。卒至取諸其母之懷中。爲鄭伯所殺。豈知取諸懷中者。甚鄭伯之處心積慮。成於殺也。

或曰叔段。武姜所愛也。何以知其爲殺也。愛而勿勞。禽犢之愛。雖曰愛之。其實害之。幸鄭伯早已知段之跋扈。武姜之徧袒。而視若無睹。置若罔聞。迨襲鄭有期。興師而克之。非得已也。不然。則武姜之陰謀詭計。叔段之一朝醞釀所成。將見不利於鄭伯者。禍且及於鄭國矣。可不懼哉。

論岳武穆

有宋一代。雄師健將。能力戰自奮。與金人大小數百戰。而戰無不勝者。何人耶。莫不曰岳武穆一人也。

金兵侵宋。中原之地。爲金所據。時金有勁卒。宋師屢爲所敗。岳武穆起而率領步卒。與金兵遇。一時揮兵進擊。遂將金人所恃之拐子馬。斬殺殆遍。金人喪胆。宋師大捷。於是岳武穆之名。乃由郾城而直達奸臣秦檜之耳矣。

於是秦檜主張議和。以金牌十二。召武穆班師。武穆不敢逆旨。乃假旗息鼓。中檜賊之計。搆金人之和。然以武穆之智。未嘗不知急於班師者之不利於宋室。何不一鼓作氣。置君命於不顧。則渡河北伐。驅除金虜。宋室或可轉危爲安也。而武穆計不出此。以身許國。祇知有君。獨惜武穆以忠君之心太深。而愛國之心爲不足耳。

且也武穆豈不知爲檜賊所忌也。忌之亟宜避之。而班師何爲耶。避之愈速。而忌之愈深。故武穆郟城之捷。正檜賊喪胆之時。而無法以控制之。矯旨以號召之。則武穆之功大矣。武穆之功愈大。則檜賊之地位愈危矣。惟以議和爲名。則武穆之功掃地以盡。而檜賊之計。如願以償矣。是則召之惟恐不速者。蓋其忌之有以使之然也。而武穆不顧也。一書丹詔。便卽班師。獨怪武穆不能誅檜賊之陰謀。而反爲檜賊誣爲謀反。冤沉大海。千載不白。惜哉。

記桃花源

桃花源果在何處耶。自陶淵明有桃花源之記。而桃花源之境。至今以傳。讀陶淵明桃花源記者。心嚮往之。輒欲一造其境。而不可得。然則桃花源果在何處。誰得而問津者。

謂桃花源爲幻境。而非真境。則桃花源記。陶淵明所敘述之人情風俗甚詳。似非虛構者。而何以後之人不能往耶。豈桃花源真無是境耶。抑爲陶淵明一人所獨有。而不肯告人耶。思之又重思之。吾不能無疑焉。

疑者何。疑夫陶淵明所著之桃花源記。一幻想之意中桃源。而非世外桃源可知。蓋陶淵明自以先世爲晉輔。不肯屈身事宋。故潔身肥遯。神遊方外。幻而爲桃花源之境。則桃花源之境。非陶淵明之有懷欲白。退隱柴桑之變相也乎。

嗚呼。掃盡狼烟。祛除荆棘。則樂郊樂郊。何地而非有人之桃花源也。否則舉世擾擾。戎馬頻仍。桃花猶在。勢變境遷。則又無往而非陶淵明意中之桃花源矣。

秦始皇焚書坑儒論

以焚書坑儒罪秦始皇者。千古不易之定論也。予獨以爲不然。何則。當秦之世。夷狄爲患。目無中國。苟無秦始皇。奮其出衆之才。教其有爲之氣。出師夷狄。奠定中原。則中國文物之邦。不且俯首下心。淪爲夷狄矣。斯文未喪。國粹保存。未始非始皇一人之力也。

然秦始皇一武人也。承戰敗之故。以武力救國爲心。輕文重武。戰勝六國。而稱雄於世界。則立國之精神。吾知其殫精竭力。指導國民。相率羣趨於戰鬥之力而已。何事於書。何咎於儒。更何暇計及夫焚書坑儒。乃世以焚書坑儒罪秦皇也。曷故。

是蓋淫辭惑亂。邪說橫行。其書皆非有用之書。有不得不焚者。與夫經教毀廢。古議凌替。其儒亦非有爲之儒。有不能不坑者。一以刷新政治。一以整飭學風。斯二者。世皇勤策遠略。未有能親者也。在朝有其人。在野有其人。然以事屬創始。名教攸關。始也假手於始皇。繼則捏名於始皇。終乃歸咎於始皇。始皇於是爲千古名教之罪人矣。

豈知秦皇焚書。夫民間之書。宮中之書。所焚何書。始皇不得而知也。後世亦不得而知也。秦皇坑儒。夫咸陽之儒。遺逸之儒。所坑幾儒。始皇又未嘗過問也。今世亦未嘗過問也。由是觀之。則始皇焚書。書固未盡焚也。始皇又坑儒。儒固未盡坑也。不然。蕭何入秦宮。何以來律令圖書。二世召諸生。又何有二千餘人。述春秋而對者乎。世其奈何沒秦皇攘夷之功。而以焚書坑儒揭始皇之罪。豈非春秋責備賢者之意哉。

改良家庭說

治國必先齊家。然天下未有不齊其家而可以治其國者。故易家人彖曰。父父。子子。兄兄。弟弟。夫夫。婦婦。而家道正。正家而天下定矣。此家之貴於正也。夫誰則能之。

正之者何。去邪崇直。於古謂之齊。卽今之推陳出新。惟一新名詞曰改良。其名雖異。其義則一。質言之。得乎理之正而已矣。合乎情之正而已矣。理也情也。卽所謂道也。父教其子。則父子篤。兄詔其弟。則兄弟睦。夫率其婦。則夫婦和。導一家予情理之中。不偏不倚。此之謂家齊。

家者家庭也。齊者改良也。君子有家庭。小人有家庭。君子而不知改良其家庭。則君子而小人矣。小人而能知改良其家庭。則小人而君子矣。然則改良之方針何在。改良之目的奚若。非僅僅修葺牆屋。羅列珍品。購置器具。遂得謂之改良家庭而已也。

循循乎家人父子之間。有無禮之專制。無情之束縛。均得爲之力謀解放。有不良之行爲。均得爲之厲行解除。不平等者。無背乎名分而平等之。非共和者。無傷乎和氣而共和之。如是則家庭雖舊。而名義自新矣。以之改良家庭。豈不綽綽然有餘裕哉。

吾見今日在自稱所謂新派之青年男女之改良家庭者矣。以不受家庭之約束爲平等。以不遵師長之訓導爲自由。對於父母而不以孝聞。對於兄弟及夫婦而不以友愛稱。則文明自詡。倒亂自居。猶詡詡然自號於衆曰。我之家庭之不良。而改之使良。是真愈改而愈不良矣。夫所謂改良家庭者。其必以得乎理。而合乎情之正。不新不舊。其庶幾焉。

說蒲柳與松柏

大凡物之盛於春者。必衰於秋。遑論夫冬。非秋與冬故與物摧殘零落也。乃其實之不堅。性之不烈。故拂之而色變。遭之而葉脫。不容於秋。而見制於秋。不畏夫冬。而終老夫冬也。若松柏者。其實堅而其性烈。不屑爭妍於春。而乃獨秀於冬。固遠非蒲柳之比矣。

夫蒲柳何如物也。有應時之特色。有媚世之根性。當夫春夏之交。大氣融和。萬物得時。欣欣向榮。凡與目之所接見者。非其皮之綠與紅。卽其態之嫵而媚。若松之筠與夫柏之操。則雅尙高潔。不事粉華。是蓋湮沒而不彰也。

然而松柏雖不見容於春。見重於夏。而爲剪葩綴葉。以取悅時人之目者所忻慕。迨至秋風一起。則黃松翠柏。非但不受制於秋。抑且戰勝夫冬。孤幹挺秀。大器晚成。然後知松柏之後彫矣。以彼趨炎附勢如蒲柳者。夫固未秋而先槁矣。

然則舉世混濁。人亦何貴有此蒲柳哉。不知貞烈之桂。隱逸之菊。皆蒲柳之流亞也。然而世無蒲柳。則不知其有松柏矣。人又何輕視夫蒲柳也哉。有蒲柳斯有松柏。相形之下。何去何從。人其審察乎蒲柳而勉爲松柏焉可。

說嗜好

嗜好謂之不良行爲。嗜好亦謂之異種品性。盡人所有者也。人非木石。安有無嗜好者乎。但嗜好有好惡之分。好者善用之。則爲聖賢。惡者不善用之。則爲盜賊。在乎能自擇其嗜好焉耳。

何以言之。孔子疏食飲水。曲肱而枕。孔子之嗜好也。顏子箪瓢陋巷。不改其樂。顏子之嗜好也。此卽嗜好之善者也。鷄鳴而起。孳孳爲利者。盜跖之嗜好也。此卽嗜好之不善者也。擇之者。擇其善者而從之。其不善者而改之。則嗜好尤爲自擇者所運用矣。

其有不能運用者。謝傳圍棋。伯牙操琴。陶潛醉酒。李白賦詩。皆嗜好之加於人上。而爲常人所不能望其項背者也。故其名由嗜好著。而其人亦由嗜好傳。卒之文章事業。赫赫在人耳目。爲後世所推崇。是嗜好乃適應環境之用。正未可倖求者也。

若夫不良之嗜好。不但足以累其身。抑且累其家而有餘。吾見夫耽於酒色。弱於賭博。濫於交游。樂於揮霍。斲喪日甚。罪戾踵至。即使徼天之福。不死於刑。然其身終不免於自戕之一途。此猶得曰嗜好負人。特人不能自擇其嗜好耳。

故同一嗜好也。嗜好聖賢。則聖賢矣。嗜好盜賊。則盜賊矣。前者吾盡力以求之。後者吾量力而避之。如是則世無盜賊。人皆聖賢。國其有瘳。而天下自平矣。

擬武林遊記

予家故居無錫北鄉。羈居上海法租界有年。事變以還。八年之內。蟄居寓所。日惟以讀書爲事。而不問其他。顧學業勞人。終日無間。民國三十四年。歲在乙酉。暮春之初。上海各校以時屆春節。而放春假。余雖亦有春假之暇。而不能作春遊之舉。枯坐無聊。爰將見聞所及。擬作武林遊記。夢想也。遺興耳。

武林俗稱杭州。距上海四百餘里。乘火車祇五小時可達矣。有公園焉。位於裏湖之前。外湖之後。間有樓臺亭榭。蔚爲大觀。聞此園爲前清乾隆帝行宮。民衆出鉅資所造成者也。而今

迺返諸民衆矣。

循公園前後有西湖。爲杭州最著名之勝景。湖之中曰孤山路。下有草堤。湖之北曰北山路。寶石塔與靈隱寺等皆在焉。湖之南曰南山路。高望雷峯。遠望錢塘江。登鳳凰嶺。湖九溪而上之。得十八澗泉。流連風景。大是宜人。不禁有世外桃源之慨焉。

湖濱有岳王墓。位於西冷社之側。距蘇小墳僅一里許。則見夫墓以內古柏參天。墓之左有鐵像四。卽秦檜等是。秦檜者。殘害忠良。釀成徽欽二帝之北狩者也。臭名千古。罪不可勝誅矣。

余慕武林遊。余從未作武林遊。往往因思念之殷。而形諸夢寐。非一日也。今值春假開始。游人逐隊作武林遊者。斂光鬢影。仕女如雲。滬杭路上。絡繹不絕。余則徒呼負負而已。然余有此記。而無所遊。真可謂夢遊武林焉耳。

民國二十二年雙十節新開篇

萬樹西風葉葉秋。一年容易月常頭。（記得昨宵是）三更燈映連珠浦。（到得今日是）五色旗翻出畫樓。大地春回雙十節。普天國慶歲時週。（耳聽得）中西軍樂凌霄漢。（眼見得）紅白電光射斗牛。（你看他們學界是）結綵懸燈來會合。（工界是）化妝鬥技出門遊。（農界是）田歌笠屐盈千畝。（商界是）雲集梯航冠五洲。（更有那軍界是）迅掃狼烟雲共捲。（還有那官界是）周諮象教政應逾。（好說是）千秋金鑑無私照。（到後來）萬斛明珠詎暗投。（想當年）渠容也教征鼓息。兜鈴不見陣雲留。（莫漫說）自由平等爲儀式。（可恨他）萬衆一心舉德輶。（豈知道）旭日東升凌上國。（祇落得）蕭牆內閔賦同仇。（最可

喜)攻遊行竊轟盤磨。(誰教他)助滿稱皇疾置郵。(曾幾時)三省忽聞傳檄定。(因甚事)一籌莫展把兵收。(任憑他)空山饑犬聲如豹。(害得我)失路窮黎狀類鳩。(真叫做)塞外全無乾淨土。(那曉得)滬濱也起亂離愁。(我十九路)三軍髮指詔元直。(我蔡軍長)一箭功成昂仲謀。(嚇得他是)深巷屐回忙兔脫。夜潮鼎沸瀉龍流。恨只恨。半途兵退全功棄。(怕只怕)同室戈操相效尤。(望只望)捐私見。解內憂。兵戈洗盡冷貔貅。(慶只慶)民情改善馴秦楚。國事更新媿魯鄒。(祝只祝)日月重光調玉燭。河山統一鞏金甌。

民國二十三年新年開篇

一聲爆竹萬家春。物換星移歲又新。喜只喜。鑼鼓喧傳迎首祚。恨只恨。干戈載焰動邊塵。營私植黨儕神鬼。愁只愁。地哭天荒孰主賓。笑只笑。年少投機皆政客。歎只歎。老成救國屬軍人。苦只苦。遼東三省先糜爛。怨只怨。閩北一隅肇禍因。到如今。無計弭兵憐向戍。捨身殉國失張巡。更難堪。華北繹騷危社稷。初不料。閩南倉卒據城圍。勢必至。雙方奮鬥勞軍士。一片災殃罹國民。弄得來。滿地春風森劍戟。一天春色莽荆榛。非但是。學士書空吟夜午。農民齋斷話朝辛。尤其是。勞工破產難恢復。商賈生涯蹶不振。真叫做。直搗扶桑成夢想。掃除伏莽費精神。曾記得。民元肇造占壬子。到後來。帝制摧殘溯甲申。實指望。拯起蒼生歸謝傳。輸將丹個勝曹彬。不消說。梯山航海兼程到。都道是。白日青天一色勻。那主席。權秉恩威施秩秩。才兼文武治斌斌。那國民。奉公守法淡名利。坦白輸忱泯域畛。誰曉得。廿載流光三反覆。中原蕩板衆頑嚚。只見他。大家樹黨來開仗。倒叫我。何處桃源可避秦。獨不思。同室相爭非上策。席珍待聘好安身。但願得。河清海晏昇平頌。正不妨。翠

柏黃松點綴貧。要知道。下禮謙躬爭氣節。尊文耀武展經綸。管他鼎席聲華懋。還我河山面目真。望大衆。珍重民元廿三載。誕登壽域八千椿。好教我。年年慶祝滬江濱。

遼雁哀鳴新開篇

蕙死蘭摧荻滿洲。雁聲南帶北邊秋。爲甚麼黃龍塞上征夫怨。丹鳳城中少婦愁。都祇爲跋浪鯨魚發狂病。入關鼯鼠逞陰謀。直從上國來開釁。結下中原不解仇。眼見得轉戰瑯戈搃漢渚。長驅鐵騎擾神州。耳聽得機聲驅盡松梢鼠。砲火驚殘隴上牛。漫說斜陽仍故道。可憐衰艸盡荒邱。這邊是棘荆鬼泣春花路。那邊是芳艸烏啼暮雨樓。一般無恥的南面稱尊忘失鹿。一般適意的北窗高臥對眠鷗。有誰知驚弓幽鳥迷歸路。貪餌纖鱗誤上鈎。要知道赤胆忠臣流熱血。蒼顏遺老淹浮漚。說不盡腥膻遍地委沙磧。尸骨堆山棄道周。好可憐八百男兒橫遭軍鼓毀。三千瓦氏難避檻車幽。終算得功成一戰歸良馬。力掃千軍割沐猴。大不幸援絕關中行不得。盟尋城下復何求。不消說空懷報國復仇恨。恰好離鄉出國遊。失地多。付水流。十年功績嗟行休。浮生滄海命難保。抵死沙場志未酬。莫學他賣國求榮尋出路。故鄉衣錦傲封侯。從今去昇平世界風波靜。只贏得破碎山河日影留。恨只恨坐視妖星施魔術。諱言抗日串花頭。莫怪着老馬蹶雲悲伏櫪。只恐怕飛蛾羈鑣欲騰躡。最難堪禍生肘腋恐非福。到後來病入膏肓永不瘳。

中華民國二十四年雙十節開篇

十月爲陽天氣新。陰陽合曆看扶輪。有的說大庾嶺上梅開日。有的說彭澤湖邊菊放辰。自古道月是稱良就盈數。日從陽朔正初旬。正所謂花晨月夕渾無比。飲腊吹商擬不倫。只叫做革命產生光武漢。從風響應話春申。想見那虜廷推倒占趨勢。民國告成從善鈞。因此上日月光華歌復旦。江山統一慶長春。眼見得燭天燈火延千里。耳聽得遍地笙歌鬧四鄰。恰好說嵩嶽千秋調玉燭。梯航一路滌珠塵。豈知道神樞正擬同扶漢。那曉得樂土無端舉避秦。都只爲朝野干戈常不息。所以是河山風雨失相親。到如今國家久作滄桑變。將士甘爲社稷殉。說不盡寇患匪氛相繼起。早乾水溢踵頻陳。最難堪過河忽聽枯魚泣。行路愁聞小鷓呻。豈惟是南畝鞠荒公電急。尤其是北郊告警羽書頻。雖說我胸無今古詩無敵。舌有風雷筆有神。畢竟是救國有心餘涕淚。匡時無計老風塵。飢生火。凍負薪。阮哭稽狂淚拭巾。莫漫說舉國若狂淡名利。且說是普天同慶效眉顰。年年此日滬江濱。

民國二十四年元旦新開篇

爆竹一聲歲又新。家家門帖換宜春。(好容易)星迴北極正黃朔。日麗東郊擁絳輪。(好說是)邪辟桃符除夕盡。歡迎臘鼓點陽勻。(那青帝)分司藁鑰中天立。令布陽和益地陳。(要知道)善政由來推令主。仁聲到底有全民。幸虧是調和玉燭乘時起。運轉金樞向日伸。(眼見他)德備柔剛瞻骨格。才擅文武奮精神。(耳聽他)挽回兩大精惟一。崇尚四維御可眞。(都只爲)興學類多輕薄子。經商泰半治遊人。(說不盡)摧殘工運謀生拙。(免不了)倒亂農耕聽處頻。(自只得)道衍薪傳勤棄莠。(也只好)化徵艸偃快披榛。(第一是)禮昭身度看言合。(第二是)義秉心裁更善鈞。(第三是)取勿傷廉澄吏治。(第四

是)免而無恥萃儒珍。(無非是)情殷保衛孚荃幸。(要不過)力制敷施汎愛親。(好教一個個)整理衣冠旒秩秩。(還望一年年)化除畛域治斌斌。熙南極。拱北辰。寰海鏡青靜不塵。海寇歸降勞策勳。島夷懾服被陶甄。(從今後)年年滬海祝元辰。

復侯保三先生由福州省公署來書

保三我師大人鈞鑒。敬復者。駕滯南游。一句歡隨歇浦。款慚東道。三尺幸厠程門。命葡萄酒以吟詩。咸說追蹤魯鐸。飛羽觴而步韻。自知濫奏齊竽。居然春艸池塘。客舍結廬山之契。忽爾曉風楊柳。陽關興載道之思。鶴首難追。有羨春風之快。鷗波無恙。空懷秋水之長。未展寸丹。直擬銘情於竹。先施尺素。不殊慰語如蘭。點點桃猩。吹來一天芳訊。絲絲柳翠。牽盡兩地相思。何日錦帆。會見芰荷之初製。一時詩鉢。重尋桃李之舊歡。小子負缺狂歌。啓箋匆答。荷承雅允。強拊駢聲。福候起居。恭維鑒納。

復周慕范書

慕范先生執事。屈指別離恨。驚心三十年。自錫驥附追陪。不吝賜教。在申驕從蒞止。偶獲談心。滿擬啜茗言歡。每逢星期日。挑燈話舊。恰好陽歷春三。無如困守郵工。膠擾塵囂。洎無餘力。鮮有曠時。鴻慕情殷。晷趨願阻。端被公私作祟。非關南北殊途也。前奉手畢。因病稽誤。不卽報謝。良用歉然。辱荷下問。能不關懷。所恨今非昔比。事事雖曰公開。掬誠相告。其如強權戰勝公理何。簡賢進能。在今日已成過去分詞矣。然弟亦自忖好事

者。苟或耳目見及。機緣巧遇。自當專函。以報台命。

謝箋代秦怡安作

敬啓者。怡安秉迂拙之才。膺繁重之職。時虞隕越。勉効馳驅。深幸共事裴王。寵錫南車之導。交情鮑謝。榮分東壁之輝。垂青有加。建白無自。竽充滬局。空費廿五年之駒光。檄走榆城。何惜三千里之鷺振。傾心風雨。移我情於霏玉粲花。回首雲山。謝君惠於聯茵接席。興懷醉飽。刻骨感銘。並荷於歇浦潮漲時。徧勞枉駕。將見於峨眉月落後。惹起相思。看此日驥附暫離。愁折旗亭之柳。倘故人塵教不吝。歡迎驛路之梅。茲值炎伏初臨。卽乞珍餐自衛。

箋啓代屠副郵務長家驊作

拜啓。家驊江南頑璞。滬上濫竽。遑辭慢命之愆。遂辱知心之契。方擬忝附驥騫。藉答垂青。不圖采及葑菲。已驚薦墨。陽關三曲。難遣別緒於當筵。河滿一聲。空留相思於異地。所願南雲不棄。卜他年舊雨重逢。北館匪遙。祝闔第新春無恙。謹泐數語。聊表寸忱。

餽燕石觚翰小啓

緒承梁溪末學。歇浦勞工。擱筆三十年。王元偉文章不事。廢書五千卷。徐孝穆吟詠何來。

况乎僚倒紅塵。雖非醉心花月。其奈蹉跎白日。等是効力馬牛。加以今後歐風。海上倡爲絕技。古來亞學。客中難覓知音。斯文將喪忽焉。此調不彈久矣。然而士安縱不才。猶識秦漢文字。揚雄雖少作。略知魏唐詩源。爰忙裏操觚。步枚皋之俳語。工餘弄墨。習胡叟之野詞。歎十八年負缺有歌。嚶效東施之獻。詠三百首畫蘆依樣。喜廣南國之歌。自知任昉文類。不同珠玉。陸澄辭汎。盡是糝糠。何敢云竊譽彫蟲。從吾所好。夫亦曰希聲附驥。教我以正焉爾。聊伸片語。謹奉一編。

遷居小啓代張克昌作

遷啓者。夙聞沛國劉尹。僑居汶口。安城周訪。寄寓潯陽。克昌救國有心。斧柯莫假。瞻家無術。轆轤爲勞。爰囊琴負笈以移家。迺祭竈請鄰而卜宅。一朝赴滬。終日羈郵。自愧庸庸。輒深悵悵。幸矢素交於天日。管鮑談心。輸丹款於晦明。尹班促膝。蕩鬱使暢。證風雨於夷塗。排拙爲聰。觀樓臺之近水。正宜松蘿相附。雲水同居。不意時局矜張。華北豈能鳩住。里居閒適。滬西聊可鷓棲。結屋三楹。雖無月榭風亭之勝。驅車十里。猶有集賢通德之名。可枉高軒。用掃塵封之榻。不吝渠誨。爲望驛使之梅。

太湖觀光團緣起

據美國人辦理旅行事業。都是全國大組織。上自總統府。下至城鎮鄉。所在皆有。不祇旅行社而已。質言之。卽任何人俱有匡助旅行之義務焉。返觀我國。以旅行之組織。其目的不過

爲游覽和娛樂。暨費時而耗金錢。目爲無足重輕。實則旅行卽教育。如欲求真確之智識。得永久之利益。此真昧於旅行所不能得者。往見久居城市之人民。終日兀坐。不出戶庭一步。既受不到日光照射。又呼吸着二氧化碳。縱世界上有種種奇妙之事物。目不一見。耳不一聞。謂非一識不知而何。語云旅行一年。勝於讀書五年。旨哉斯言。本會有鑒於此。爰發起組織太湖觀光團。爲我三十萬旅滬同鄉。求得一實習而真確之教育。顧其教育關於智識與精神。兩者有益。非僅爲尋歡。實寓有研究與觀察之意焉。况吾錫冠乎全省。全縣風景。南濱太湖。風景優美。毋出其右。有過其地而作遊觀之樂者。靡不有一番嚮往自然的心情繫焉。莫說魚是新鮮。花是美麗。那陽光完全免費。空氣不含過量的二氧化碳。草木精神。湖山名勝。一經求得。卽永爲人有矣。凡我同鄉。曷興乎來。

招飲啓事

逕啓者。節應玄靈。歲且更始。朔風極冷。傾玉醅於危樓。苦霧添寒。酌金罍於孤館。茲際灰移火變。背秋向冬。適逢本會新建落成。全部改組。雖無樓閣。朝夕爽愷之容。如見梓桑。春秋鑒賞之處。援周禮猶醴之意。薄具西餐。本饋食將賓之心。少盡東道。溯故鄉之碩望。莫逾
台端。卜廣廈之歡顏。矧周歲紀。莫辭節約。來豐鄉飲之筵。不盡光榮。請速高軒之駕。

上元節叙餐啓

敬啓者。遙睽

風采。又易歲華。循例賀年。及時行樂。自宜屠蘇置酒。試探梅訊於菱湖。元夜看燈。儘獻椒香於梓里。且適調辛之樂。暫分旁午之勞。乃得月有緣。望風莫及。邇際樓臺幸近。

山斗知尊。言念梓恭。何異蘇季還鄉之樂。舉行團拜。聊作陳平復社之圖。雖無賜爵傳牋。卻亦銘椒頌柏。伏望鳴珂十里。執先鞭於珠斗之東。下榻三椽。卜聯袂於濂溪之座。爰擇於農曆正月十三日下午六時。設筵於中正東路本會。以作春宴而事聚餐。務乞踴躍參加。不勝延企以待。

無錫旅滬同鄉會經募捐款建築新會所啓

夫鄉之爲地也隘矣。似不足以驗風化之隆。鄉之爲道也僅矣。又未足以登隆古之治。然而齒以居鄉爲尙。政以觀鄉爲先。分之爲一鄉之禮俗者。合之卽一國之治平。故庶燕譽而留賓。羣思豈弟。聽鶯鳴而求友。衆介獻酬。此揖讓而後升者。亦交接所由正也。至若遠適他鄉。跡喜萍蓬之合。暫羈異地。情思桑梓之聯。豈無傳舍是謀。將赴樂郊而息足。安得羈棲有託。大庇廣廈皆歡顏。是以援普安之募文。法柳州之捐冊。願爲領袖。集千腋以成裘。聊庇桑榆。架七松而造屋。截水添閣。環樹設堂。親見真宇之開。彌注宏構之飾。恍見蓉湖秋月。十萬人長在故鄉。何患歇浦春潮。三百里依然一水。敢言鄉人皆好。勝資樊澤之裝錢。必曰鄉音可通。齊耀史晨之家穀。所望輸錢踴躍。必仗助之如雲。將見卜築矜張。能落成於不日。瞻高樓之在望。指夏屋兮遙臨。倘荷效技於下風。敬求靈諾。祇此仰飲於清露。莫負勝緣。是爲啓。

歡迎隴縣長代馮雲初作

中華民國二十四年十二月一日。寶山縣長隴體要先生。榮長錫邑。惠臨滬濱。旅滬邑人。雲初等聞之。莫不喜形於色。額手稱慶曰。

先生之澤被寶山者。今且澤被無錫矣。我錫邑父老子弟。何幸如之。夙聞先生鴻漸華年。英銳稟金精之氣。蜚騰上第。風流工玉帳之書。甫由典學之司。便筮望郎之署。善政善教。服官著僕烈之聲。一德一心。率屬擅清剛之譽。爰申新命。遂隸雄圖。雲初等三生有幸。獲睹趙咏之神姿。一夕聯歡。更叨裴休之末座。此日觥籌交錯。聊伸東道之情。他年德惠並施。共祝萬家之佛。既表章夫花縣。自製錦於棗陽。用錫瓊瑤。愧乏彩毫之筆。稍酬樽酒。謹晉蕪蕪之詞。

無錫旅滬同鄉會創辦圖書館啓

古有藏書樓。古書如吳越備史。十國春秋。而世咸奉爲參考書也。藏書之最多者。於唐則有集賢院。宋則有景文院。元明內府所有藏書。亦不下於唐宋。類皆利用書籍以發揚文化。爲現時代所稱文化機關者近是。但從前之藏書樓。歷史上雖有記載。不過爲一種附屬機關。從無獨立性質。泊乎清季末葉。迺隨一時代之文化而改進。卽所謂圖書館也。圖書館者。可以增高人民之智識。促進學術之思想。提高文化之程度。並可以補助學校家庭與社會教育之不足。因此我國各省。遂有圖書館之設立。地方人士漸知圖書館之重要。除省立圖書館在市内

或州內設立董事會。專事管理外。都有私立如通俗專門兒童及流通圖書館。公私並列。現計有五百餘所。可謂盛矣。然若較諸歐美。自問尚不逮遠甚。故本會以私立性質。力求普及起見。建議倡辦團體圖書館。以應目前之趨勢焉。

復錢名山先生函（來函錄後）

名山我師大人尊鑒。本月十四日。接奉

賜書。獎飾逾分。以小子爲可教。而諄諄以示之。且感且慚。方今國難臨頭。文人緘口。學士寒心。一肚子困厄悲愁。無所告語。故激而爲詩。藉以明心志。舒胸臆也。詩亦神聖也哉。竊嘗聞朱子論詩矣。三代兩漢之世。人唯無作。作未有不工者。迨夫西晉以還。陸璣輩出。則鬪靡聘妍之詩作。而詩教熄。以後雖有作者。亦第見其浮花浪蕊。恐尙非從頂額上作來也。小子五歲而孤。八歲學詩。十歲而窮究五律。至七律及七絕。初未嘗習學者也。戊戌政變。八股宣告壽終。遂以學詩工夫。一變而轉向蟹行文字。詩興掃地。歷有歲年。自壯迄衰。詩思復活。間或獲侍賢人長者。爲師友剽竊見聞時。復短咏相見於世。自以爲得志矣。然詩無止境。人各有志。五十年來研求所得。悉端本於養一齋詩話中。所謂詩言志。思無邪六字。及白傅詩中之一淺字。他則未敢染指也。別雅俗也。雅者何。脫棄勢利。洗盡鉛華。而後謂之雅矣。辱

書歎爲骨內有詩者。意在斯歟。小子下才。何足僂指。謬蒙

崇獎。殊不敢當。至所可黷冒

清聽者。充其量而言。謂爲盲人奏曲。僮夫唱歌。則庶幾矣。簡直不得謂之詩也。世有探討

夫古人之詩者。本之以天性。養之以經籍。先求六義。後講五音。音有韻。韻協則言順。義有類。類舉則情見。二者合而通之。詩道於是乎大備。可以悟詩之升降。可以評詩之工拙。故一吟咏間。殊令人有一唱三歎。諷尋不寔者。求諸今世。其惟台端一人乎。書不盡言。言直無文。工餘未克端書。以草寄奉。伏惟恕以狂愚之咎。再祈晉而加之以教。則不勝幸甚。

馮母區太夫人壽序

古無生日之禮。自宋景濂以壽文入集。厥後踵爲之者。每遇人生日。輒以詩詞儷語相投贈。動累卷帙。貢人以諛。人子因而循之。皆得藉口於榮親之說。卽所以爲長者壽。不知非孝也。亦非禮也。夫禮也者。葆貞純固。當推其兼致之由。款識敦彝。要齊其本來之量。得理全者得天厚。得天厚者得壽長。以德得壽。以壽壽人。非可倖而致也。故天下之爲人子者。心懷鞠育。念切顯揚。欲彰懿德。俾序其躋堂介壽之忱。爲祝遐齡。故托諸因事致敬之義。然不能以溢量之語帥而掖之。欺世之文頌而禱之。庶幾祝之者計其所述而不尙虛文。受之者亦視爲應有而了無愧色。倡而爲風。效而成俗。於禮豈不善乎。馮母區太夫人者。吾友劍成先生之賢母也。粵東介宗。嶺南名族。幼嫻庭訓。長習閭儀。儉以持躬。恕以行事。及歸湖北巡警道少竹馮公。更見其惇謹樸懿。晨夕勤勤。委以內事之重。措置協洽。益以外交之繁。綴綺緝斷。動容中禮。細大不苟。求諸鬚眉。猶不可得。况巾幗乎。凡此之類。靡之殫述。第舉太夫人之於往日所見無不可佩者。合而言之。簡稱四德。曰孝。曰賢。曰慈。曰

仁。夫孝莫大於承先志。賢莫大於裕後昆。慈莫大於盡恩勤。仁莫大於宏施濟。太夫人相夫子治鄂也。本一身之作則。奉四德爲依歸。鄂人士有受其惠愛者。迄今類能道之。豈僅烹雌挽鹿。封鮮九熊。遂足概太夫人之不忝婦德。克盡母教也哉。封公性好仁。對地方設施。如救濟災民。及綏靖地方諸善政。靡不盡力籌辦。而太夫人有以襄成之。拔釵環以拯困。何論紫玉黃金。籌升斗以饋貧。不惜青精白粲。有時資或不給。甚則乞鄰而與之。其仁慈有如此者。不啻唯是。當封君出宰武漢。一時聲勢之盛。遭遇之隆。大有出人意料者。在常人視之。孰不曰。夫倡婦隨。習佚崇奢。遂可安坐而不事。然太夫人食不旨甘。衣不藻飾。操井臼之勞。表裙釵之範。安貧樂道。不減平居。力挽澆風。不遺餘力。其儉約有如此者。綜太夫人之懿行。而天之錫太夫人以福壽。是亦理所宜然也。易曰。善人降祥。詩曰。克昌厥後。太夫人有焉。今歲春。爲太夫人古稀稱壽。哲嗣劍成先生以所以壽親者謀余。余與劍成先生同道有年。識趣相若。理宜酌咒躋堂。摛文以侑壽。相與爲辭。以篤勿諛。蓋以太夫人之孝賢仁慈有若此。而其子若孫能曲體其親之孝賢仁慈以顯揚又若此。爰不揣闕愾。勉爲敘述。所以昭令問而膺多福也。惜余不文。詞不賁諛。而太夫人亦非可以諛詞賁者。是則太夫人與令嗣等聞之。其亦陶然而盡一觴也夫。

徐王行婚頌詞

中華民國三十年。十一月十五日。爲徐小洲先生與王翠珍女士成禮吉期。是日也。晚節乍逢。陽春將屆。東海世瑞。聯金菊以合歡。太原家珍。友玉梅而知吉。詩題紅葉。御溝傳爲喜之因。禮著青廬。繡幕遂好速之願。謂非天然佳侶。懽諧海上姻緣。正是年少風流。永作人間

眷屬。奏房中之曲。琴瑟有焉。博堂上之歡。室家宜爾。緒承屬車陪乘。登堂觀禮。忝附苔岑之誼。謹陳花燭之詞。

沈瞿行婚頌詞代許志澄作

中華民國三十有三年。八月二十八日。卽夏曆七月初十日。爲無錫沈覲揚先生。與瞿佩智女士成禮吉期。正值序屆孟秋。律中夷則。人間七月。劉樊徵新締之盟。天上雙星。牛女遂好逑之願。順親有道。懽諧堂上椿萱。御下無愆。香溢階前蘭玉。餘勇可賈。居然日新又新。古調重彈。竟爾一鼓再鼓。看今日鴛鴦結侶。豔羨雙棲。卜他年麟鳳呈祥。功成一索。志澄屬車陪乘。登堂獻頌。重以苔岑之誼。綴爲花燭之詞。

謝壽啓（代楊偕如作）

古云德爲壽媒。仁爲壽胎。故服膺在德者。常享其遐齡。宅心在仁者。必報以純嘏。是宜家謀燕慶。樂敘天倫。鄉頌鳩扶。望隆人瑞。古今難得。雅俗偕同。乃若言壽而不據於德。卽壽亦何足奇。介壽而不依於仁。其壽更不足道。偕如田園息影。滬濱觀光。周甲才輪。何敢云老。誕辰有待。不宜於今。况乎海上多艱。趨勢首崇簡約。客中不事。攝生最忌奢華。豈儉德之可風。亦秉夷之攸好矣。爲告兒孫。孤島雖佳。豈舞綵騰歡之地。敬謝親友。商山無恙。非稱觥晉祝之時。

顧趙行婚頌詞代同鄉會作

維中華民國三十有七年。戊子正月十四日。爲顧湘華。與趙惠如成禮吉期。時屆新正。節近上元。日麗綺窗。文伯遂好速之願。星輝樞閣。臨城結新締之盟。最喜倚馬奇才。才早誇乎咏雪。尤喜乘龍壯志。志雅負乎高雲。况乎二美齊名。咸抱仁心仁術。一朝結侶。自然宜室宜家。推世澤之流長。望隆歇浦。衍家珍之兆遠。秀毓梁溪。幸有良媒。爭誇鳳雛鳳產。自成佳偶。定卜龍子龍生。敝會誼屬苔岑。快睹珠璧。自慚才拙。恭吟偕老之詩。不厭詞詳。漫晉合歡之頌。

復謝平津兵兵隊代作

逕肅者。此次敝隊出發滬濱。遨遊平津。異地觀光。縱云娛目。他鄉撻足。誰是知音。忽逢潘夏之興。遂結尹班之契。備荷飽飫盛饒。復承

寵錫多珍。摯愛逾恆。感謝無既。某等學慚窺豹。識類測蠡。不蒙勒白之加。反被垂青之愛。眞夢想所不到。實感悚之交深。惜乎歡會不常。浮蹤遽散。回思燕圻清興。時殷望斗之恩。倘教驛使多情。再盼折柳之贈。肅陳駢語。聊表謝忱。

爲朱劍芒題吳吟遠像贊

少時才負魏舒。晚年型式計然。修己曰仁與孝。利人化觚爲圓。克顯揚乎先德。有繼起之後賢。介七旬兮上壽。遂羽化而登仙。

朱母顧太夫人像贊

才不下名士。志不弱丈夫。行不腆孝婦。光光賢母。三者兼備。我懷母德。夫豈質野無文者。所能潤飾其嫩徽。百思得五十字。遺掛敬瞻。彤管有煒。

說鬼

鬼果無乎。視之勿見。聽之勿聞。曰。無也。鬼果有乎。目遇成色。耳得成聲。曰。有也。二者莫衷一是。不知天下本無是鬼。而人則視爲吾心目中之所有。鬼於是不召自來矣。不可謂無也。天下本有是鬼。而人又視爲吾心目中之所無。鬼於是不別而行矣。不可謂有也。是故世間之有鬼無鬼。在我而不在鬼。

鬼爲迷信之一種。而庸夫愚婦。奉之唯謹。其在明白事理者。不問也。鬼又爲污穢之名詞。而亂臣賊子。受之無愧。其在忠君愛國者。不知也。不問不知。則不有其有。而不物於物矣。又何必馨香俎豆。敬而遠之。更不必郊社禘嘗。祭而豐焉。况乎左道顛頭。鬼不足道。青天白日。鬼於何有。

人之生也。有魂有魄。魂魄俱在。是之謂人。取其靈也。其亡也。魂魄相繼而逝。魂魄失靈。是謂無極。無極者。空也。故謂之鬼。鬼也者。蓋就魂魄二字之用意。側取而與之耶。我之所謂鬼者。岳少保奉詔班師。此岳少保所遇之冤鬼也。鄭厲公相驚以伯有。此鄭厲公所見之厲鬼也。擲揄作態。羅友所稱述之路鬼也。聖賢其傳。阮瞻所接觸之異鬼也。然此皆有

形有聲。無鬼非人。無人非鬼。而世之所稱爲鬼者。大抵皆無形與聲。所謂視之而勿見。聽之而勿聞。亦卽朱夫子所謂二氣之良能也。故謂之氣則可。謂之鬼則不可。

雖然。燐火熒熒。吾目見之也。俗謂之鬼火。吾則聞其說曰電火。非鬼也。天陰鬼哭。吾耳聞之也。俗謂之鬼叫。吾則斥其謬曰電氣。非鬼也。蓋人之一身。電居氣體三分之一。人死之後。魂氣歸於天。電則散佈於空中。有時發諸爲聲。其聲能聞而不能得也。形魄歸於地。電氣流行於地下。化而爲火。其火能見而不能取也。試問何以得之。何以取之。無一人知。此吾所以作無鬼之說。以告世之有盞於鬼者。

長夜無事。兒孫旁吾而立。相率談鬼。兒謂鬼生於人。孫謂人生於鬼。各恃一說。莫衷一是。以取決於吾。吾以二者之說不足於鬼。作說鬼。

爲錫金公所建築閘北新殯舍募捐啓

竊維楊花秋白。忍聞郤超之亡。燐火霄紅。難覓林宗之葬。是以桐棺一具。情愴一鍾之新封。石槨三年。跡寄三椽之舊館。然而歌虞殯路。權厝無方。鬼哭秋墳。告貶何處。等是人滿之患。靈輶中藏。無異屋荒之愁。歸輶日蹙。爰擬汲西江之水。哀此錦棺置霎之餘。卜北郭之邨。擇爲集朽藏枯之所。死者藉以慰恤。仁人亦所樂聞也。(下略)

燕石齋翰續集卷二

詩

無錫馮緒承著

孫伯瑜表伯百年冥慶

憶昔紅羊舉義兵。粉榆保障恃長城。英才驥展允文武。仁澤鴻施起死生。弄鳳攀龍並人傑。勸農講學協鄉評。百年紀念毋多祝。打破吳中第一聲。

詠雪步天衣韻

（禁用皓寒白冷銀紛飛等字）

雲陰沉夕鎖涵空。空外有獅獅有驄。光映書幃翻翰墨。香浮妝閣却塵紅。閒封翠葆千山老。密綴瓊英萬樹同。知是天兵顯身手。不將寸鐵逞英雄。

壽劉谷僧七秩

小春報到嶺梅先。恰好劉樊介壽天。室有兒孫蔚蘭玉。家無妻妾活神仙。閒來吟詠安儒素。老去飯依證佛緣。漫說古希晉耄耄。期頤祝到大椿年。

壽實業巨子甯鈺亭

福備三多壽七旬。聚星會上一完人。宦游早入非非想。看破輾紅十丈塵。
酒龍詩虎武風流。客裏傾心幾度秋。漫說經商風味足。牙籤代握在荊州。
文章華國封翁志。經濟裕民令子才。照眼榴花紅不止。迎人都向綺筵開。
滬商萬惡本天生。狗盜鷄鳴一片聲。惟有幽駒在空谷。交通運輸譜雙清。

感吾師楚孫無錫

關西夫子是詞宗。出口成章帶笑容。兩字平安千個竹。一生培植萬年松。名爭日下荀文鶴。
才比雲間陸士龍。如此情長嫌紙短。玉璫緘好又開封。

賦得秋澄萬景清得清字五言六韻

萬象皆因月。人間景物生。入秋剛一半。澈夜倍澄清。塞雁參差影。培蛩斷續聲。香疑空外
度。籟逐靜中鳴。雲淨天無語。燈殘花有情。遙知倚樓客。朗朗玉山竹。

別良月調寄滿江紅

怨煞天公。長作客。風塵浪迹。三十載春申江上。有名無實。真假冤家前世事。利名圈套他

家物。歎斯文。不值半文錢。尊人格。談時務。胸襟僻。工交際。金錢缺。儘埋頭窗下。有何文墨。歲月無情天地老。國家多難鬚眉白。最難堪長缺不成聲。歸何日。

前題

歲月勞人。就盈數。古稱良月。中秋後更逢佳節。籬菊偏饒秋氣象。嶺梅早放春消息。望美人。江上采芙蓉。多佳色。秋容淡。風蕭瑟。秋光老。霜凜冽。看滿城烽火。四周相接。不見山頭猿鶴怨。不聞海底龍蛇泣。問何時還我舊山河。新中國。

次韻答和東園

客中那得孟嘗君。鸞鶴常隨燕雀羣。敢拂春風種桃李。爲沾歐化典釵裙。難忘滬錫一場夢。粗解中西四國文。神聖勞工淡名利。曠懷到處有餘欣。

夜坐

垂老悟閑適。刪忙羞利名。風清諸妄淡。月暗寸心明。鳥靜樹無語。燈殘花有聲。不眠不知倦。喔喔聽雞鳴。

答東園步韻

賀循再世仰儒宗。德大要知貴有容。清拔氣凌秋後菊。孤高節勁晚來松。杖朝上壽款嘉燕。芹泮重遊起塾龍。黃浦江頭回首溯。一天風雪白雲封。

壽李德齋七旬雙慶

回首昔年花甲週。而今海屋又添籌。解囊溥濟垂青眼。舉案偕隨慶白頭。驥子龍孫旣酌兕。木公金母杖扶鳩。德門未改田園樂。一遇春耕大有秋。

和病驥吾師席間口占勉步原韻得五十六字

候門忝立豈尋常。斑鬢而今傲雪霜。七子論交再難得。一人知己敢相忘。(指鮑君。)祇緣却病不妨酒。非自臨歧漫舉觴。垂老文章見身骨。後彫松柏益辛蕘。

再疊前韻

遑問世情變故常。鍊精詩句一頭霜。(用王維原句)爭趨座上步佳構。起讀燈前爲健忘。儘許高吟誇八斗。肯教沉醉引千觴。錦囊自是饒風味。橄欖何如不臭蕘。(程式夫有細讀公詩如橄欖句。)

挽葛似琴

世亂鍾羸癡。耆英蓬閣時。放懷甘置酒。償逋獨吟詩。笑我孟嘗客。輸君鄧伯兒。案頭遺卷在。留作後人師。

自適

浮生何預光陰事。(成句)抵死毋慚姓氏香。名利心勞容我懶。國家念淡讓人忙。養成性癖文章靜。修到身閑歲月長。多少世情眼中去。不知家有菊花黃。

讀情場閱歷話後

多情却是總無情。不道無情却有情。多少情添多少恨。恨多情少爲何情。有情人慣說無情。惹出無情人更情。最是兩情甜蜜處。情深一往太無情。人非太上孰忘情。何以爲情兩不情。奉告世間愛情者。最多情是最無情。最關情處最傷情。未必多情人有情。情不自禁空有恨。恨多情少莫多情。

題周夢莊畫梅

春訊連番報。空山客到家。寒深半死樹。梅放一枝花。
高士江南客。名山詩畫家。何來籬下菊。惟有雪中花。

古歷七月十一日五十生辰感賦

親仇未報待時動。偷得浮生五十年。讀透書知輕富貴。放寬筆覺健精神。備嘗辛苦三緘口。肯耐安危百戰身。一事不忘戒兒女。報仇還作報恩人。

五十述懷集吳梅村句

懶將身世近浮名。採箸編蒲課筆耕。磨耗年光心力短。敢頰扶策自支撐。書生搖筆壯懷空。總在汙泥不染中。回首十年成敗事。苦將身世訴飄蓬。先德傳家歷苦辛。脊令原上獨傷神。一瓢零落殘詩在。頭白江湖放散人。休言金屋貯神仙。老去孤根幸瓦全。青史舊交餘我在。居然生活勝焦先。絳帷當日重長楊。臥病相逢話草堂。麈尾執來五十載。故人才筆繼青箱。

五十述懷集龔定盒句

艱危門戶要人持。暮氣頽唐不自知。何處再求龍象力。收帆好趁順風時。米鹽種種家常事。飛出胸中不費才。設想英雄垂暮日。料無富貴逼人來。此身已作在山泉。枉負才名三十年。莫怨津梁爲客久。斜街老屋長羸天。文章合有老波瀾。忍作人間花草看。五十年中言定論。隨身百軸字平安。

畫課男兒夜女兒。及身刪定答親慈。文章風誼細評度。秀出天南筆一支。

春壽代馮雲初作

滿庭紅杏著花新。正是耆英介壽辰。鳩杖雙扶膺望重。兜觥合酌話情親。譽馳詩禮精研久。德種田園培養真。修到百年如一日。完成三十未來春。

壽薛緯亮六旬雙慶

大孝是完人。盈門桃李春。讀書不求富。薄宦爲安貧。濟世學仙佛。傳家誇鳳麟。極輝兼懿彩。遇甲會逢辰。

贈錢基博表弟

丈夫何事作牛馬。蝸利蠅名誤一生。惟有故園千里客。留真面目見交情。使君談藝筆通神。桃李無言溪自春。我所愁非貧與老。天涯握手盡文人。

寄懷吳稚暉先生民國二十年三月二十六日

憶遂瞻韓願。於今二十年。弦歌行樂地。風雨斷腸天。不信萬家佛。居然陸地仙。世途有翻覆。珍重著先鞭。

答東園次韻

天欲亡中國。非秋蟲亂鳴。滿腔憂國淚。一片故鄉情。琴與書都寂。燈兼月益明。年華雙鬢髻。無計了殘生。

七夕打油詩

一年歡不敵愁多。其奈無情天帝何。除向藍橋駕鳥鵲。雙星終古隔銀河。
欲寄尺書寫腸斷。何人泛海有銀槎。會看一夕秋風裏。不怕牽牛不着花。
昆明水碧靖無波。又向鵲橋一度過。久客乍逢開笑口。風清月白夜如何。
碧空有客正還家。道是渡河吉慶花。珍重佳期圓好夢。管教人說滅妝霞。
天邊有鵲駕長虹。漫道東西路不通。安得四時皆是夏。每過一月一相逢。
隔歲風光在眼前。柳絲綰住兩情牽。雙星相會知多少。我見渡河五十年。
無邊風月愛吾廬。談笑閒情盡夜餘。乞巧讓人工補拙。三更燈火一床書。
兩情多少風流事。民國以來十九年。橫漢天船長普濟。今宵怪底不通船。
家家瓜果設庭前。七孔花針向月穿。孀子不來眠不穩。依然守拙到明年。
中庭坦腹布衣尊。也學都人晒一番。巧與人間不須乞。郁隆端底勝天孫。
華燈然盡漏聲殘。一別方知見面難。月落天空秋夢斷。夜深露薄怯衣單。

南陽北洛路迢迢。天上雙星渡鵲橋。羈客不甘長寂寞。最難堪是值今宵。
多情兒女作癡夢。冷眼由他天上看。何物佳期爲贈別。香吹紅豆勸加餐。
浮槎直欲上天台。莫學劉郎去不回。閨月倘逢留後約。再遲一月或重來。
彷彿畫樓雙燕子。一雙雙宿效于飛。若教牛女情如海。鵲縱填橋不肯歸。
與我辭家同過客。終年不慣出門居。金風玉露來時路。記得來時路也無。
紅袖青衫淚濕痕。雲霄遮斷月黃昏。可能長夜天遲曉。訴盡離愁銷盡魂。
仙家戀愛出塵寰。下得鍼樓好是閒。喜極轉添離別淚。可曾揮灑到人間。
明知情海本無極。只許情通不在多。多謝姮娥盼青眼。平安兩字慰驪歌。
不知來歲還誰健。暗裏風光畫不成。天未平明行未得。諱言無鵲滯歸程。
年年相會知何處。今日歸程路已非。一事女牛須注意。機聲過滬滿天飛。
換將瓜果弔中原。廿七年來第一番。試問誰家饒逸興。還來乞巧問天孫。

送春次侯擘華先生韻

春到歸時草木稠。遠游王粲罷登樓。畫欄蝶舞香還醉。深院鶯啼韻轉悠。世路滄桑新舊恨。
海天風雨古今愁。萬千紅紫花如錦。一樣飄零付水流。

中秋雜詠

秋風葉落又梧桐。五十年來誤乃公。贏得一家都作客。離愁不到月明中。
半載曾無一句詩。要從秋候鼓相思。米珠薪桂人牛馬。月縱分明那得知。
側身天地我蹉跎。秋去秋來客裏過。寄語登樓殷浩輩。明朝一樣月明多。
（甬俗以十六日爲中秋節。）

世變從何辨假真。不隨流俗趁風塵。客中三十年相見。今月曾經照故人。
黃浦江頭月正圓。故鄉雲樹夢魂邊。關心怕聽廣寒曲。憶別慈親卅二年。
道是今吾卽故吾。平分秋月滿江湖。登樓我欲問王粲。兵火當年記得無。
（丙寅中秋。齊盧交戰。正緒承在北車站郵政局長局時也。）

十里珠簾半上鉤。故園西望海天秋。姮娥自是多情種。格外垂青到白頭。
客路奔馳萬事非。秋心日夜向南飛。如何月上滬江後。只許迎來不共歸。
滬濱迤邐是吾家。挈眷偕藏度歲華。勝似中天好明月。團圓不爲白雲遮。

壽劉煥寰母七秩

李之女。劉之母。大孝首尊親。如母世罕有。迨歸芝亭公。相夫稱賢婦。曷謂母之賢。米鹽
勤操守。人說母有姑。母更有其母。一門賢孝傳。誰得出其右。母亦有佳兒。芸開好身手。
重與細論文。良師而益友。侍母奉旨甘。天涯勞奔走。何以答母恩。母年時遐者。躍躍孝子
心。徵文願賦就。我無人文。但願壽母壽。靦顏步諸君。爲晉一樽酒。美矣哉。李之女。

劉之母。

輓朱士龍

天生明哲海之濱。忠孝雙清成佛真。笑我腹空慚許慎。教人心折戀王恂。榮膺科甲題名早。遠紹箕裘革化新。桃李爭誇好顏色。憑誰留得幾分春。

有明朱孝子漸儀爲父報仇功成學佛今秋九月十三日正逢三百歲冥誕同事朱副郵務長孟侯由粵函贈朱孝子行述三冊并索和詩章以盡追遠之意爲賦七律一首報之

天生血性好男兒。卜宅嚶城名漸儀。廿載枕戈復仇日。一朝托鉢受禪時。挑燈忍讀憫聲錄。著有憫冤及聲冤錄兩書。把酒愁吟孝義詩。容易秋風週五甲。報追贖有後人知。

重九有感中華民國十八年

天涯飄泊家何在。一髮中原半戰場。風雨滿城樽對酒。故鄉今日是重陽。一天鄉訊入雲端。客裏秋風不耐寒。吹得一園籬下菊。晚來留待別人看。

雙十感賦中華民國二十年

少二寡雙十勿全。弱冠初度小春天。瘡痍遍地啼荒雨。烽火滿城起暮烟。誤國空揮孺子淚。出洋高卸偉人肩。大邦斷送蠻荆手。萬堞誰抽一矢先。

重九感賦 中華民國十九年

故山何處客他鄉。又見黃花晚節香。風雨不來天改態。滿城烽火作重陽。風吹帽落幾人曾。目斷龍山感廢興。小子無名甘下拜。每逢高處不須登。

小女姝胤考取郵政儲匯總局大媳文英出任教讀喜賀以詩

不將男女分輕重。來唱平權第一聲。漫道鬚眉傲巾幗。從知涉世貴謀生。侈談救國空成夢。好說瞻家似近情。最喜東床坦腹者。同心各自奮前程。

長涇張行之爲夫人王氏撰述徵詩奉祝代錢渭夢作

捐貲興學女宗賢。人比黃花晚節堅。孝養克追鍾母後。勤勞不讓趙姬先。咸臨續命長生藥。屢貸饋貧大願船。周甲華齡又加五。蔚成蘭玉滿階前。

代孫子善及子江表姪擬薛緯亮暨德配六旬誌慶

織簾居士夙心傾。不畏辛勞不羨名。十載宦遊顯親志。一朝商戰振家聲。瑟琴偕老榮週甲。

桃李成陰豐滿城。遙寄江梅晉春酒。要憑萊綵祝長生。

壽蔣遇春先生七秩

古來名士不求官。所欲從心歲月寬。先世簪纓繫鄉望。滿階蘭玉餉人看。文章華國瑠璃筆。經濟匡時獬豸冠。大好桑榆娛晚景。期頤一路祝平安。

（案遇春先生於民國二十九年七月在七浦路同鄉會賀我續膠卽作最後之別）

中華民國十八年詠雙十節

飽食安居兩不成。商量無計了殘生。扶持國本蘇民困。纔是今朝慶祝聲。每逢佳節客他鄉。菊有黃花晚節香。牛馬生涯靡騁感。不知明日卽重陽。去年今日白門遊。又見西風垂晚秋。怪底旁人齊拜手。從頭猶是訴窮愁。

悼十九路軍陣亡將士

嗚呼。十九路軍將士之死死得所。一死千鈞名千古。是誰不死不抵抗。助長敵焰猛於虎。烏佛東來幻戰雲。神州淨土污流氛。大將擁師號百萬。禦敵僅聞十九軍。十九軍心百不回。兩軍一夜始對壘。報國雪恥好男兒。甯爲岳飛毋秦檜。槍炮勃發火內攻。都在健兒聲應中。衆心洶洶廿一擲。白刃血染陣雲紅。風掃龍腥晝亦昏。機聲札札斷人魂。黑塵填巷埋忠骨。斷

港潮平露血痕。吁嗟乎。古來戰場幾人還。成敗滄桑轉瞬間。招魂何處誰與祭。收骸不及葬明山。是何慷慨實正命。生吊義士之忠悃。死吊烈士之英靈。冤沉海天何時盡。一哭將士兮抒國難。再哭將士兮報國恩。寇氛不滅恥猶存。削平外患誅漢奸。君不見伯有相驚爲厲鬼。鬼國見之心胆碎。侵掠東圖付優曇。昔日跋扈今安在。可憐國難無已時。國事而今一至此。盈廷豈皆無肺肝。愧不能死不知恥。

挽王炎民集近體國粹叢句

斯人有斯疾。天道竟難知。寂寞故園淚。文勛僅一兒。
滿腹千秋業。無慚稱布衣。斯文將墜地。先化亦知幾。
落落存吾道。山高靜可師。可憐新粉蝶。何處戀新枝。
蒼茫雲樹外。好寄慰遐思。不信金風後。驚餘老泪垂。
日盡話閒事。妻孥喜共幃。以茲徵講學。燈火斷虫微。
匡坐觀今日。荒荒天地昏。琴材共炊爨。何地可招魂。
午夜百篇詩。風霜苦自持。生難盡今日。伯道復何遺。

歲暮感懷

金山縣知事黃端履以辛未歲暮感懷詩見眎并索和步韻得四首

王盧才調擅人間。倒盡詩囊未許慳。（散句）選士豈隨崑玉比。衡官應合浦珠還。鍊成松柏無雙豔。打破利名第一關。世局如棋渾不定。可憐謝傅老東山。

不信天心禍漢邦。寇氛北顧勢難降。爲杼胸臆詩千卷。且喜風流筆一雙。逐客歲華催蠟鼓。引人春色返銀缸。何當玉燭調和日。吟對清尊麗藻汪。

何處槐庭白鵲巢。尊賢特拔速蓬茅。慣尋客路怕彈缺。羞近人情類繫匏。是舊風光休貽笑。無新花樣漫騰嘲。歲寒別有饒丰韻。贏得梅香勝竹苞。

但使健身仗雪鑿。寒消酒色試青衫。一陽旋轉律中應。兩字平安夢裏緘。讀罷鴻文儲石客。掃開寒霧隔塵凡。茫茫走熟客中路。海水滄滄其味鹹。

題幽篁靜嘯圖（調寄水龍吟）

西風舊夢吳皋。把書生盡情談笑。狂歌醉酒。長吟舞劍。偏偏不要。樓下蓮花。隄邊楊柳。別添詩料。儘鴛鴦燕婉。啼紅唾碧。問誰及。山居妙。幾許江山文藻。綠卿廿拜風流好。隔花朗潤。迎風瀟灑。瀛州絕調。彷彿蘇髯。依稀摩詰。一聲琴操。更夜涼人靜。二分月色。向當頭照。

其二

西風舊夢吳皋。叢篁高柳依然好。彈琴拂劍。狂歌醉酒。未妨潦倒。樓下蓮花。隄邊楊柳。

總添詩料。甚蕙樓蘭樹。青細白社。終不及。山居妙。幾許江山文藻。儘書生盡情談笑。兩行玉指。料應輸與。孫登才調。摩詰琴邊。襄陽簪角。一般圖稿。趁微涼獨坐。愛他明月。又來相照。

答東園調寄桂殿秋

歌舞地。亂離天。太平粉飾不烽烟。商民坐困勞工哭。試問何人解倒懸。
明月夜。早秋天。謠傳滬海起烽烟。感恩知己書千里。耿耿寸衷兩地懸。

國難詞調寄點絳脣

塞外風雲。河山物換殊疇昔。遼天明月。纔過中秋節。昨夜團圓。今夜拌離別。良心黑。怨天仇日。一路從頭說。

紀念九一八（調寄昭君怨）

漫說中秋佳話。驚破遼陽鼙鼓。猶唱後庭花。噪飛鴉。桂子天香何在。衰艸斜陽含淚。終日坐愁城。履聲聲。

題贈高翰臣（調寄天仙子）

見說兵戈天地滿。國破山河腸欲斷。世情蒼狗幻風雲。渾不管。書千卷。燈火山窗閒作伴。寸草春暉如許願。勝比天涯遊子感。攀龍猶是舊家聲。從今換。休遲緩。全仗着秋儲善算。

東園四日寄懷步韻却寄

誰悟塵根好惡緣。年年滬海度烽烟。(近十年遇戰事凡三)三更燈火書聲裏。千里鄉心客枕邊。滿榻和風拋綺扇。半床涼月寫吟箋。笑他奪利爭名者。搖尾胡爲還乞憐。

壽孫厚甫暨德配八十

庚午舊曆翻新曆。厚甫孫公壽八十。八十自古稱完人。吉耦齊年尤特色。蓬島梅開透晚香。鴻案星臨耀南極。文郎舞綵躋華堂。堂上高朋成手額。况復文孫繞玉階。階前爭獻瑤桃實。天生幸福最難期。問公此福何由得。早歲浩劫羅洪楊。衣不待暖飢不食。持躬儉節戒奢華。宅心仁厚承先德。壯年努力愛鄉邦。改良婚嫁謀公益。術妙濟人與梁成。跨海慈航度苦厄。古稱君子宏解推。義粟仁漿潤周卹。傳濟宏獎萃一身。元首褒揚資矜式。作善降祥曰有後。習禮能詩掌教職。我羨孫公子孫賢。篤志業儒能繼述。壽翁壽母笑顏開。蔗境風光天永錫。我昔椒觴祝延釐。廿載今朝登大耋。

祝新無錫報廿週紀念民國二十二年

(新)聞事業亂於麻。(無)敵關西第一家。(錫)以箴言振民鐸。(報)施不爽享榮華。

(廿)載駒光一霎過。(週)而復始莫蹉跎。(紀)元民國長三歲。(念)四橋邊月色多。

和企霞五十述懷代陸京士作

行藏用舍聖之時。共仰宣尼萬世師。天教壽人饒韻事。北山春日集賢詩。
勝似漢家司馬遷。詩書執禮極鑽研。詎知蘧瑗知非日。猶是尼山學易年。
共和政策是耶非。舉世猖狂吾道微。誰說唐宗專制毒。羨他君瘦讓民肥。
衣冠不復舊同年。時事終難欹枕眠。彭澤歸來滿園菊。玩花人是地行仙。
保國衛民完革命。精神龍馬福來同。尙堪禦侮買余勇。痛飲黃龍直搗東。
名將風流學倒戈。薊雲一夜捲漩渦。長期抗日成虛話。辱國喪師失地多。

壽王素風先生五旬步韻

乳保欣逢癸酉年。而今辛酉壽南天。安居陋巷貧而樂。攻守寒窗窮且堅。聽偈有緣非學佛。
攝生無恙不求仙。遙看嘏祝筵開日。照眼榴花分外妍。
壯不如人老奈何。三年忝長鬢皤皤。經商夙仰交遊廣。興學盛傳閱歷多。端午介祺先晉祝。
期頤譚曲半經過。祝君何物綿遐算。香爇銅爐聚一窠。
瀟灑襟懷淡蕩情。故鄉賢哲不虛生。玉昆契結芝蘭譜。(謂令兄立齋先生)文友神交金石盟。
安得濟堂獻嘉頌。相逢置酒道生平。請將餽敬壽民國。惠及燕郊抗日兵。

官吏不求爲愛貧。假年學易養天真。田園自樂清閒客。齒德同尊仁壽民。井臼親操終有婦。箕裘遠紹豈無人。愧予也晉臺萊頌。節屆中元前四辰。

董逸滄先生暨德配張夫人六旬雙慶（步韻）

不問宦情守儒素。好教仙隱悟禪緣。台嬾並耀榮週甲。蘭桂齊芳樂少年。五色蓮開香案豔。千秋月照法輪圓。錦堂料得稱觴日。我佛慈悲喜欲顛。

題贈繡石廬謎語調寄醉花陰

無計商量消永晝。寂靜黃昏候。賭墅賦圍棋。射覆燈紅。儘任人研究。輸他潘陸饒佳構。七類空前後。何處集同岑。謂我何來。消受今番又。

陶雲程先生七旬雙壽

南極星高壽古稀。中天况復婺騰輝。齊眉恭獻麻姑爵。繞膝歡承菜子衣。臚列孫曾欣有慶。修成仙佛願無違。一門四代天倫樂。麟有祥文鳳有威。儒雅風流憶少年。優遊林下地行仙。泮宮竟爾題名早。莘野讓人及第先。不羨簪纓參國政。儘教詩禮衍家傳。書生結習依然在。潛德人還說鮑宣。嶺上梅開錦悅張。悅辰甯止在稱觴。相夫無愧誦賢德。教子有方肇熾昌。興學里閭助公款。

救災溝洫解私囊。定知積善衍餘慶。蘭玉森森萃一堂。
早將歐學島麟兒。秀到天南第一枝。千里顯親聞鳳起。
一官榮長展鴻施。郵傳衣錦還鄉日。綺閣開筵祝嘏時。
子又生孫孫繼武。十年再奉介眉詩。

楊筱荔先生癸酉重宴鹿鳴詩步韻敬賀

八十華年又加二。關西夫子震儒林。金簪花簇盈雙髻。
玉尺冰堅不二心。桂殿香分蟾窟遠。槐門恩帶風池深。
南都猶記登科日。劍閣崢嶸列翠岑。

豈是解名山外孫。萬人傑出啓龍門。詞壇旗鼓羨淵秀。
文苑芙蓉誇嶽尊。最喜同年知己感。可憐週甲幾人行。
花開紅杏微風暖。不受青雲富貴吞。（借句）

漫和佳唱海之涯。循吏今當有世家。舉孝與廉添白首。
舊儀新奏歎黃花。公園獻壽尊三達。將府論文富五車。
賴有老成能救國。不隨孺子鬧喧嘩。

六秩駒光過眼飛。士林風景已全非。客來東閣聊開宴。
人去北山不受譏。樂奏縱聞歌鹿野。恩沾無復拜龍旂。
鰥生愧未酬前席。驥附何妨學布衣。

荆夢蝶與吳又園

烽火亂離天。斯人不永年。執鞭慳附驥。彈鋏泣啼鶻。
道德重今古。文章希聖賢。客中芻束。來結再生緣。

新秋答東園調寄桂殿秋

雲氣淨。月光寒。客中秋色到樓看。音沉滬瀆魚傳腹。望斷江淮雁寄翰。千里意。百年情。文章妙手本天成。癡心我有皮箋癖。知己感恩唱一聲。（研究京劇。無心詩筆。豈好逸而惡勞乎）

二十二年雙十節

「一」分明月一輪秋。王粲倚人不自由。底事芙蓉自開放。紅顏滅盡舊風流。
「十」數是盈月是良。官民沿用舊文章。謀生計拙亡無日。第一農工第二商。
「二」三其德軍心變。民不聊生國不安。東省價廉行拍賣。江河影在日中看。
「年」年國慶客中過。劫急觀棋花樣多。秋雨秋風誰作惡。國旗飄處血痕多。
「雙」方妥協津沽間。遼雁東飛去不還。國難未平仇未報。將軍愁煞馬占山。
「十」日雨兼五日風。革新氣象古今同。嶺梅庭桂饒秋意。故意迴黃不放紅。
「節」屆中秋後六天。武昌革命着先鞭。而今天地看新造。慶祝成功廿二年。

壽東園八韻

淮海布衣席上珍。而今生活及時新。書香累代傾餘子。文字當年識故人。何必桂蘭齊介壽。

居然桃李盡涵春。會看癸巳重開宴。翁慶百齡我八旬。

哀小孫女容雄

天道返常人事非。孫支先折亦知幾。幽魂兩地應難覓。望斷白雲何處飛。
一誤於徐再誤周。庸醫各自有千秋。殺人同一犯刑律。寄語行舟鑿覆舟。

呼號拘擥最難堪。秦緩從來脈折三。欲奏刀圭相見晚。玉蟾委化幻優曇。（入福民醫院。院長斷其爲內症。一針見血。病在胃部。）

揮汗如雨淚如珠。弄到雲衲我獨無。黃口忍遭亡國慘。披肝裂胆爲捐軀。（病岌時肝陽尅胃。胆亦碎矣。）

二十二年雙十節調寄千秋歲

一天秋色。佳節逢雙十。仲慶祝。全中國。登高重九日。玩月中秋節。誰知道。賞心別具饒佳客。詩酒宜今夕。絃管猶如昔。旗上下。燈明滅。嶺梅工點綴。籬菊冠清絕。輕去也。一年一度怎生得。

去年之雙十節民國廿二年

國慶年年客裏過。秋風秋雨奈愁何。文章有數知音少。天地無情銜恨多。王粲登樓三痛哭。

陶潛殞酒一悲歌。中原逐鹿胡爲者。八閩竟揮同室戈。

今年之雙十節民國廿三年

秋成何以慰農耕。明月滿天風露清。南海龍蛇騰欲上。北山烏雀捷相爭。大庾嶺上軍無敵。東渡城邊屐有聲。誰是神州乾淨土。荆榛那得不縱橫。

明年之雙十節民國廿四年

鄭周交惡戰端開。東亞風雲惹禍胎。九國聯盟飛夜電。中原啓蟄動春雷。侏儒卻步了殘局。傀儡登場付劫灰。從此太平無箇事。明年今日又重來。

送別病驥吾師

黃浦江頭聽早潮。百花生日是今朝。春風得意送君去。數到歸期定不遙。滬別新亭何足道。池塘二月生春草。世間縱有紅杜鵑。聽說何人歸去好。

歇浦唱和集二疊前韻

名高早已著蘇常。客裏風雲鬢裏霜。照澈燈光春夢斷。儂清詩債俗塵忘。舟維楊柳笛三弄。藥飲葡萄酒一觴。險惡人心不堪問。毒如蛇蝎辣如薑。

二十四年雙十節上海報冠言調寄滿江紅

怨煞天公。長作客。風塵浪迹。三十載。春申江上。有名無實。真假冤家前世事。利名圈套他家物。問青衫。不值半文錢。心胡熱。談時務。胸襟僻。工交際。金錢缺。儘埋頭窗下。有何文墨。歲月無情天地老。國家多難鬚眉白。到今朝。空負好頭顱。新生活。

前題

十月爲陽。鷓盈數。古稱良月。國慶節。年年今日。節名雙十。雛菊偏饒秋氣象。嶺梅早放春消息。望美人。江上采芙蓉。多佳色。旗招展。隨風拂。燈搖落。如雲織。聽喧天軍樂。四周相接。不見山頭猿鶴怨。不聞海底龍蛇泣。廿四年。還我舊河山。新中國。

爲李仲軒壽南廬主人鄧熾昌六十步韻

東有番山北有禺。蓬萊張樂賜臚呼。精研歐化智無敵。妙悟玄機名不虛。今日甲周藹南極。昔年苑降宅西湖。尊居杖國先生望。直上羅浮一手扶。

續膠有日敬告亡妻彼姝

第二行婚己卯年。梅花卜吉早春天。郎君相見無新舊。妻子重逢有後先。一種癡情賈餘興。

兩行老淚簷吟肩。回頭卅四元宵節。等是今宵月共圓。

二十七年中秋步王申中秋雜詠原韻

一天秋色罨梧桐。海上何妨作寓公。此去故園三百里。月明知在有無中。
一月來無半句詩。新牽游客故鄉思。九龍山色今何在。說與旁人故不知。
秋風張翰計蹉跎。春思春愁取次過。王粲不知何處去。月明聚處白雲多。

同鄉孫秋屏銀婚

關雎載詠未生疏。念五年前得意初。聽說新郎崇法律。研詞補寫證婚書。
新婚賦是舊姻緣。第一姝還第一仙。佇看金婚期有待。朱提攜手在今年。

古歷十月一日亡妻彼姝循例家奠

不信紅顏薄命多。秋風容易一年過。埋香未就非吾願。可奈國亡家破何。
戰區淪落阻交通。麥飯何人送殯宮。料得戒嚴猶憶我。歸魂不辨路西東。

二十八年古歷四月二十六日爲亡妻彼姝禮懺禪服口占二絕

春閨一別兩寒暑。廁上有誰夜讀詩。可有愛情助吟興。還來壁獨費敲推。
香消玉殞渺難尋。兒女哀思有孝心。抱恨終天何以報。三年縞素到如今。

清明掃墓

故園風物已成塵。大地河山劫後春。一樣清明好時節。可憐上塚竟無人。
墓門宿草冷斜陽。每到清明祭掃忙。底事年來成恨事。諱言作客在他鄉。

新婚之夜

又到溫柔第二鄉。寒梅破臘絢春光。挑燈寂坐花無語。倚枕微聞玉有香。同夢廿從今後始。
兩情諧更晚來長。天公也愛風流事。照我元宵月一牀。

（此詩步韻屬和者一時有錢名山侯保三莊通百鄭仲丹匡仲謀顧彬生董孝逸侯陟華及龔道寸諸先生）

謝壽

投我以桃希世珍。固辭不獲盡鄉親。感恩何以報知己。綠酒黃花作主人。
破除俗例酬吾願。辜負盛情諒我貧。何敢侈言克閭會。抱慚脫粟到嘉賓。

（民國二十八年十一月六日侯師保三蔡師松如暨鄉長匡仲謀先生等數十人設饗於上海功德林爲我六十壽因病未遑趨謝今已十年矣）

悼亡妻彼姝記得詞二十首

亡妻彼姝與緒承相聚三十有四年間有足資追憶者得記得詞三十首體近竹枝詞多鄙俚非敢言詩亦聊以寄哀寫懷云爾

合歡杯酒晉鵝黃。頰暈紅潮泛海棠。記得宿醒渾未解。水晶簾下卸新妝。
二分春色杏花天。馳逐功名正少年。記得登舟相慰語。鷓鴣得路要爭先。
而今絳帳不須開。負笈滬江第一回。記得臨歧難釋手。汽車吹笛又回來。
昏黃影上碧油幢。虛掩疏櫺屈戌雙。記得故從窗下立。金釵輕叩讀書窗。
樊英生小負時名。却早高柔一日生。記得中元前四日。一天星斗月光明。
園林清敞絕塵囂。不斷花香牆外飄。記得紅綃枝上繫。爲花裝點作花朝。
榴花照眼鬪裙紅。時食家家荐祖宗。記得禮成糝半卸。香羅輕透落梅風。
水亭依檻看芙蓉。山色湖光畫不如。記得手拈蓮蕙子。鴛鴦不打打游魚。
雙星相隔一年過。莫怪人間恨事多。記得鶯聲笑相問。牽牛底事渡銀河。
一丸涼月掛天心。何處飛來玉笛音。記得兩人遙唱和。噤寒倍立桂花陰。
菊花籬落帶斜暉。九月團臍蟹正肥。記得酒酣相對飲。夜深勸着一層衣。
半淞月落影黃昏。園內無人靜掩門。記得出門風雨急。半途何處覓鄉村。
黃泥釣子紫沙壺。雀舌團煎曉露珠。記得飲時低問我。詩腸曾否潤來無。
粉汚脂垢積衣梢。皂莢搓香洗後拋。記得猩紅齊蘸水。指尖初褪鳳仙苞。
結襪三載乍添丁。爲報佳音客裏聽。記得故園相見日。怕開笑口守如瓶。

浮沉滬海放懷寬。權作家鄉一律看。記得相思渾不隔。雙魚早寄報平安。
中秋節假盼歸帆。好覓青鸞寄一函。記得紅箋題幾字。丙寅八月十三緘。
傷親先後返靈山。屈指清明冬至間。記得殯儀誰負責。素幃泣盡女紅顏。
歸來何日學陶潛。我所愁非米與鹽。記得五齡黃口小。虧他教養一人兼。
齊盧本是一家人。腸斷當年乙丑春。記得歲朝相對坐。一般賀歲盡鄉親。
離鄉作客度春秋。勞瘁半生付與郵。記得鹿車誰共挽。而今愁煞老黔婁。
魯軍直是甕中雞。多少流民滿路啼。記得哥哥行不得。鳳頭莫辨路高低。
長隨兒女客天涯。二十四年與子偕。記得後先婚嫁了。置郵心事費安排。
滬南滬北已無家。三島風雲滿日遮。記得一家陳一榻。洋場不見日光華。
鴛啼燕語厭來聞。午夢初回日未曛。記得玉鈞簾半捲。香汗溼透枕函紋。
不堪疾瀉痛相遭。狂熱上冲血壓高。記得良醫三折肱。一針見血打葡萄。
終身儉約不求食。絮果蘭因仔細參。記得牟尼持百八。心香一瓣禮和南。
困人天氣太薰蒸。病榻呻吟苦不勝。記得權將煩暑滌。錦囊鋪設一床冰。
拚將兒女痛分離。夢醒黃梁不自知。記得臨危調藥餌。牙關咬定已多時。
廬扁尋遍杳無蹤。消瘦腰肢減玉容。記得背人私語我。三生有幸再相逢。

（讀罷淚潄潄下矣緒承附誌）

今日何日

阮家時常作客

上

羅天宮在花邊
負

（右係近作迴文體七絕一首。如何讀法。請閱者自行推敲。）

壽表哥孫屏東七句

至入頤養得天機。長我十年壽古稀。家學傳流彰國粹。賢書報捷冠鄉闈。鯉庭垂訓從心欲。馬革効忠與願違。海上繁華茶常酒。逸情日逐岫雲飛。

哀被難同胞

江山改態半淪亡。日黯雲低路渺茫。安得仙源娛歲月。常隨客邸感星霜。誰分杯水饑腸潤。獨抱布衾病骨涼。秋月一天心兩地。終宵難夢五更鄉。

七夕有感

大好光陰愁裏過。管他牛女會銀河。江南零落三春柳。海上浮沉十里荷。鎮日鄉音心字結。經年客夢淚潮磨。桃源終是忘憂地。如此江山可奈何。

哀難民夜不成寐燈下得詩

棄家作客脫兵戈。坐吃山崩可奈何。半菽不堪供一飽。算來己卯兩年多。
菊花黃落着籬端。人在休容所裏看。跣足蓬頭說不盡。可憐涼露怯衣單。
飽嘗樂土粥齋寒。從此長安住不難。還我河山歸去好。免教留守報平安。

中秋無月賦以寫懷

救國贖家難上難。小民生計竟摧殘。姮娥也解興亡恨。破碎山河不忍看。

亡妻週紀

萬種愁懷一紙詩。惱人梅雨病相思。要知戀愛真滋味。不賦悼亡總不知。
一朝永訣尚依依。悔我多言惹是非。三十四年最難得。開箱尚有嫁時衣。
一別玉容又一年。情絲空費淚珠穿。陰陽合歷從頭數。距我生辰纔兩天。
客中歲月苦中求。大錯而今鑄六州。閑是閒非消受盡。替人衣食一生愁。
絳仙難爲玉工妻。腸斷神離思轉迷。曉日窺窗人病起。人將易篋日斜西。

五十九重陽

別後家山歷劫塵。桃源何處避強秦。黃花冷落重陽節。故透晚香待主人。
何須角逐戀風塵。吾道不孤自有真。黃菊滿園秋景好。故鄉誰是看花人。
浮沉湖海走風塵。活到庚辰紀六旬。錫麓竟無立足地。茱萸徧插又何人。

重九日謝絕登高

山高一律罷登臨。廿六年來直到今。槍炮翻新作重九。摧殘風雨綴秋心。
國破人亡家亦無。更何心緒問茱萸。龍山久負登高願。可喜今吾即故吾。
又見黃花晚節香。去年今日客他鄉。一天枵腹無公事。夜半西風趁晚涼。

米珠薪桂舉以勗繼室鳴玉

萬紫千紅過眼前。天桃三月帶嬌妍。惜花遂我平生願。風景依稀似少年。
物質文明花樣新。冰霜調護歲寒身。旗袍革履胡爲者。德墮終非時下人。
崇奢崇儉各當家。柴米油鹽醬醋茶。通貨價高增一倍。購來減半不多差。

去年今日亡妻彼姝病胃作古未敢忘懷弔諸以詩

無稽讖語果然真。相定終身到玉人。懶上瑤台初病起。暮春三月第三旬。
涅槃證果了凡塵。不作逃難亡國人。遺墨一行叮囑遍。蝶花休戀別枝春。

春光斷送夏初分。哀誅淒涼屬細君。今日才荒遲下筆。奠卿一載兩詩文。
幽靈若使暗通神。來結三生未了因。誰識桃笙香夢冷。子身等是未亡人。

添丁（生兒名鯉寓意在宋不可無紀於是乎詩）

報道宋之子。中秋舉一雄。分明老來子。點綴半衰翁。正值星期日。相逢國難中。可憐黃口小。生活問天公。

壬子雙十節之回顧調寄望江南

雙十節。無節不吟詩。回憶漢皋光復日。正逢月魄載生時。壬子到今茲。
休假日。終日愜心期。兩袖清風儂筆債。一牀明月嗜書癡。香到桂花枝。
旗五色。吳下任風飄。壯士兵戈長不用。美人歌舞好相邀。涼夢落今宵。
燈萬盞。照澈浦江湖。裙屐兜風曾有約。茶烟遣興太無聊。風雅自高超。

賦得難乎其爲中秋得秋字

三五逢今夕。江南動客愁。幾家遭大難。何處賞中秋。粒米如珠貴。年華似水流。河山皆涕淚。東亞况西歐。亂世誰青眼。夷鄉我白頭。荊州好風景。庾亮罷登樓。

戚夕

不將瓜果設中庭。銀燭秋光冷畫屏。此是江南淪陷地。鵲橋何處渡雙星。
橫斷銀河路一條。年年七夕此相邀。女牛弄巧翻成拙。天半如何度鵲橋。

中秋無月賦以寫懷（其二）

一年幾見今宵月。付與秋風秋雨。贏得婦孺都節儉。不將瓜果拜天空。

輓張愛羣女士

青谿姝小傲雲仙。當作掌珠詠破錢。謝絕美妝矯濁世。研通歐學損華年。心驚薤露三秋日。
腸斷荷風六月天。誰識芳魂歸未得。床頭昨賦大招篇。

難得重陽民國二十七年

重陽難得客天涯。西望故園不見家。黃菊何心珍惜別。東籬容有未開花。
山高不爲白雲遮。韻事當年說孟嘉。大好河山半焦土。更從何地落烏紗。

二九陽朔戲詠打油詩五絕九首

歲闌歲又新。新歲物皆春。誰是迎春者。賞春有幾人。
何物驅山鬼。終宵爆竹聲。殘年收拾盡。大地放光明。
作客慣天涯。新年百感賒。飄搖風雪裏。知是難民家。
米蠶操奇贏。小民幾死生。禁烟改元日。轆轤斷腸聲。
恭喜老鄉親。光臨滬海濱。聞名欣識面。道是未歸人。
報道梅花信。江南第一枝。折來分玩賞。相率費猜疑。
臘盡肇元辰。桃符萬戶新。奸商無別事。忙煞接財神。
不道迎新歲。迎來別樣新。無衣更無食。十足隔年人。
舉國莽烽烟。桃源別有天。乞憐搖尾者。一路拜新年。

看璇宮劇社夜演明末遺恨連想到中華民國八二三

舊恨兼新恨。遺來一樣深。風流名士淚。豪俠美人心。身世悲生死。河山感古今。獨憐識時者。與世共浮沈。

抱病有感

崇朝拍馬夜吹牛。此是做人第一流。惟有千秋馮大樹。獨將風骨傲封侯。
米珠薪桂惹人愁。終日羈郵作馬牛。漫說養痾綿百藥。金錢療治蹙眉頭。

二十八年除夕憶亡婦

過盡今宵又是春。蓬頭跣足一時新。如何有國有家者。不做良民做難民。
玉容惜別幾春光。回首前塵肯渺茫。猶憶客年度除歲。夜深人在黑甜鄉。
合天下人今夜忙。高燒銀燭照紅粧。今年今日度除歲。人在溫柔第二鄉。

繼室鳴玉一週紀念連想到四週紀念亡妻彼姝（步新婚之夜原韻）

如飲醇醪入醉鄉。人生端底幾春光。（用成句）月圓鏡影疑成夢。風散鐘烟別有香。草草光陰催景短。茫茫泉路話情長。一年容易元宵節。花落花開出繡牀。

辛巳重九十首錄四

一夜霜風萬樹枯。亂山改態客心孤。不知愛酒陶元亮。一樣今朝醉得無。
故園西望路漫漫。心事一腔走筆端。只有黃花爭氣節。低頭故不向人看。
青衫典盡客中衣。物換星移事事非。三徑就荒誰管領。斜陽深處亂鴉飛。
世亂遷延作客難。一身聊寄海天寬。追思國事興亡恨。莫作登高九日看。

辛巳之春

好花不爲惜春開。今日櫻花昔日梅。何日春隨煩惱去。亂紅吹盡不歸來。
客走天涯歲載華。無風波處卽爲家。江南三月春如海。一路斜陽不見花。

辛巳之夏

清齋六六寂人蹤。人過難關第幾重。暮地一聲雷雨作。日光聚處白雲封。
此生合受炎天暍。滌盡炎威雨後涼。十里芰荷齊出水。迎風不斷晚來香。

辛巳之秋

生活艱難達極顛。飄零身世又秋天。曠懷多少興亡恨。三十年中第五年。
秋色平分月一輪。相逢客裏倍思親。姮娥底事翻新樣。不照遊人照難民。

辛巳重九（二）

高處不登防失足。飄零身世滯江湖。癡心我欲逢人問。劫後故山尙有無。
暗無天日故園村。路上遊人欲斷魂。山盡含羞花竊笑。人間何處是桃源。
怪底重陽有舊新。舊時花樣十分真。而今真相成陳迹。采菊泛觴無一人。
無花無酒兼無蟹。囊更無錢祇有詩。不管東來雲氣惡。新詩千首祝來茲。

雙十節偕侯師保三遊法公園口占

神州彌望戰雲酣。流落鄉心太不堪。骨肉分飛田舍沒。天涯何處是江南。
離鄉我是無家客。人獨何心不見家。別有仙源勞問訊。年來鎮日看桃花。
節逢今日成雙十。一樣歡迎似去年。何物公園伸慶祝。新詩吟就夕陽天。
故鄉何處暮雲酣。米價如珠民不堪。畢竟庾郎心不死。哀聲猶是在江南。

端陽寄懷

避秦人去畫樓空。樓外烽烟照眼紅。掠取榴花好顏色。不知何日是天中。
茫茫四顧海天高。海上風狂吼怒濤。報國男兒曾幾箇。閉門終日讀離騷。
新亭榴火舊風光。更帶蒲馨爲舉觴。好景鄉居消受盡。故教作客廢端陽。

悼亡調寄雨霖鈴

名姝難得。把多情事。枉自追憶。同心欲綰雙帶。成歡昨夜。離愁今夕。憔悴花容。落盡紅
英好顏色。淚滴滴。終日秋波。望斷雙魚海天闊。相逢滬海知何日。正清明。等是天涯客。
相居廿四年半。消受盡。異鄉風月。一瞬華年。金鏡容銷。玉案塵積。好教我。無限哀情。
試問從何說。

步華藝山先生重遊泮水詩原韻賦詩兩章并賀

泮水芹香今又春。興懷言采踵前因。品高松竹梅三友。名重詩書畫一人。文字廣交多物故。箕裘遠紹倍情親。眼中飽看風塵劫。疑是金剛不壞身。

異鄉卜築卽園池。富貴功名老不思。（蘇轍句）白髮童顏壽者相。青衿儒術後人師。如公合奏興賢禮。而我重賡肄夏詩。安得一卮陶令酒。聯吟醉到日斜時。

其二 代顧彬生作

一團和氣四時春。善果無非種善因。多福多男多壽客。杖鄉杖國杖朝人。詩書門第猶如昨。骨肉天涯倍覺親。別有桃源好山水。看山看水自由身。

小疊峯巒淺作池。蓉湖秋水繫人思。千篇珠玉老吟客。一幅丹青老畫師。鬢字更修橫舍句。泮宮載咏魯侯詩。壬寅先例承丁卯。正是橙黃橘綠時。

八年元旦詩

兩載不聞爆竹聲。韶華驚見異鄉更。一聯恭賀宜春帖。千炬壯觀不夜城。歲月旅邊苦行役。乾坤劫後活新生。今朝猶是寅回谷。還我河山享太平。（戊寅）

新舊一朝變。流年運不通。血痕埋地碧。烽火燭天紅。家室亂離後。河山搖落中。他鄉延歲

月。身世感飄蓬。(己卯)

爆竹一聲滿地紅。朔風吹盡又東風。流年倖運知多少。己卯庚辰想像中。梅花臭味柏枝身。又作天涯獻歲人。穴蟻釜魚收拾盡。河山還我太平春。

不堪攪鏡絲千縷。可奈征衫淚一雙。爲怕春光先泄漏。日高猶是未開窗。(庚辰)
無花無酒讓今年。柴米夫妻各一天。爲問歲朝何所事。飢時思食倦來眠。

曾記呼盧遺新歲。華燈齊上月明初。而今新歲如常日。兩地知心一紙書。
一聲將伯向誰呼。柴米油鹽色色無。自是無魚亦無肉。絲絲雙鬢老肌膚。(辛巳)

飄殘風雪漾晴暉。報道春來客未歸。恭喜不知成底事。駭人生活逐年非。
而今爆竹無聲息。山鬼橫行不見人。紅日窺窗萬家夢。醒來疑是隔年春。

窮年送盡報平安。差免飢寒強自寬。我欲謝之方不暇。再來肯作賀年看。(壬午)
迎年都是謝年人。着眼年從何處新。爆竹無聲鑼鼓淨。不知今日歲朝春。

舊歲惱人努力除。開門七件作家奴。黃鷄白酒人皆有。長缺歸來我獨無。
六十年爲兩世人。歲朝又見一年春。青衫是我傳家寶。不受滬囑半點塵。(癸未)

春到人間第一天。一聲鶯語一欣然。異鄉不問年新舊。只道今年勝昔年。
春光不到難民家。誰是迎新易歲華。到是倚人老王粲。案頭隨意供梅花。

黃松翠柏自他新。梅帶寒香不是春。鬚髮未修身未澡。算來十足隔年人。(甲申)
新年無歲不天涯。只見新年不見家。爲愛桃源好春色。梅花不看看桃花。

冬去春來又一天。一年好景在春先。爲看海上好風景。看到今年第八年。
三十三年一轉蓬。寒梅着意舞春風。而今花落春何在。破碎山河夕照中。（乙酉）

黃浦送別（軍兒奉調台灣接收郵局）

一別家山萬里遙。郵書昨夜促星輶。白雲望斷澎湖樹。碧水聽殘歇浦潮。父子晨昏加夢覺。夫妻柴米最魂消。此鄉信美非吾土。相送春歸伴寂寥。

丙戌清明

黃浦江頭雨乍晴。無柴無米過清明。紅麗日下櫻無語。綠暗風前柳有情。孤塚牛羊形影亂。故山猿鶴夢魂驚。踏青芳草皆春氣。何事遊人鳴不平。

庚辰清明有感

春光大好奈愁何。佳節清明病裏過。正是江南好風景。尙餘春色一分多。
萬千紅紫絢春光。除却桃花又海棠。燕子不歸花落去。空留荒草冷斜陽。
清明無歲不他鄉。相見年來恨轉長。今日春郊開禁例。惱儂不爲踏青忙。
故鄉今日是清明。多少園林委棘荆。一片斜陽青草墓。至今裹足斷人行。

法國公園借朱燮鈞啜茗

醉酒看花不足誇。清陰坐對四圍遮。問心自愧毋多熱。何必飲冰惟嗜茶。
鷄蟲紛紜作一團。傲遊天地着身寬。分明一幅流民畫。且作茶餘袖手看。
夕陽西下噪棲鴉。暮色蒼然滿目遮。漫說園林風景好。榴花紅到別人家。

美機襲滬家人適返浮橋以避轟炸詩以慰之

緊張空氣暑如焚。黃浦江頭又別君。盼到和平圓好事。月明秋色正平分。
明知世亂難爲別。綠樹田園空氣新。諒我苦衷了塵俗。枯楊留待送歸人。
鬚眉不敵女兒身。老少夫妻別緒新。十里烽烟好風景。飽看容我未歸人。
中秋先過後重陽。不滯異鄉返故鄉。黃菊相逢開笑口。一枝秀挺傲新霜。
機聲怒捲浦江潮。三疊陽關路不遙。小築園亭八十里。一灣泓水是浮橋。

丙戌天中客海上

十年不到墓門前。無節天中不黯然。先祖有靈倘相問。逢人休道子孫賢。
五年八月計成空。生死雙飛一夢中。大小三軍齊俯首。受降城外石榴紅。
窮居不事掩齋扉。生活駭人逐日非。不及去年端午節。防空壕裏看飛機。

價臺高築萬重山。星月照人自往還。到是老來雙脚健。年年海上過難關。
滿腔熱血半甌茶。清絕還宜處士家。一樹榴花紅不住。隨風輕透綠窗紗。
冬烘頭腦老翻新。不逐利名不辱身。一樹梅花一園竹。八年我是過來人。

三十一年中元節

旭日東升宇宙新。一朝天子一朝臣。衣冠不是真禽獸。疑是孟蘭會上人。
酷暑侵人歲不同。火天何處買清風。盡人可畏不堪說。倒影花無一朵紅。
行將六月又加半。距我生辰第四天。到是亡妻先一日。九微燈燭照窗前。
老來不作杖鄉遊。世外桃源何處求。寄語倚人樓上客。再遲一月賞中秋。
天降喪亂身爲客。一事無成兩手空。祀事由來循俗例。墓門宿草泣西風。
自昔中元稱鬼節。聯翩餓鬼乞登山。年來米價如珠粒。餓鬼與人同一般。
月明今夜倍淒清。月再圓時分外明。只恐金吾顯身手。閒街火禁到三更。

癸未七夕國難未除率賦二首

制空戰勝入雲堆。天暮無光月色催。到底愛情讓牛女。機聲不見鵲橋來。
雙星終古愛情多。其奈無情愁裏過。燈火宵禁行不得。莫教失足墮銀河。

七夕排悶

如何老少夫妻節。天各一方作客遊。惟有天孫情更好。看他八次會牽牛。（乙酉）
鵲橋高駕入雲深。不盡纏綿兒女心。若問女牛真面目。天墉第一次黃金。（丙戌）

中秋五度詩

月光搖夢眼長醒。少却砧聲枕上聽。兩世功名雙鬢白。百年事業一燈青。鄉音岑寂心懸旆。
時局艱難口守瓶。疑是中秋作重九。秋風秋雨惱長亭。（庚辰卅年）

卜居身似在長安。月到當頭擬飽看。底事嫦娥工掩映。宵來故不出雲端。
一家八口客天涯。金粟人間又發花。莫向江南回首望。月明都爲白雲遮。

嫦娥終夜替人愁。屈指而今第五周。不盡河山搖落感。故藏春色暗神州。

及時行樂醉時歌。秋露清風歲月多。莫謂無人爭氣節。窮居四十二年過。（壬午卅一年）

愁柴愁米不愁住。今日胡爲住亦愁。與世無爭聊自適。從吾所好復何求。非關壽數橫遭折。
不合時宜好乞休。珍重孟嘗門下客。月明最好是中秋。（預定日本乞降不出中秋前後）（癸

未卅二年）

無邊秋色客中尋。不見當頭皓月臨。大地打成愁一片。更從何處照人心。

團圓一樣中秋節。今日爲誰感慨多。回首秋風江上月。盈虧四十一年過。（羈滬四十一年）

登樓遙指白雲端。烽火連天月上難。料得姮娥愛名節。深藏不讓外人看。
今年今夜月當頭。一事無成兩鬢秋。民不聊生心未死。陸沉不信在神州。（甲申卅三年）
登樓何處問前遊。劫後河山滿目愁。明月二分虫四壁。桂花黃到海天秋。
受降城外五千兵。不事笑聲是哭聲。夫將功成何處去。南冠憔悴集中營。
不信秋光去不回。殘荷落盡桂花開。匣中月餅投閑久。依舊團圓出世來。（乙酉卅四年）

丙戌中秋再寄軍兒臺北

他生不到讀書家。囊內無錢百事差。海上窮居秋又半。澎南分看月同華。蛩聲斷續雲千里。
雁影橫斜水一涯。今夜吟窗相對坐。微風香到木樨花。

中華民國二十九年重九吟

蓬蓬雙鬢雪霜侵。孤島幽居不厭深。今日重陽成隔世。故山三載罷登臨。
興味蕭然似野僧。茱萸徧插我何曾。九龍山色翻新樣。多少遊人高處登。
無家我是落天邊。是假是真又一年。山上有人山下笑。不知帽落過山顛。

辛巳重九詩其三

別後家山歷劫塵。桃源何處避強秦。黃花冷落重陽節。故透晚香待主人。

何須角逐戀風塵。吾道不孤自有真。黃菊滿園秋景好。故鄉誰是看花人。

壬午重九拜讀保三吾師近著軋糖七律一首次韻奉和

（限用糖。量。鄉。腸。糧。五字爲韻）

只愁柴米不愁糖。底事而今費較量。末路且教甘作客。無家那得好還鄉。中原板蕩三緘口。生活艱難九轉腸。十萬僑胞誰似我。寅年吃盡卯年糧。

其一

安排柴米講求糖。接二連三費考量。十里征塵皆客路。重陽佳節又他鄉。儘多吃飯免開口。何敢題糕欲斷腸。半菽差堪供一飽。登高不乞首山糧。

其二

赤色粗砂二兩糖（日配糖二兩）每人每日好商量。不堪設想稱孤島。何以爲家滯異鄉。劫後河山千點淚。老來生死九迴腸。欣聞世界均貧富。一律頒行計口糧。

癸未重九（民國三十二年）

青鏡照影著征袍。下筆難題九日糕。雲路讓人先捷足。下風甘拜不登高。

天涯我是倦遊人。何處廬山面目真。第一登高好時節。熙春七日是靈辰。
茱萸遍插鬪時新。知是一朝得意人。山色如龍入雲去。不教炫目亂吾真。
楚歌四面逼人來。兩袖清風萬念灰。客裏不知秋幾許。一枝報到菊花開。
天公負我好容顏。詩思全消柴米間。往日離愁銷濁酒。而今庚癸乞登山。
江南回首尚烟塵。節序空懷次第新。風雨最難忘九日。尚餘一日不成旬。
五年彈指亦前塵。山色湖光別樣新。奚止十年甘作客。山行盡日不逢人。
桂花看到菊花黃。本是詩人吟興長。誰道倚人門下客。年年海上閱滄桑。

癸未重九題李柏生五湖招領圖（民國三十二年）

君年六十我加二。同客淞濱作難民。衆口嘵嘵遭世變。子身各各悟天真。後彫松柏何妨老。
小隱湖山不計貧。打破愁城迴一笑。桃源重見武陵春。

同日題蕉窗校書圖（同上）

畫師巧可奪天工。秋月春花在此中。誰是芸窗成獨坐。綠陰深處一燈紅。

甲申重九日咏菊（民國三十三年）

滿城風雨菊花天。人比黃花瘦一年。何日花開勝今日。看花日日到籬邊。

無年作客不重陽。五畝何來墻下桑。一顆頭顱千種菊。耐寒獨自傲新霜。
秋風無力菊花飛。九日江南蟹正肥。誰則賦詩花對酒。賞心閒話故園扉。
惜花心事早成灰。况復奇花放不開。此日扶筇看花去。花頭花腦一齊來。
河山作態動人愁。心事一腔半白頭。三徑荒涼餘夕照。陶公歸去不成秋。
好花有約總成虛。客裏尋花花不如。多活一年多一事。最來多讀一年書。
肯將老健鬪時新。息影淞濱不帝秦。一刻未離一刻苦。何曾真作看花人。
好攜香茗伴清幽。不見何人插滿頭。天苟有心惜花意。莫將風雨送殘秋。
章身不見裝衣絮。果腹何來買米錢。如此生涯淡如菊。可能零落到明年。
菊花香裏罷銜杯。秋盡江南去不回。眼底不知寒節破。大庾爲報一枝梅。

乙酉重九咏菊

劫餘廬舍客中天。安得黃花到眼邊。迴憶故園一籬菊。盛開猶在七年前。

同日會晤錢孫卿表弟於無錫同鄉會

梅花看到菊花開。咫尺天涯疏往來。添得兩家新舊恨。君鬚垂白我顏衰。

丙戌重九寄懷侯保三吾師

蓉中山色望中收。誰與登臨賦遠遊。佳節會方逢九日。良宵月恰過中秋。一言不合詩書禮。百事無成柴米油。獨向侯門回首問。可能颯起挽神州。

雙十節（民國三十年）

一年容易感經秋。國弱民貧日望瘳。柴米油鹽兼婦職。風霜雨雪祇旅愁。詩書有味傲榮利。酒肉無緣淡應酬。莫怪黃花標格好。耐寒至性迴難儔。（辛己）

節名雙十就盈數。屈指產生廿五年。願祝申胥期不死。風懷重整五年前。

神州彌望戰雲酣。流落鄉心太不堪。骨肉分離田舍沒。天涯何處是江南。（丙戌）

垂暮秋光劫後天。莫問流年。且說明年。明年今日著先鞭。何處烽煙。如此山川。大地光明解倒懸。月也重圓。花也爭妍。等閒樂事要誰傳。終日籬邊。深夜燈前。（壬午）一剪梅

離鄉我是無家客。人獨何心不見家。別有仙源勞問訊。年來鎮日看桃花。

故鄉何處暮雲酣。薪桂米珠民不堪。畢竟庾郎心不死。哀聲猶是在江南。（癸未）

江南到處有餘哀。猶是登高三日來。羨煞黃花傲凡骨。此生不畏夕陽催。

節名雙十敢相忘。歌不成聲哭亦狂。嶺上芙蓉籬下菊。不知鑒賞在何方。

節是無雙十。年還有兩三。不慶亦不祝。大地哀江南。

自昔逢辛亥。而今又甲申。可憐慶祝者。是否過來人。（甲申）

要將雙十談雙八。國慶日尤勝利年。多少國旗能蔽日。（五國共管）重來點綴漢山川。

封侯心醉幾經秋。今日桂冠學楚囚。豈爲和平參盛典。不憚遠足上恭州。(乙酉)

秋老花殘人不死

側身海上喜粗安。權作桃源一律看。差喜東籬一園菊。傲霜不共衆香殘。
何須角逐戀風塵。吾道不孤自有真。黃菊滿園秋景好。故鄉誰是看花人。
滿腔熱血半甌茶。清絕還宜處士家。領略秋光天有意。東籬爲放一枝花。
棄學就工又改商。飄零身世伴人忙。繁榮滿地隨秋盡。惟有黃花晚節香。
老不入時生亦死。肯將衰朽受人憐。無多薪給了人事。不敵買柴糴米錢。
貧賤夫妻百事哀。骨如枯竹面如灰。不妨老弱窮愁死。勝似奴顏婢膝來。
半生豪氣困郵傳。一夢驚回三十年。還我田園歸去好。獨垂晚節得秋先。
冬烘頭腦老翻新。不逐利名不辱身。三徑黃花一園竹。八年我是過來人。

丙戌重五節懷軍兒台北

六六童顏白髮翁。倦游海上兩飛鴻。桂園樽酒陽關笛。六月光陰一轉蓬。異地相思詩卷裏。
遼天歸夢櫓聲中。澎湖風景知多少。芳草垂青花發紅。
生活艱難處處同。近來歸思動秋風。一囊琴劍開行後。千里關山入望中。追續舊遊題畫舫。
重申新約貯詩筒。榴花照眼離家日。不弱霜楓血染紅。

軍兒自台灣公舉回滬

惜別春申天未明。倉皇行色事宵征。關河萬里電來往。書畫一船風送迎。海上天中牛伏軛。江南秋早雁歸程。人生苦樂安吾素。莫學鶯啼作怨聲。

壽楊丈味雲常珍之慶代孫卿作

槐花忙踏早秋天。辛卯登科憶少年。力祛關餘抽稅法。精研國際理財篇。郎曹相府言驩樂。廬墓田園啓象賢。最是津門興棉業。無邊功績到今傳。

識破人生又十年。介眉香覆臘梅先。才從裕國稱交口。功在愛民賴仔肩。自昔簪纓動卿相。而今詩酒傲神仙。添籌遙祝慚無語。一霎期頤到眼前。

丙戌近作（百花生日）

花花世界鬧時新。誰則花開不染塵。花欲如人拜生日。莫將獻媚負青春。世間無物無生日。生不逢辰死亦多。我却和花半生死。算來六十七年過。

推翻龍興寺

不是沙彌是漢奸。逍遙法外過三年。可憐立地不成佛。跪倒將軍大樹前。

香積廚傾仰歐化。誰來胡越與同舟。天生城北徐公美。香火因緣付水流。

春寒

故園開放百花生。惟有名花不近名。豈是甘居退人後。始知尙未過清明。
好花贏得晚春榮。花影花香倍有情。天故迎人惜花意。東來風勁峭寒生。

中原多士

一番勝利好消息。吃飯難於蜀道行。菘豆芝蔴錢不值。故抬售價虐民生。

丁亥天中寫懷（緒承時年六十有七）

國事何從問短長。不知不覺過端陽。人於禽獸又何擇。六十七年夢一場。
儘多冥粟淡於水。不盡驕陽鬢已霜。欲乞來生了書債。三更廁上讀文章。
九州處處健兒裝。寶劍犀弓大羽囊。八載九州如夢覺。甘嘗梅子墮流黃。

丁亥七夕

天堂纔作楚陽臺。知是仙槎到幾回。爲看雙星無別事。風懷最好渡河來。
而今弄巧翻成拙。柴米油鹽愁煞人。莫謂天孫苦離別。一年一度不愁貧。

保三吾師面授元日謁墓圖囑題小詩恭詠三絕

不知做父不言孝。無古無今孝爲先。到是新年開瓶例。拜年先到墓門前。
事親事死此心同。爆竹一聲滿地紅。莫謂無人唱同調。侯門三尺響悲風。
欲將龍鼎度龍笙。此是先生屐後生。誰道遊春人意懶。故將元旦作清明。

離鄉四十八載初次訪龍頭渚作七絕兩首以遣遊興

偷得浮生三日閒。龍頭來去看湖山。湖光山色不相識。說與旁人笑顏。
路都不識行將倦。橋爲好高劫後平。鬚髮逢人白於我。是誰十足是先生。

救救

朝朝除夕走天涯。幾見有人學孟嘉。黃浦江中債臺上。更從何處落烏紗。
荆榛滿目苗成陰。遮斷龍山百丈深。差喜老夫卑自牧。每逢九日不光臨。

壬午重九

海天無日不波濤。又見家家薦鹿糕。今日恰逢休沐假。破除向例罷登高。
羈居不是在長安。更比長安作客難。一飯可堪支一日。餓驅肯讓別人看。

吃罷冬至夜飯後

吹牛不慣况吹螺。六十七年夢裏過。可恨黃金時作祟。牀頭只許別人多。
青衫無價愛吾真。海上寄生席上珍。人比黃花堅晚節。一陽送盡未來春。

自嘲

國家勝利國民貧。貧不聊生是我身。欲借筆耕爲活計。壽長壽短竟無人。
魚而車是療吾貧。我本金剛不壞身。縱說孟嘗禮賢士。可曾算得自家人。

蒸糕

重陽已過不題糕。蒸是何妨來一遭。可歎年年不景氣。蒸來等是罷登高。

別彼姝十週紀念有感

吾將老矣歲將闌。下筆奠妻著句難。盼到古稀天假我。低昂奚止十年看。
倦粧人去鎖眉痕。何處柔鄉別樣溫。倘得返魂遺餘興。銀昏不度度金昏。

揮煙塵竹枝詞

無米爲炊煙絕跡。家徒四壁淨無塵。一塵不染揮何事。天地常留自在身。

送灶

司農掌握等虛空。人在飄搖風雨中。百五萬金米一石。灶君知否奏天公。

如此錢物

無物不成物。有錢不值錢。無錢偏愛物。有物不愁錢。錢外惟多物。物中只少錢。還將囤積物。來換臭銅錢。

戊子百花生日

再遲三日春將半。花到人間第一朝。今日花生何日死。桃花零落李花凋。花朝何物許相邀。一角紅綰枝上飄。蝴蝶多情踐春約。雙雙飛過綠楊橋。

清明節旅行

諱言勝利說和平。不是笑聲是哭聲。政治筭如朝暮改。不知何日是清明。無風無雨漾新晴。銷盡旅魂似此行。盜賊橫行匪猖獗。不知何處是清明。乍寒乍暖乍陰晴。山色湖光畫不成。五日一風三日雨。一春能幾日清明。

答侯師保三

侯門爲詠客中情。滬錫觀光作客行。未遇未休秭歸路。再經牆仞拜先生。

清明掃墓

青山一瞥塚千堆。點綴清明上塚來。不見墓門在何處。風前飛上紙錢灰。
新翻世界舊田園。有客倦遊謁墓門。大樹百年今有後。老夫少婦衆兒孫。

甲申立夏病困客邸

贏得一身衰病貧。趁將立夏獻三新。典衣敢效王章泣。請藥徒煩許靖曠。囊洗嘗如今後玃。
花殘倘或再來春。修文甯得彫龍手。不及紙糊泥塑人。

戊子立夏食粥一匙飲水一杯病有轉機

一年衰病一年非。昨日清明上塚歸。海上繁華春事盡。江南故舊尺音稀。苦無良藥療貧骨。
吟有新詩養息機。畢竟東風無氣力。榆錢吹散不成飛。

詩兩首自春徂夏

繁華夢醒畫樓空。都在蕭條風雨中。我恨不知春去處。落紅指點過牆東。（暮春）
綠樹陰濃芳草齊。終朝驚聽轉黃鸝。桃花也解留春意。只是無言飛過溪。（首夏）

破樓獨燈

眼前人物幾英雄。朱眼墨晨道不同。何處烏啼山月笑。誰家蝶舞海雲空。百城書卷干戈後。
三宿茅齋風雨中。天下未平歸未得。莫教輕看白鬚翁。

開封失陷

玉津榴火滿園紅。鷹柱朱欄一炬中。細柳新蒲大梁驛。魚龍無地幻煙空。
可憐焦土具神通。朝市囂諠一掃空。爲向金明池上望。絕無人過駱駝虹。

徐縣長兩次晤教感賦以送其行

如何循吏掛冠去。一百萬民挽不回。西望鄉關祖君餞。平安容我祝三杯。

隱懷

有美玉於斯。山深人不知。不知老將至。容有出山時。

咏鬼人

一縷幽魂天地中。孟蘭會上主人翁。胡顏之厚言之醜。此是揚州羅兩峯。
招財利市漢奸做。多謝裕仁一點恩。獨惜無人不是鬼。可能日日過中元。

吾師陶若洲。張葵卿。張竹舟。程少鳴。馬程千。及周鳴初。
。或教中文。或授西文。多年未晤。俱歸道山。慨然有感。

中西文化負時名。桃李無言花滿城。誰則三年通一藝。七旬白髮老門生。

平湖望月

砲雲彈雨亂紛紛。湖上青天無片雲。月色湖光稱兩絕。何人秋色肯平分。

客中冬至

不將高處望家山。家在飄搖風雨間。粗讀詩書餘客夢。傲遊山水半人寰。茫茫塵世一身債。
落落功名兩鬢斑。與世無爭無世累。難關度過過年關。

中秋望月賦贈吳稚暉先生並寄侯葆二吾師民國三十七年

未遑牟利敢圖名。可恨利名誤一生。畏路多行雙脚健。債臺少到一身輕。河山搖落日無語。

砧杵敲殘風有聲。四十九年倦遊客。飽看秋月向誰明。

戰事消息日接於目生活問題日聞於耳民國三十七年

寒蟬事業托浮生。四大飄空一笠輕。只有我時忙後轉。不如人處媿前行。無功無過盡人事。何德何仇淡世情。草木朝榮能幾日。未秋蒲柳最知名。前門拒虎後門狼。况復衰年白髮長。朔漠已無秋草碧。南都猶有晚花黃。江楓葉落家何處。山桂香消天一方。世路茫茫行不得。崎嶇那得有康莊。

春瘟口號

巫醫各自逞雄謀。惹得病人不自由。痛哭何能療沈疾。可憐厥疾不能瘳。

(幸遇西醫顧毓琦先生痛下砭鍼霍然而癒)

花朝櫻疾

故園今日百花生。生不逢辰空有名。只恐遊人一回探。春來故不放天晴。

乙酉立夏

鶯鳴求友不成聲。知是青陽令已更。布穀有心課農事。催忙四出勸躬耕。

百花過盡綠陰成。一片蕭蕭風雨聲。疑是黃梅消息早。天教故意弄陰晴。

前題調寄水仙子

清和四月麥秋天。風景已非勝昔年。穿花蛺蝶深深見。情脈脈。態翩翩。弄芳晴。雨後風前。對舞媚紅日。深藏貯翠烟。甘受人憐。

乙酉餞春

春光老去太匆匆。零亂殘花滿地紅。燕子不來人不至。畫樓深鎖夕陽中。繁華夢醒畫樓空。都在蕭條風雨中。我恨不知春去處。落紅指點過牆東。

前題調寄山坡羊

斜陽影裏。一天暮氣。欸光陰虛擲成何濟。爲誰忙。爲誰飢。雲山遙隔人千里。不問春來與春去。來誰叫你。去誰送你。

雙十節登樓望月有感（調寄桂殿秋）

清虛（叶去）府。廣寒宮。文章何處哭西風。闕候姓氏今猶在。舊記登科廢織工。憑月姊。問天公。奈何鳳去玉樓空。斧柯要向吳剛假。香透瓊林桂樹叢。

穿玉兔。鎖金蟾。綠筠堂上水荭簾。嫦娥已老含簧幼。要斷冰輪待阿纖。塵慮減。客愁添。誰教別賦緜江淹。相思欲寄難爲寄。紅豆朝朝暮暮拈。

菊花開日

離家五十一年春。不作瞻家報國身。孤島風雲三歎息。等閒讓過看花人。江山何處哭途窮。同在滿城風雨中。不作聚頭小扇子。始知兩袖有清風。元亮歸來未有期。黃花零落已多時。生成傲骨凌霜性。不許人間折一枝。我生六十九重陽。耳不重聽目有光。差比東籬一園菊。晚來獨自殿秋芳。看花還讓種花人。老圃秋容感夙因。桃李爭春莫相妬。一般失足墮紅塵。(好花不壽信然)若教競尙說青蚨。愧對人前百不如。自幼鉤名憑秃筆。(十歲十月始賦詩)何曾枉讀聖賢書。好花最愛拾人歡。我却從花背後看。高臥南山陶隱士。身閒彌覺世間寬。再遲一月小陽春。出水芙蓉點綴新。黃菊有心傲春色。嶺梅不共接芳鄰。孤高絕俗爲誰妍。無復霜枝在眼前。今日潯陽江上望。半江秋水一籬烟。花如有約續前遊。何必今朝插滿頭。來歲不教風雨作。一帆風順掛高秋。

庚寅七十自壽距七夕五日偶抱探薪臥床不起戲咏排悶

英雄只怕病來磨。奈此異鄉七夕何。寄語牛郎休學我。銀河雖近不經過。

不談扁鵲談烏鵲。鵲遇今宵倍有靈。忙煞家人搗藥餌。忘將瓜果設中庭。
飄零孤島耐安居。又見秋風到敝廬。不可以風有寒疾。儼然秋候困相如。
既熱且寒瘡氣多。果將何物挽微疴。汗流宜散不宜發。禁用柴胡用薄荷。
鵲聲聽不到林梢。此與雙星道義交。最好奮身齊下水。天河深處築香巢。
更何心事巧穿針。兒女燈前有孝心。一夜推敲適吾意。管它一往兩情深。
畢竟人間勝天上。糟糠無夕不團圓。牛郎七十不言老。相距天孫廿五年。
終歲不離傍帝都。合歡一夕繪成圖。而今人世滄桑易。天帝令行解放無。
醫士欲來與倍賒。車行九轉路橫斜。再來他日倘相問。大樹門前第一家。
一年一度幾經秋。身世關心到白頭。我是天涯倦遊客。算來五十一星周。

中秋月（調寄水調歌頭）

秋色江南好。月是故鄉明。今宵黃浦江上。孤客最關情。不堪中秋佳節。倚遍闌干十二。彈
鈞兩三聲。瓜果成陳迹。人靜夜三更。一樽酒。千里目。百年心。仰天莫問。何處仙樂奏昇
平。誰道琴棋書畫。我說油鹽柴米。一事竟無成。獨惜新生路。不見照人行。

無錫同鄉會太湖俱樂部彩排代單瀛暉作

海上刺船強自寬。蕭閒人意海潮寒。眼前如許花兼絮。可作登場粉墨看。

七十自壽（二）

六十九年去不回。冬心空抱嶺頭梅。人言自壽作何說。省得親朋壽我來。
殺生害命奈何壽。況在限期節約間。天苟壽人娛晚景。不教日日度年關。
大樹西風餘一枝。千秋饗祀有孫兒。蓼莪篇什陳情表。是我今朝介壽詩。
精糠堆裏好夫妻。雲罽來樓月向西。一幅鴛鴦題吉語。展開不見繪雙棲。
飯依三戒淡如僧。嗜酒於今迄未曾。况復遺愁遭杜絕。不勞晉爵頌昇恆。
三百里餘路一條。驚心人與歲俱遙。行年七十向誰說。昨日今朝隔一宵。
頭將半白齒猶堅。不類香山杖國年。也許蠟梅天竹子。紅黃相對傲神仙。
辛苦一生歲月遷。人如牛馬長郵傳。回頭寡過知非日。偷得浮生二十年。
報恩人少受恩多。三讀隨園客裏過。自問差堪告無罪。人都韓信我蕭何。
虛聲謬采到蓬門。積善人家有子孫。不孝有三誰第一。絕先祖祀負親恩。
歲歲送窮作客忙。蠲除肉食菜根香。世間縱有安期棗。不是延年益壽方。
案牘勞形手不停。愛吾儒素布衣青。王孫僚倒風塵裏。曾見幾人拜壽星。

乙酉除夕

丙戌元日亡妻彼姝七旬冥慶緒承無以爲禮弔諸以詩以示子孫

衣冠楚楚面團團。不笑不言忍淚看。祇我離情消未得。迴腸九轉試辛盤。（不相見者九年）
一場六十五年夢。過盡今宵喚未回。風燭殘年忍不死。與卿爲祝古稀來。（不吃麵不唸經心
香一瓣祝卿相見來生）

無端痔漏乘衰作。痛極終宵睡不成。豈是芳魂離太遠。床頭啼不到鶯聲。（前夜痔疾大作終
夜不寢翊日瘡破血流而寢以安）

庚寅清明

神聖勞工我不如。窮年最好是家居。清風明月無人管。大好湖山一老夫。
尙餘一半未來春。寄語人間白髮親。我是孟嘗門下客。蓼莪唯一負恩人。
非關行路出門難。芳草墓門不忍看。我逐征塵卿謝世。料卿與我共平安。
窮途僚倒路橫斜。問我歸程未有涯。知是故鄉非樂土。十年九載不還家。
今日家家祭掃忙。好山好水舊山莊。分明祭掃盡人事。獨惜無家滯異鄉。
一生良藥病窮愁。滋味備嘗七十週。健鶴縱稱性嗜水。不隨鷗鷺狎邪遊。
生活一年難一年。桃花含笑柳絲牽。閉門不管春來去。興到新詩寫一篇。
不遲七日百花生。天爲養花不放晴。天地清明猶有待。再來待到賣花聲。

漁莊度歲一九四八年除夕

不將年事分新舊。日在客中相送迎。鑼鼓喧天慰離別。逢人敲出故園聲。
八百金圓糴米錢。誰家灶火起炊烟。黃松翠柏無人問。過盡今朝老一年。
不爭名利爭公理。此是和平第一關。爆竹萬家梅半吐。和平空氣在家山。

岳飛

不信牌銷十二金。精忠報國負初心。岳王奉詔爲何狀。大漢奸雄無古今。

七七慶祝

儘多鑼鼓不須驚。打得驚人聽得清。猶恐執迷人不悟。願他多打兩三聲。
紅旗招展榴花明。多少參加數不清。十里繁華芳草地。看來五里作遊行。

慶祝世界和平錄二首

星旗奪目萬人家。火炬通明一樹花。家事不談談國事。詩書不問問桑麻。
八千子弟幾欽裙。到處和平解放軍。慶祝要知何日始。一週恰好過秋分。

重九旋里有感錄二首

多少青山在目前。無人不愛踏雲烟。可堪海上倦遊客。七十於今少一年。

肯趨時好負時名。三寸毛錐誤一生。入世難辭書馱子。看山不問不知名。

賀友生子代顧彬生作

願祝鴛鴦歲月長。玉麟天賜早呈祥。書聲將繼龍題字。詩韻如聞載弄璋。蓬矢預酬四方志。蘭芽新茁一枝芳。歲除筵上饒生趣。恭喜阿翁喜欲狂。

林卓午六旬代黎階平作

九龍衍曲紹淵衷。美意延年有士風。蠻語精研工應對。郵權力挽利交通。出膺軍務遂初志。頒賜助章旌大功。偕老齊眉慶花甲。南星高照白頭翁。

壽王鯉庭先生暨唐夫人常珍之喜

鄉園榮膺薦賢書。警世文章富五車。田賦清釐纖柜累。河流疏濬瘁薪儲。孟嘗報國無多讓。周楛勤王有不如。天愛閒人與開福。江湖耆舊幾乘除。

己丑除夕飛機不至

窮愁何以了平生。負國負家罪不輕。自古聖賢皆有死。飛機直視放風箏。歲除筵上與誰濃。第一勞工次勞農。此夕不除待何日。三更靜聽子時鐘。

風寒密布雨霏霏。不見雪花滿地飛。悔禍從知有天意。好憑風雪阻飛機。

庚寅元旦

別來六十九年春。五有一年滯海濱。七十才從何日始。驚聞鶯燕一聲新。
梅花饋歲暗香飄。未必寒從九九消。粒米如珠磨不得。忘將新歲吃元宵。

戊子中秋奠亡婦

仰天我不見明月。月不見人怕我愁。兒女雙雙孫兩對。春江十上殯宮秋。
無風無雨也無月。惟有愁雲滿目遮。瓜果拋殘香案撤。團圓知在別人家。

壽顧彬生先生暨龔夫人七旬榮慶

三言兩語不成詩。來作先生介壽詞。出口成章貽德祖。從心所欲紹宣尼。筆垂蓮幕宦遊後。
袖領梓鄉抗戰時。天假善人半花甲。百年再與祝齊眉。
梁溪有個活神仙。不墜青雲不愛錢。避地幼安同作客。歸田元亮合參禪。師資毋忝前修定。
婦德遺欽內助賢。贏得陽春好天氣。芝蘭秀茁畫堂前。

壽杜月笙先生六秩大慶代馬少荃作

排解功高魯仲連。華洋糅處策安全。文徵上壽花週甲。巧乞新秋月正圓。四海訂交名士集。千金市義孟公傳。他年鄉土修青史。福祿鴛鴦號散仙。

流年又喜經重九

登高西望隔鄉關。六十九年去不還。湖海長征雙足健。煙雲不障一身閒。青山有約乖遊志。黃菊多情開笑顏。只道做人了人事。功名知在有無間。

太湖餐廳開幕

艱難創鉅幾曾經。客裏家山入夢青。縮地長房顯身手。太湖風味在餐廳。江南三月焙茶天。七椀風生穀雨前。寄語鄉賢三十萬。餐廳來試惠山泉。

感時代葛壽滋作

三年餘更九年餘。備豫而今托子虛。風雨徒增孤客感。家山肯讓別人居。可憐孤島千杯酒。不敵故鄉一紙書。五月江深涼似水。天心變態欲何如。

上海郵政局長乍配林氏逝世感賦二絕

裝雙做啞不羈才。底事惹人號獨裁。生活已頒新指數。一年六月不公開。

見人歡笑背人啼。金屋藏嬌十里隄。不了了之惟一死。魂歸不到法蘭西。

七月十日亡妻彼姝七旬壽誕家奠誌悼

寸腸愁事年年有。何日相逢仔細談。遍地殺機滔天禍。哀聲一片在江南。
欲將何物慰離居。請酒誦經總不如。遙憶里兒尙相問。澎湖一月兩新書。
玉釵飛不到銀屏。垂老征衫依舊青。記得來朝我生日。焚香禮斗誦皇經。

變相天中節旅外有感民國三十二年

昊天不弔亂中華。雷雨龍蛇見爪牙。鹿死未知在誰手。榴花雖好滯還家。
歲月勞人端午節。江山無主衆咻時。年年家國興亡恨。只怕興亡人不知。

賦得夜深燼落螢入幃得螢字五言八韻戊戌十八歲舊作

快讀深宵裏。迎涼戶半扃。燭殘搖落燼。幃薄入流螢。囊照臨書幌。膏明射畫屏。一條窗下短。幾點案頭零。猷吐頻移綠。光騰乍閃青。吹燈窺朗月。穿幙認飛星。四壁蟲聲寂。三更玉漏停。紗籠應位置。金碧透瓏玲。

題侯保三吾師七旬補刊錄

道德文章是我師。七旬補祝壽言詩。名山宏著邁千古。寰海壯遊快一時。捲土風雲多變幻。躋堂桃李苦支持。生成傲骨知誰是。仙最多情佛最慈。

壽侯保三先生七十代顧彬生作

七十鄉賢一老翁。風懷自昔震江東。門牆桃李蔚人瑞。歐亞文章颺國風。十里烟塵滯遊屐。一腔心事遞詩筒。若教九錫標名品。都在刼餘反省中。

壽少樵先生六翬

齊眉夫婦杖鄉年。况復兒孫纒膝前。建國工程勤築路。傳家事業務耕田。救災給藥濟民困。興學捐貲仗母賢。江浙失和謀善後。論功還自理財先。

楊味雲先生八旬大慶以詩賀之

此是遜清辛卯年。登科釋褐着先鞭。歐西財政參新法。薊北鹽田掌大權。津魯四民安井里。子孫三代活神仙。詩文章奏分輕重。下筆千言策萬全。津門紗市首華新。初唱鴻臚第一人。價重登龍天下士。官高騎馬幕中賓。英倫毋玷三欽使。瀛島相隨五大臣。閱世滄桑老松柏。歲寒獨秀見精神。

辛巳臘月望日對月有感

十二圓經又一年。再圓猶是早春天。料他死魄生明後。依舊分明分外圓。

庚辰除夕卽景

蟬蛸身世感塵緣。劫後瘡痍滿眼前。安得盤檯獻新歲。何來爆竹送殘年。米珠薪桂闌街語。十室九人枕石眠。三十六旬盡今日。難於插足上青天。

丙戌中秋天雨

去年不見今宵月。不是今宵不肯明。只恐遊人貪玩賞。忘將苦戰答昇平。（去年陰雨今年亦然但人事方面已遠非去年可比矣）
登樓遙指白雲端。烽火連天月上難。料得姮娥愛名節。深藏不讓外人看。

月餅（抗日勝利之第一中秋）

不信秋光去不回。殘荷落盡桂花開。匣中月餅投閑久。依舊團圓出世來。

癸未七月三十一日爲郵局被迫解職之日暮年有感

半生豪氣困郵傳。一夢驚回三十年。還我田園歸去好。獨垂晚節得秋先。（上年八月一日爲日本陰井末男實行侵掌上海郵政管理局之權）

甲申七月十一日爲緒承第六十四屆生辰感懷身世兼憶亡妻

百年難覓白頭親。六十四年作老人。到是山妻先出世。可憐海上化青燐。（亡妻年六十八）

癸未九月一日始識丁熊照先生于匯明敬紀諸以詩

慕李有心一見傾。高談法曲拜先生。青衫聊可供驅使。頑石何愁化不成。

無好無能兩鬢霜。戰時生活費商量。江南何地可容拙。我是馮驩君孟嘗。（人皆趙盾我非馮道）

癸未九月三日蒙趙君仲光紹介得識沈殿揚先生於國際飯店

茫茫天地一衰翁。舊業今緣兩手空。忽地相逢鄉善士。翩翩饒有古人風。

題孔子像

唯物唯心一派中。傳經人去講堂空。新新推作新民化。大道之行天下公。

祝工部局華員總會十週紀念代周屏侯作

形成中外倍相親。盛會而今紀十春。慶祝定增新氣象。籌謀猶憶舊經綸。無言桃李都成誦。

息影田園不患貧。我亦景從忝雅集。千秋衣鉢有傳人。

壽葉志青君鴻樓雅集圖

無真非幻幻非真。一幅鴻圖妙入神。爲問廬山誰得似。散花仙史詠詩人。
江南風景好春光。桃李盈門稱一觴。安得生花一枝筆。南山寫遍桂蘭芳。
桃源避地萬人家。百子紅開一半花。我慣吟詩不嗜酒。躋堂爲試雨前茶。
（葉君今年五十聞不久歸道山惜哉）

丁佩之先生暨王夫人六旬冥誕

孤星始曜失慈幃。寸草風噓何所依。漫說畢婚求外氏。且言從學式中閨。
機聲燈影恩難報。花落鵲啼淚欲揮。賸有室廬追慕切。季元怕檢嫁時衣。
教養勤劬等所生。世稱南越舊簪纓。芝蘭競秀迎春早。松柏凌寒向晚榮。
人說袁公徂宅相。我疑孟母斷機聲。回頭六十年來事。不勝涓陽一片情。

壽過母七十

詩書門第布衣身。猶是有清一代人。銀燭金花慶賢母。蘭孫桂子款嘉賓。
節逢冬至纔三日。壽屆古稀晉七旬。詩詠篤之綿世澤。瑤池酒熟醉和春。

戊子重九右足曲筋打消治龍鍼杜門不出

重陽韻話俗相仍。如此龍山誰共登。祇恐山高行不得。峯迴路轉密層層。
作客難忘杞國憂。蓉湖山色入深秋。茱萸雖好不堪插。玄晏先生已白頭。
失時形態病中身。况復頭顱不及人。紅葉萬山安可仰。算來六十八年春。

楊味雲先生常珍之慶代顧彬生作

劫後河山過眼前。魯靈光殿獨巍然。及時科第傲卿相。經世文章埒聖賢。惠普恤民獎工運。
才長裕國著書傳。從今算到期頤壽。再享清閒二十年。
忽聞東閣報官梅。冬至陽生春又來。伯仲壘簾循吏學。後先蘭桂偉人才。吟成洛社詩千首，
醉到桃園酒一杯。秉政理財津魯客。澗南昨夜采芝回。

甲戌上元轉應曲

燈榭燈榭。何處城遊不夜。鎖窗料峭寒生。捲簾閒對月明。明月明月。又至上元佳節。
燈節燈節。不管人間離別。紫姑神賽宵深。碧翁休問古今。今古今古。鬧遍六街簫鼓。

無錫旅滬同鄉會主辦同德中學第一校校歌

倡革命。號共和。書生戎馬裏。拔劍舞婆娑。別山喜躍壯巍峨。投錢何處起風波。四海浪煙淨。唱澈凱旋歌。

銷日月。賦菁莪。江南風氣早。輸與二泉多。青燈有味夜如何。十年不讀悔蹉跎。快快同攜手。滬海看山河。

保三吾師東寄賀詩爲我稱壽愧不敢當勉和答謝

先生八十稀尤古。遙祝秋風壽一觴。一領青衿才卓絕。三吳紅粉學騰驤。歐行願欲從頭記。洛展經猷得意揚。珍重瑤章韞塞玉。護書三易屬縑緗。

題贈前無錫教育局長臧佛根

不惜精神不愛錢。傳家三禮有真筌。城鄉教育刷新後。經濟源流疏浚前。政績蜚騰紀今日。程功鵲挺惜當年。積存債逋兩難得。報到鈇聲作客邊。

龔道寸先生太夫人九秩作古賦詩誌哀

有母篝燈授書訓。生兒帝國輔家才。天如假母十年壽。兒慶常珍壽母來。人間何世成何事。尙有何人動孝思。潦倒孟嘗門下客。與君同詠蓼莪詩。不遭塵劫脫塵緣。大德由來享大年。豈祇世稱女而士。班姬陶母獨爭先。

壬午元旦 民國三十二年

黃昏鏡上月沉西。飢鼠窺鏡作笑啼。獨惜今年誕今日。愁吟猶是隔年題。

壬午大除夕

窮年送盡報平安。差免饑寒強自寬。我欲謝之方不暇。再來肯作賀年看。

羅斯福逝世 民國三十三年作

驚人花事太匆匆。百五韶光一夢中。無計留春春欲去。落英滿地怨東風。

希墨凶耗 民國三十四年作

歐西唯一獨裁人。空負壯圖百戰身。紅綠薔薇花落盡。商量無計戀殘春。

郭培爾失蹤 同上

推翻老調譜新腔。夜半篝燈人倚窗。獨怪宣傳好文字。一無條件是投降。

三頭會議 同上

要將溽暑換陽和。全仗三頭會議過。整整有詞波茨坦。畫蘆依樣是開羅。

柏林失陷民國三十三年作

狂夫無計奈狂何。一局圍棋失着多。二十萬軍齊覆沒。更無人說莫斯科。

乙酉五月二十二日沖繩島失陷

而今無島不沖繩。既倒狂瀾挽不能。省識家家梅雨足。晚來息取太陽燈。

上海疏散人口民國三十三年作

敢將白骨化青燐。二月唯殘一半春。唱出陽關歸去也。湖山知否舊時人。

柏林陷後民國三十四年作

四面楚歌三面生。鮫人城下去尋盟。銅城鐵壁無行迹。瓦礫空餘夕照明。

美機襲滬同上

兩三星火認依稀。白日天空動殺機。一轉瞬間大轟炸。萬家不翼效于飛。

癸未大除夕

三十六旬又一周。客窗燈火客吟愁。明朝何物獻新歲。案上一枝破筆頭。

天亮民國三十五年作

鷄旣明兮朝旣盈。神州全面著和平。不知消息來何處。門外兵兵爆竹聲。

德軍全面投降民國三十四年五月八日作

五年八月計成空。生死雙飛一夢中。大小三軍齊俯首。受降城外石榴紅。

同鄉丁熊照先生濟人成事動輒萬金緒承爲知遇之一癸未守歲

敬賦一絕爲謝

天地至今昧公道。管鮑終古見交情。孟嘗門下三千客。何厚殷勤彈鋏聲。

甲申元月四日丁熊照先生設讌招飲席間口占一絕

風雨同舟款一堂。主人投轄客傳觴。知恩未報情何厚。豈獨馮驩客孟嘗。

乙酉清明寫景

多年不事傍郊行。無酒無花享太平。安坐泰山誰似我。防空壕裏過清明。

慶祝勝利民國三十五年作

一番苦戰去無迹。滿地秋風來有聲。秃筆一枝天賦與。留將慶祝寫和平。

賦得不生不活得過字五言四韻（民國三十七年作）

物價今如此。人生可奈何。羸身空有問。枵腹活難過。茅屋雙扉破。債臺萬丈多。不愁不上吊。不怕不投河。

燕石觚翰續集卷三

聯

無錫馮緒承著

挽革命先進林煥廷

瀛海入老同盟。鎮南唱勝利歌。偃武修文。是革命而有功於天下。
內闕秦半兒戲。外交尤多魔術。殃民辱國。非捨生亦不願在人間。

代陶載良輓立達學園匡互生先生

少年謀報國。備歷艱辛。回溯革命成功。發軔自南楚而北直。
數載掌教鞭。忝許知己。豈期昊大不弔。蓋棺爲興學以輕生。

挽周銘初吾師

同客滬濱。爲願鄉情熱公益。
舊游門下。不將歐學忝師承。

爲郵務職工會挽抗日殉難郵員

紆國難。惜民艱。身臨槍林砲雨中。死而無憾。
率郵工。弔烈士。腸斷九月重陽後。魂兮歸來。

競志女校二十五週紀念聯語

戊戌倡新政。梓桑革舊觀。進巾幗於文明。導師敬仰歐公博。
先民國柒年。後秋節壹月。溯本源以紀念。造士尊推韋母賢。

輓過心耕先生

兒年輩聲庠序。客歲講學滬囑。差幸忝許知交。攝影酒樓。吟詩旅邸。長聯風雨以談心。聽
臘鼓載賦驪歌。聊訴羈愁。兩事微聞君有悔。
縱非厭棄塵寰。疑是重游泮水。不圖凶遭滅頂。拋殘兒女。謝絕友朋。遠隔雲天而作古。晉
五齡正登六秩。忽傳噩耗。百思哀輓我無才。

輓親家秦于卿先生

舊游鄉里。同客滬濱。正五秩又晉六齡。姻文詞。善書法。精畫圖。謂非能者多勞。丁異之
長才。末路英雄君刮目。

手校青編。愁添白髮。從丙寅而至己巳。頸患癰。腰產疽。肺病瘵。自是以之殞命。向平慳

素願。兩家兒女我關心。

大除夕五十自輓

仰何有。俯何曾。愧對天人。權將已過半百宣告止頭。未來半百通告起頭。願以後修身踐言。頭頭是道。
吹不能。拍不得。甘作牛馬。終算學校方面卅年間事。郵局方面廿年辦事。到而今奔南走北。事事稱心。

爲全國郵務總工會挽抗日殉難郵員

卸除郵務。救護民生。最難忘砲轟大場。機飛嘉定。
敵焰孔張。人心不死。猶想見魂銷日下。血濺淞濱。

代陳鴻海挽兄

病榻半年餘。原隰分途。視白樂天吟詩少三歲。顏子淵修文長一歲。
馳書千里外。滬江返棹。聽郭代公堂前哭佳兒。陳堯叟膝下泣孤兒。

代唐紫佩挽僚婿

卅年公務頻勞。歸去訂心期。同作向平酬夙願。
二月春風多厲。別來櫻胃疾。忍言謝晦哭連衿。

挽已故岳丈宋公培芝

如見杜祁公。浮白賜呼蘇子美。

會當寒食節。踏青展拜丈人峯。

代吳臣笏挽榮月泉

長我才兩年。名重錫金。闔座尊推鄉里望。
羨君備五福。學貫中外。滿階秀挺桂蘭芳。

代楊岱時挽弟懷谷

同胞留歇浦。祇此二人。迴憶幼而學。壯而行。驅車四方。手足聯歡未能盡。
刼運厄弘農。又弱一個。可憐男欲婚。女欲嫁。開門七件。國家多難其何堪。

巧對

六木森森。松柏梧桐楊柳。

疊石磊磊。礧礧碼礧礧。

註。本草經。礧礧碼礧礧見玉部。載佛經。按說文解字註。礧礧碼礧礧皆石也。正用許

語。取石。故其字從石。彌陀經有彌伽碼磻磻而勉希之句。

挽俞仲還先生

置身庠序。服官梓桑。文化長文明。有口皆碑商學仕。
同作僑民。被推鄉董。公所理公事。當仁不讓祝周榮。

挽秦少巖世伯

卷韜鞠歷。先來歲預祝常珍。迴溯泮水插芹。一代名場文學士。
子孝孫賢。正此時藉圖小隱。誠看東山稅駕。廿年宦海倦遊人。

同鄉孫秋屏與包水錦於戊辰九月十八日舉行銀婚

「秋」月銀「屏」照同影。

「水」花簇「錦」寫迴紋。

挽孫

大小共三孫。個個短命。一誤於中醫。再誤於西醫。醫能殺人。仁術仁心皆利器。
前後凡十載。重重難關。爾胡爲不壽。我胡爲多壽。壽無定數。阿貓阿狗盡完人。

代朱學範挽友

半生偉業足千秋。記曾念切荊州。歇浦幾經膺喬采。
大衍修齡餘六載。誰料慘遭莊躅。錢塘終古咽寒潮。

輓薛樂山先生

遊春不忘上塚。清明藉謁起居。相見有期。豈料成最後一面。
立夏偶抱探薪。故舊時繁夢寐。先生無恙。也應譬如許三新。

代陳文容挽伯母

老景逼桑榆。米鹽瑣事。歷盡艱辛。只爭三載光陰。便到八旬耄壽。
清福蔚蘭玉。葛藟同根。常叨訓誨。不圖十年拜別。胡竟千古銜悲。

挽內兄周植二

與不才結絲蘿之誼。於內子聯手足之情。表親等至親。痛極難忘兄妹感。
遭大故正當早秋前。賦悼亡又在暮秋後。新喪兼舊喪。禮成幸賴子孫賢。

代高宗勸挽父執

詩詞推太白。技術擅岐黃。早年負幹濟長才。冀展由閩江而滬濱。

七秩晉二齡。一朝成千古。今日看繼承先志。蜚騰有令子更賢孫。

挽楊楚孫先生夫人

小子賴裁成。絳帳春風吹寂寞。
先生善珍攝。素緯秋月映淒其。

挽金柳蓆

屈指年華鄰七十。爲洋務局提調。襄理外交。爲新聞報主編。服從公論。
回頭塵世隔三千。有令子羨鳳毛。克家勿替。有賢孫謀燕翼。繩武毋慙。

再輓立達學園匡互生

由湖南冀北。倡革命共和。津海備嘗無量劫。
辦立達學園。救中華民國。淞濱應有未歸魂。

爲郵務工會執委陸京士挽伯母

強仕孀尊親。寶婺輝騰。纔祝畫堂四旬壽。
積勞侵病豎。瑤池駕返。恰逢佳節二分春。

大成劇社陳鵬演劇助賑屬擬一聯

是武秀才化裝。歌哭笑啼。請君看去。
爲新生活寫照。禮義廉恥。聽我道來。

輓楊子侁先生

同稱教育界中人。重整北堂。也許與君翰文化。
共作春申江上客。輪長旅學。比來惟我戀風塵。

應民吁報徵聯

因火成烟。若不撇開終是苦。(出聯)
生心爲性。各能捺住便留名。(應徵)
將木爲槩。又能並立配爲双。(應徵)

挽楊楚孫先生

聽說鬻庠半後生。曾記馳逐科名。也許知音同客裏。
會逢旅學諸先輩。爲言追隨鬼錄。尙留小子在人間。

挽榮宗敬先生

鑽木取火有所宗。十萬人粉望公推。與周祝唐後先媲美。
陳善閉邪謂之敬。麵紗業英才輩出。俾申茂福次第更新。

（緒識周祝唐卽周舜卿祝蘭舫唐晉齋皆錫金公所先後董事也）

代挽沈田莘夫人

治國必先齊家。憶當中饋操勞。以賢德相夫。義方教子。
成仁乃亦有壽。看此日西池證果。而皈依佛法。過返仙鄉。

輓丁芸軒表伯

悔不早聽訓言。八股誤人。回頭猛省廿年後。
了却今生煩惱。一心成佛。撒手空歸十月中。

挽同鄉丁君柏泉

倡實業以爭回利權。名震歇浦。稱跨窳。謂象賢。半甲欠三齡。蔚起家聲式鄉望。
逞游蹤而瞻拜梵刹。阨逢普陀。戶誰搗。車獨挽。一波隔千里。慘遭滅頂渺知音。

徵聯

爲兩大間牛馬勞工。到者番一身隻影。百結愁絲。說甚麼水到渠成。試問如何了局。(中寓馮緒承)

應徵

是乙位的庚子處女。經廿載緊守閨中。拙居戶內。只落得心灰意懶。勉來以應徵婚。(中寓孔芮愆)

春聯

塞北風雲。遮斷青天餘白日。江南雨水。飛來黃禍到蒼黎。

六六自挽之四

一日深夜吐瀉頻頻。家人忙於延醫求治。雨阻不果。恐地下有修文之召。遂挽一聯。以告祖宗。而示子孫。

我與世相遺。今後風雨飄搖。誰則負國家之責。民無食必死。似此生靈塗炭。倘所謂陷溺者非。

代同鄉會輓蔣舖齋

國事不可爲。六二齡捐館。
鄉望將安仰。十萬人啣悲。

代侯椿泉挽襟兄

度重陽纔兩天。享五秩又九年。交易負時名。櫻疾難忘理飾物。
稱不才爲僚壻。視小兒爲猶子。解推關至戚。感恩曾憶在郵程。

書齋聯語

日移竹影侵局棋。
風捲柳絲繫畫船。

挽舅代作

貨殖顯功。家聲蔚起。綜一生惟好德。享六秩。又三齡。方謂樂敘天倫。瀏覽春光。闡揚晚節。
郵傳渾迹。渠誨久遠。紀貳室倍關情。荷青垂。文緋賜。不岡塵封岳蔭。慘懷盧肇。難爲高閔。

挽程敬堂夫人

梁按冷秋風。此日孔懷敬賓禮。

玉臺覺春夢。重陽新咏悼亡詩。

陸定榮賀聯

銀燭夜深印顏色。

黃花秋爽刷精神。（業印刷）

挽劉繼欣

求學得工運之真傳。猶記芸窗執燭。梅開校書。攻玉相資愧維束。
懷才乃造物所深忌。特恨室有雙親。孤無六尺。修文遞召失候芭。

代居文元挽岳父

有史齷筆。兼董狐才。不吝垂青。竟喜龍章叨福蔭。
晉五週年。卽七旬壽。遽驚返碧。復嗟雀選負深恩。

輓朱夫人彼姝

勞勞井臼。瑣瑣米鹽。愔愔琴奏。侃侃聲懸。纔過六秩華年。滿擬卜築梓鄉。追隨蓮社。
有夫長郵。有子授室。有女于歸。有孫在抱。真教一團福氣。忍見卿游地府。我悼滬濱。

挽秦效魯先生

同盟健將。革命驕子。弗是人。佛。

遊學東邦。服官故鄉。老者曰。蒼。

續膠自撰一聯

男有家。女有室。不求仙佛。

貧無諂。富無驕。纔算夫妻。

六旬將屆自輓之三

枉在人間作牛馬。先喪父母。繼喪兄弟。終喪妻子。幸兒女各自成家。自問有始有終。留馮氏曙光於一線。

慣於廁上看詩書。中文掛名。西文冒牌。東文和調。與家國雖無裨益。不妨半工半讀。了花甲初度之餘年。

輓劉春圃先生

花甲才周。迴憶元宵。並榻與君感身世。

清明乍過。相憐同病。片旛先我撤塵凡。

代同鄉會祝陳益琴先生六十壽聯

斟菊酒奉觴壽花甲。

叩海關代表利商家。

輓蔡松如先生

情誼等師生。祇慚故我依然。望斷蓉湖隔秋水。
文章貫中外。願葆真儒本色。行看杏壇霽春風。

賀同鄉孫家良先生行婚

(一)

文心窗下訂知音。譜出千秋琴瑟。佳侶席間試攜手。扶起再造河山。

(二)代上海市五金商業同業公會

海上結良緣。梅子黃時協婚禮。天中度佳節。榴花紅處豔新妝。

元宵節團拜

團聚屆新春。杯酒談心。無分異地。拜賀逢元夕。燈花炫目。如見故鄉。

挽楊筱荔先生

(一)

如公尚德兼尊。才擅蓮幕。陰留棠碑。豈僅泮水重游。賦鹿鳴而光里乘。

有子箕裘克紹。萊綵言歡。財政承志。最難滄桑數邁。謀燕翼勿替家聲。

(二)

幕府老手。宦海遊蹤。羨公弁冕儒林。鹿鳴重賦鍾人瑞。
天靳期頤。仙逝頃刻。有子崢嶸商界。燕謀早遂慰親心。

挽內兄周衡伯

承先啓後。無忝所生。小別海天秋。設節賞心。還期談實業。
世亂國危。惟恐不死。滿城風雨夜。蓬瀛潛跡。是謂識時機。

挽四十八年老友黨彥章

滬濱也作寓公。歷溯同鄉。堪嘆交情再難得。
泉下若逢內子。垂詢不佞。爲言婚事百無成。

送胡時淵長招商

文物三吳。邑中翹楚。風濤萬古。海內承平。

挽沈瑞州夫人

七子二女。梓舍銜悲。陟屺空懷望母句。
炊臼鼓盆。藥砧抱痛。拈毫忍賦悼亡詩。

挽吳幹卿先生

碩望冠梁溪。後二年將登七秩。

噩音傳歇浦。前三日恰好重陽。

理髮室一聯

要從鏡裏辨顏色。

還將刀上用功夫。

步忠和雅芳行婚

移步登高。蓋忠合抱。

雅歌白雪。芳溢紅梅。

陳益琴先生之子行婚

元旦甫經。式瞻陽德。

良宵初度。喜報春光。

陸東生之子行婚

日映桃花春弄色。

風翻柳絮曉催妝。

代楊叔藝先生挽楊家柵

惟宗台以商業起家。自慚綠櫪三生。客邸空懷致敬禮。

與介弟爲梓鄉設教。所幸同心一德。校門忝長弔英風。（叔藝先生爲同德中學校長家柵爲教員家柵之兄）

代同鄉會挽楊家柵

營商業。起家聲。相期無負平生。人盡惜其才。目擊頻年常作客。弟有三。子是四。端賴長隨教養。天胡奪之壽。肝痛此日遯游仙。

代楊家柵挽兄

共四人。缺一。世間最難得者。

既撫我。又教我。今後誰則能之。

挽陸榮堂之母

於親友夙著賢聲。壽逾七旬推衆母。

有子孫永垂令譽。春歸二月作完人。

再挽程敬堂夫人

病莫能興。兩行子女就盈數。

天不永壽。四閱寒暑卽古稀。

榮孝範之弟義範結婚

攜手洞房看競渡。

合歡杯酒醉和春。

又代同鄉會作

繡閣合斟蒲酒綠。

華堂相照榴花紅。

挽朱瑞祥

以公益爲前提。不吝解囊。羣衆一鄉推善士。
歎天心之巨測。無端構疾。老成兩日作遊仙。

朱瑞祥嫁女

梅實詩歌。豔羨雙美。

花影春色。平添二分

挽蔣哲卿代作

心存愛國。何有於官。以其身遊天地間。杖鄉已逾六秩。
口給禦人。毋乃爲佞。本此志立法學界。蓋棺亦足千秋。

代水祥雲挽趙樹聲夫人

相夫子持籌局務。輒生卜宅同居。舉案仰芳徽。抱病京華。縱有名醫嘆絕症。
賦登高纜過三秋。衍初度正逢半甲。炊臼醒好夢。悼亡滬濱。那堪令媛失慈暉。

代孫子襄表姪壽顧康伯夫婦六句

鴻案齊齡。六旬榮慶。鶴觴介壽。三代聯歡。

壽薛緯亮六句

齊舉案眉。祝杖鄉壽。挺桂子秀。衍桐孫枝。

挽周恨石夫人

戀愛自由。我言活拆。還是死別。一病千古。誰謂庸醫。不能殺人。

代陸京士挽抗日殉難烈士

君皆郵局同寅。抗日戕生。饒有英雄酬壯志。我亦工會份子。挽歌追悼。愧無襪線寫長才。

挽朱錦堂上將

榮膺上將。壽逾古稀。蒙漢謳思欽奏績。祖德流芳。孫枝挺秀。林泉休養憐歸真。

挽蔣曾煥代作

吾錄戰裏。尙聽鏡吹。其智不可及也。笑語聲中。時含怒意。此事猶及見之。

爲丁錫祥送丁熊照先生新建下圻校舍

賴有斯文。鄉間表率。雖非廣廈。天下歡顏。

代陸士淞挽兄克明

棄養猶憶髫齡。卜宅湖吳淞。形影相隨。難得事兄如事父。避亂空懷疇昔。飛航蒞滬濱。聲淚俱下。豈惟同事况同胞。

挽陸克明

出口成章。魯仲連排難解紛。到處吾聞其語。以身許國。杜工部禮賢下士。及門幾見斯人。

挽方處長令尊潤卿先生

滿階蘭玉。蔚起家聲。若論智謀有餘。慕容垂恐難千古。當代蒼英。羣推人望。試看骨格必壽。宋仲敏尙少二年。

挽姻嫂張夫人

自遠藁砧。幸賴賢郎供菽水。

曾親病榻。忍離崔嫂奠壺觴。

挽友代作

烏哺未遂。雁折重逢。身世感飄零。是白樂天吟詩之歲。
腦病一朝。夢醒初夏。死生悲永訣。與陶元亮醉酒何人。

麗都花園卽席口撰一聯

同鄉相見在他鄉。祝個壽來。最高六七十。是爲雙十。
茶客居然作陪客。吃碗麵去。至少一千二千。統共三千。

下圻校舍落成典禮代許鍾圻作

興學而挽廿紀澆風。三樂紹東縉。澤被梓桑追上谷。
散財以維百年大計。萬間課南畝。名慚土木誦高陽。

其二代匯明廠作

以下圻開慶半頃淪民智。

爲南村文獻百年揚國光。

利泰開幕

利潤霑四海九州而外。

泰爻叶三羊五幅之中。

陳貴生先生大衍之慶

自昔嘗聞假年學易。

而今乃曰寡過知非。

爲楊弢亮挽叔母

朔風捲惠麓。慈竹遶彫。倘教天假六年。介壽捧觴添百歲。
愛日戴中江。寒梅初放。滿期歡臚兩代。躋堂聯袂祝千秋。

錢同甫續膠

梅實再探新氣象。

榴花相照舊風流。

榮梅莘先生姪女于歸

結良緣欣逢良月。

溯陽曆恰好陽春。

又代太湖俱樂部作

論陰陽二五締佳耦。

娛山水封采訂同心。

挽徐可亭先生

前兩年古稀稱觴。正抗日勝利後。

不一月朱明變節。爲景楚憑弔時。

壽蔣貴慶先生

從古所稀。百年一日。於斯爲盛。三子九孫。

楊愷齡與鄒馨棣結婚

豈獨心交點鴛譜。令人齒掛戀鴻莊。（或用羨字）

右聯分嵌愷齡二字

南市景瑞中學開十週紀念會一九五〇年十一月一日

景象一新。桃李無言週十稔。瑞氣間鍾。絃歌不輟足千秋。

代挽臺北郵員劉喜

客裏訂心交。郵亭共事。麗澤相資。秋水難填溯洄恨。
工餘罹肺病。二豎爲災。諸孤失怙。夜月愁聽啼哭聲。

代劉春圃先生挽兄

年逾花甲。早踏槐門。世間樂敘天倫。最難得者兄弟。
節屆重陽。悲歌蒿里。今後顯揚祖德。是所望於子孫。

挽侯惕丞代馮雲初作

警政長十六年。學貫魚鈴。饒有循聲馳錫麓。
耗音電三千里。情殷鶴弔。忍將哀誄寫金蘭。

代挽高萃甫

晉五句才一載。撒手梓鄉。可堪兒女堂前。風淒落木。
聽內子哭同胞。從頭絮語。祇爲兵戈劫後。禍起蕭牆。
(巖牆失修致取覆壓之禍)

挽楊伯安

頻年作嫁。公務勞人。愛國先從治家始。
一病垂危。浮生若夢。哭君兼亦歎吾衰。

明星花露香水徵聯(嵌字格)

露爲花開香馥郁。
星還水取色清明。

代撰郭氏三兄弟同日娶黃氏三姊妹賀聯

江夏負時名。不愧三才。攜手同行讀周禮。
花朝弄春色。相距五日。畫眉初試寫新妝。

尾聲

我非介壽。人是醜資。多謝諸親好友。
滿幅之乎。一堆垃圾。統稱燕石觚翰。

82
311221



Michael